

Digitized by the Internet Archive
in 2011 with funding from
University of Toronto



The Institute of Mediaeval Studies

LIBRARY

Toronto

ACADÉMIE ROYALE DE BELGIQUE.

TYPOGRAPHIE DE M. WEISSENBRUCH, IMPRIMEUR DU ROI.

7, RUE DU MUSÉE.

LI ROUMANS

DE

CLÉOMADÈS,

PAR

ADENÈS LI ROIS

PUBLIÉ POUR LA PREMIÈRE FOIS,
D'APRÈS UN MANUSCRIT DE LA BIBLIOTHÈQUE DE L'ARSENAL, A PARIS,

PAR

ANDRÉ VAN HASSELT

MEMBRE DE L'ACADÉMIE ROYALE DE BELGIQUE

TOME PREMIER

BRUXELLES,

COMPTOIR UNIVERSEL D'IMPRIMERIE ET DE LIBRAIRIE,

VICTOR DEVAUX ET C^{ie},

RUE SAINT-JEAN, 26.

1865



DEC 16 1965

28175

INTRODUCTION.



Sur la vie du poète Adenès ou Adans, à coup sûr un des plus considérables, quoiqu'un des moins renommés de son temps, l'histoire littéraire ne possède guère d'autres détails que ceux dont nous sommes redevables à lui-même et qui se trouvent semés çà et là dans ses écrits comme par hasard. Si le nom même sous lequel il est le plus généralement connu n'est tout simplement qu'un de ces diminutifs dont l'usage fut si commun au moyen âge, ou si, comme le pense M. Paulin Paris¹, il fut donné à notre Adans pour le distinguer du célèbre Adam de le Halle, son émule et son contemporain, c'est ce qu'il n'est pas possible de décider.

Nous n'avons pas des lumières plus certaines pour déterminer d'une manière précise la signification de son surnom *le Roi*. Adenès le prit-il parce, que selon M. Paris², il occupait à la cour du duc de Brabant Henri III la charge de chef ou roi des ménestrels, fonction très-complexe, en vertu de laquelle celui qui s'en trouvait investi était à la fois « chef d'orchestre, directeur de théâtre, et, s'il nous est permis de l'ajouter,

PQ
1413
174

¹ *Histoire littéraire de la France*, t. XX, p. 679.

² *Ibid.*, p. 677.

intendant des plaisirs? Ou parce que, d'après Laserna Santander¹ et Ferdinand Wolf², il était attaché au service du même prince en qualité de héraut ou de roi d'armes? Ou parce que, s'il faut en croire M. Francisque Michel³, il était chef ou roi d'une de ces associations littéraires qui, connues sous le nom de *puys* et instituées à l'exemple des cours d'amour de la Provence, existaient en Flandre depuis la première moitié du xiii^e siècle et qui s'y sont perpétuées jusqu'à nos jours sous la dénomination plus moderne de sociétés de rhétorique? Ou bien parce que, d'après l'opinion de M. Roquefort⁴, il obtint simplement une couronne dans quelque concours poétique ouvert par l'une ou l'autre de ces compagnies? Rien ne nous permet de l'affirmer, bien que nous inclinions à admettre de préférence, parmi toutes ces conjectures diverses, celle de M. Paulin Paris. En effet, si l'opinion d'après laquelle notre poète aurait été héraut ou roi d'armes du duc Henri de Brabant est simplement basée sur la complaisance, ou, si l'on veut, sur l'espèce d'affectation qu'il met, dans plusieurs passages de Cléomadès, à faire montre de ses connaissances en héraldique en blasonnant les écussons des chevaliers qu'il met en scène, nous pourrions opposer à ce fait un fait d'une autre nature qui se manifeste dans le même ouvrage : c'est l'insistance avec laquelle Adenès fait valoir l'importance des ménestrels, les services qu'ils peuvent rendre à leur maître et le dévouement qu'ils doivent lui

¹ *Mémoire historique sur la bibliothèque dite de Bourgogne*, p. 118.

² *Ueber die alt-französischen Heldengedichte*, p. 30.

³ *Examen critique du roman de Berte*, p. 7.

⁴ *État de la poésie française pendant les XII^e et XIII^e siècles*, p. 138.

témoigner dans les circonstances difficiles. En outre, tous les instruments de musique lui sont familiers, et il en donne le détail à plusieurs reprises. Enfin, d'après son propre témoignage, il occupait la fonction officielle de ménestrel à la cour du duc Henri III, et l'on ne saurait douter que son talent ne l'ait fait élever au titre de roi (régisseur ou directeur) des musiciens ses confrères, qualification que nous voyons, dès le moyen âge, admise dans nos anciennes confréries littéraires, dont le chef portait même quelquefois le titre d'empereur.

On ne possède pas des renseignements plus positifs sur le lieu de naissance, sur la famille et sur la position sociale d'Adenès. Cependant nous pouvons admettre, d'après une conjecture généralement consacrée, qu'il fut d'origine brabançonne. En effet, il nous apprend, dans son poème de Cléomadès, qu'il dut à la munificence du duc de Brabant Henri III le bienfait de son instruction littéraire et de son éducation. On sait que ce prince, qui gouverna le duché depuis l'an 1248 jusqu'à sa mort survenue en 1261, accueillait volontiers les poètes et qu'il cultivait lui-même les lettres avec quelque succès, comme l'attestent trois ou quatre de ses chansons que le temps nous a conservées. C'est de lui qu'Adenès entend parler dans ces vers :

Menestrex au bon duc Henri
Fui. Cil m'aleva et norri
Et me fist mon mestier aprendre.
Diex l'en vueille guerredon rendre
Avoce ses sains en paradis!

De ces lignes on a déduit naturellement qu'Adenès vit

le jour en Brabant, qu'il appartenait à une famille peu favorisée des dons de la fortune et que sa naissance ne saurait guère être reportée au delà de l'an 1240. On y voit aussi qu'une fois initié à son art, il obtint la position de ménestrel à la cour de son généreux protecteur.

Si à ce titre il vécut dans une certaine familiarité littéraire avec Henri III, on ne le sait pas d'une manière positive; mais rien n'autorise à en douter. En effet, dans plusieurs passages de Cléomadès, il manifeste le plus vif attachement pour le prince brabançon. Même, lorsque, le 28 février 1261, le duc, se trouvant malade à Louvain et sentant venir la mort, eut fait ouvrir toutes larges les portes de son hôtel, afin que, riches et pauvres, on laissât approcher de sa couche tous ceux qui le souhaiteraient, Adenès ne put manquer d'assister pieusement à cette belle agonie, durant laquelle, loin d'avoir besoin de sermons, le mourant prêchait lui-même les autres et distribuait des aumônes : « Je meïsmes, » dit-il,

« Je meïsmes aussi i fui,
Qui puis bien dire, sans doutance,
K'ains plus bele reconnoissance
Ne pot avoir nus hom mortés
Que il ot. Diex en soit loés!
Je vous pri que pour lui priiez
Que Diex li pardoinst ses pechiez
Si vraiment qu'il pardonna
Sa mort, le jour que l'assena
Longis de sa lance ou costé,
Quant par lui fumes racheté.
Et tout cil soient beneït
Qui diront : « Amen ! Diex l'otroit ! »

Bien des années après ce jour, il se souvint encore

avec attendrissement de la triste et touchante scène dont il avait été témoin, et s'écria dans l'élan de sa reconnaissance :

Loiaus princes fu et gentis,
Et bons et biaux et dous et frans
Et courtois. Ne fu ce duels grans
Quant tex princes si tost moru
Conme li bons dux Henris fu.

Nous ignorons quelle fut, à la cour de Brabant, la position d'Adenès durant les longues querelles intestines dont le duché fut le théâtre après la mort d'Henri III et qui s'élevèrent à l'occasion de la tutelle des enfants mineurs encore de ce prince. On sait que ce fut seulement en 1267 que l'aîné, Henri, disgracié de la nature et faible d'esprit, se retira dans un monastère d'Augustins à Dijon, après avoir abdiqué l'autorité ducal en faveur de son frère puîné, Jean, premier du nom ; que celui-ci, alors âgé de 16 ans, fut inauguré l'année suivante, et que Godefroi, le plus jeune des trois fils du feu duc, fut investi du comté d'Arschot. Ces deux princes paraissent avoir continué à notre poète la protection et la bienveillance dont leur père l'avait honoré ; car voici comment il s'exprime dans un autre endroit de Cléomadès :

... Puist (Diex) le duc Jehan garder
De Brabant, en honneur monter
Le vueille, et li doinst chose faire
Qui lui et au siècle puist plaire !
Lui et mon seignor Godefroit
Maintes fois m'ont gardé dou froit.
Cil dont je faz ci mencion,
Diex lor en rende guerredon !

Cependant il ne resta pas longtemps à la cour du nouveau duc, soit que son imagination, surexcitée par les créations romanesques et les poétiques incidents des gestes au récit desquelles il allait désormais consacrer son talent, lui eût inspiré le goût des voyages lointains et des aventures peut-être, soit aussi qu'il n'eût pas trouvé dans Jean I^{er} un admirateur assez fervent des lettres françaises, ce prince, poète lui-même, s'étant adonné plus spécialement à la culture de la langue flamande, comme on peut l'inférer de neuf chansons qu'il nous a laissées et qui sont écrites dans cet idiome. Quel que soit le motif réel qui l'ait décidé à quitter la cour brabançonne, nous le trouvons attaché en 1269 à Gui de Dampierre, comte de Flandre, dont le père, Guillaume, avait été un zélé protecteur des poètes selon le témoignage de Marie de France et de plusieurs autres écrivains contemporains. Gui lui-même avait hérité de son père le goût des lettres comme l'atteste Adenès dans ces vers de son chant des *Enfances Ogier* :

Li jongleour deveront bien plourer
Quant il morra ; car moult pourront aler
Ains que tel prince puissent mais recouvrer.

La nouvelle position acquise par le poète devait lui sourire d'autant plus que son maître, l'un des grands vassaux de la France, du chef de sa mère Marguerite de Flandre, se préparait en ce moment même à prendre part à la deuxième croisade organisée par saint Louis. Aussi bien cette expédition allait offrir à notre ménestrel l'occasion de voir de près le spectacle des combats

et des grands coups d'épée qu'il s'apprêtait à décrire dans ses chants.

En effet, au printemps de l'année 1270, nous le voyons suivre Gui de Dampierre, avec tout le corps des ménestrels, à Aigues-Mortes où l'armée royale se rassemblait.

On sait que cette croisade, destinée d'abord à soutenir la puissance déjà chancelante des chrétiens en Syrie, fut brusquement détournée de son but par l'influence du roi Charles de Sicile et dirigée vers Tunis. Rarement peut-être on vit une expédition plus dispendieuse à la fois et plus stérile. Arrivée en Afrique le 18 juillet, l'armée rentra en Europe le 18 novembre, après avoir accompli quelques infructueux faits d'armes et vu mourir, deux mois auparavant, le roi Louis non loin des ruines historiques de Carthage.

Adenès eut-il même le privilège de descendre avec son maître sur la côte d'Afrique ? Ou resta-t-il dans l'un des navires qui se tinrent à l'ancre sur la rade de Tunis, avec les maisons de la reine de Navarre, de la comtesse d'Artois et de la femme de Philippe de France ? Aucun document ne nous renseigne à ce sujet. De sorte que notre poète se vit peut-être trompé dans l'espoir qu'il devait nourrir d'assister à quelque importante action militaire, ou de s'y mêler, à l'exemple de son poétique prédécesseur Quesnes ou Conon de Béthune.

La flotte ayant transporté l'armée royale de Tunis à Trapani en Sicile, vers le milieu du mois de novembre 1270, nous y retrouvons Adenès. Les comptes de l'officier chargé des recettes et des dépenses de Gui de

Dampierre nous montrent successivement le poète à Palerme, à Montréal, à Messine, à Catane, prenant part sans doute, avec la chevalerie flamande, à une de ces grandes montres militaires que Charles de Sicile devait être heureux de présenter à son nouveau royaume en faisant défiler à travers les principales villes les belliqueuses épées de la France, pour imposer à une population mal soumise et contenir des haines qui aboutirent douze ans plus tard aux sanglantes Vêpres siciliennes. Les mêmes documents nous font connaître un assez curieux épisode de cette promenade armée : c'est un dîner que le comte Gui donna à la compagnie de ses ménestrels, le mardi après Noël, à Calabouton¹, et auquel il assista lui-même. D'après l'état des dépenses, le festin coûta onze livres cinq sols et un denier, le pain cent cinq sols, le vin quatre livres cinq sols, et le loyer de la salle quinze sols.

Le 19 janvier 1274, Adenès passe, avec la maison de Gui de Dampierre, le détroit du Phare et arrive à Seminara dans la Calabre ultérieure. Ensuite il s'achemine vers Monteleone, puis vers Nicastro; et, après avoir fait une halte de deux jours dans chacune de ces villes, il se dirige vers Cosenza où le comte Gui rejoint le roi Philippe de France. Il atteint Naples le 20 février, part le lendemain pour Capoue et entre à Rome le 3 mars. De là il prend route par Viterbe vers Florence qu'il visite

¹ Il faut lire sans doute Calatubo, localité située entre Alcamo et Balestrate.

Voy. *Carte comparée de la Sicile moderne avec la Sicile au XII^e siècle d'après Edresi et d'autres géographes arabes, publiée sous les auspices de M. le duc de Luynes, par A.-H. Dufour et A. Amari.*

le 14 avril. Il traverse ensuite Prato, Bologne, Modène et Reggio pour se reposer à Parme depuis le 23 jusqu'au 27 du même mois. Il continue son voyage par Bergame vers Milan, où il s'arrête trois jours et d'où il se dirige vers les Alpes par Novarre, Verceil, Ivrée et Aoste. Arrivé le 11 mai au pied du grand Saint-Bernard, il en commence l'ascension le lendemain, et dîne au célèbre hospice de la montagne, pour descendre, le jour suivant, à Villeneuve à l'extrémité orientale du lac de Genève. Il atteint Lausanne le 14 mai, arrive à Dôle le 18, et gagne finalement Paris par Châtillon, Bar-sur-Aube et Provins.

S'il ne fut pas donné à notre poète de prendre un rôle actif dans l'expédition avortée de Tunis, au moins il rapporta de son voyage une foule de souvenirs dont il enrichit plus tard son poème des *Enfances Ogier* et celui de *Cléomadès*.

On a prétendu ¹ qu'Adenès suivit à Paris la princesse Marie de Brabant, lorsqu'elle épousa, en 1274, le roi Philippe le Hardi, et qu'il resta, depuis cette époque, attaché au service de la jeune reine. Cependant ce fait n'est rien moins que probable; car nous savons, par deux états de dépense de la maison de Gui de Dampierre, que, pendant les années 1275 et 1276, notre poète recevait encore des gages de ce prince. Puis, d'ailleurs, lui-même, après avoir dit, dans son poème des *Enfances Ogier*, qu'il écrivit cette geste à la demande du comte de Flandre, ajoute :

Ce livre vueil la roïne *envoyer*
Marie.

¹ FERD. WOLF, *Ouvr. cité*, p. 31.

En outre, à la fin du roman de *Cléomadès*, le dernier ouvrage qu'il ait composé, il nous apprend qu'il appartenait encore à Gui de Dampierre.

Et (Diex) gart le bon conte Guion
De Flandres, cui loer doit on ;
Car en lui maint, par verité,
Fois et honnours et charité ;
Et certes, *se à lui n'estoie*,
De la bonté plus parleroie
De lui et de ses bons enfans
Et cui loiautez est manans.
A tant m'en vueil ore passer.
Li biens se sara bien moustrer.
Lui et les siens Diex garder vueille
Et tous à s'amour les acueille.

Il résulte manifestement de là qu'il était encore attaché à la maison de Flandre, alors que la princesse brabançonne portait déjà depuis longtemps la couronne des lis.

Mais jusqu'à quelle époque demeura-t-il à la cour de Gui? Pas le moindre renseignement ne nous permet de préciser ce point.

Entra-t-il même temporairement au service de la reine Marie? Aucun fait ne nous éclaire à ce sujet bien qu'il nous soit assez difficile de comprendre comment il eût pu, sans avoir longtemps séjourné sur les bords de la Seine, étudier aussi profondément qu'il l'a fait le dialecte de l'Île-de-France; car, ainsi que l'observe M. Paulin Paris ¹, « nulle part la langue et l'orthographe du XIII^e siècle ne sont plus nettement et plus heureuse-

¹ *Ouvr. cit.*, p. 683.

ment représentées que dans les manuscrits conservés de ses ouvrages, et qui, souvent exécutés sous ses yeux, sont tous conformes les uns aux autres. »

Quoi qu'il en soit, d'après deux indications qui nous sont fournies par Adenès lui-même, l'une dans les *Enfances Ogier*, l'autre dans *Berte aus grans piés*, il allait parfois à Saint-Denis consulter quelque moine ou la librairie de cette illustre abbaye sur les *Ystoires* qu'il s'occupait de traduire en poèmes. Ces voyages, qui avaient toujours lieu au printemps,

A l'issue d'avril, uns temps dous et joli
Que erbelete poignent et pré sont reverdi,

il les faisait probablement à la suite du comte Gui, que des liens de famille unissaient à la reine Marie et que, d'ailleurs, ses obligations de vassal de la France devaient assez souvent amener auprès de son suzerain Philippe le Hardi. Peut-être chacun de ces séjours à Paris était-il pour Adenès une occasion de se voir admis auprès de la reine elle-même, qui, fille et sœur de poète, ne pouvait manquer de faire bon accueil à l'ancien protégé de son père le duc Henri III et au ménestrel titulaire du comte de Flandre.

Ce fut, nous n'en doutons point, durant un de ces voyages qu'Adenès fut présenté à Blanche de France, sœur du roi, et, depuis 1275, veuve de Ferdinand de la Cerda, infant de Castille, à Robert II, comte d'Artois et neveu de Philippe le Hardi, ainsi qu'à Mahaut, fille de ce prince. Et c'est là sans doute aussi que l'idée de son

poème de Cléomadès lui fut suggérée par la reine Marie ou plutôt par la princesse Blanche de France.

On ignore en quelle année le poète mourut.

M. Paulin Paris, dans l'excellente notice qu'il a consacrée à Adenès et à laquelle nous avons fait de fréquents emprunts, dit que notre poète se trouvait encore en 1296 au service du comte de Flandre¹. Mais nous ne savons sur quelles preuves l'opinion du savant philologue est fondée, à moins qu'il n'y ait dans cette indication une erreur typographique et qu'il ne faille lire 1276 au lieu de 1296. Néanmoins le fait se trouve confirmé par une indication que M. le baron Kervyn de Lettenhove a tout récemment recueillie dans l'état des dépenses d'Edouard I^{er} d'Angleterre, et d'où il résulte qu'Adenès vivait encore en 1297. On sait que ce roi, ayant fiancé son fils le prince de Galles à Philippine, fille de Gui de Dampierre, vint, dans le courant de cette année même, en Flandre pour assister le comte dans la guerre qu'il avait entreprise contre son suzerain Philippe le Bel, roi de France. Or, les comptes de la maison d'Edouard I^{er} nous apprennent que le roi se trouva, le 5 novembre 1297, à Ypres où deux ménestrels de la ville, Robinet et Alluin, furent admis à l'honneur de lui donner une preuve de leur talent. Trois jours plus tard, le 8 novembre, étant à Gand, il fit remettre à Adenès, ménestrel du comte de Flandre, un fermail d'or de la valeur de soixante sols, sans doute parce que notre poète, à son tour, s'était fait entendre à l'hôte royal de

¹ *Ouvr. cit.*, p. 682.

Gui de Dampierre . « *Firmaculum aureum pretii* LX s.
« *datur per Ricardum vidulatorem regis, nomine regis,*
« *Adæ menestrallo comitis Flandriæ, apud Gand,*
« *VIII die novembris* ¹. »

Ce document est jusqu'à présent le dernier où Adenès se trouve mentionné.

Quoi qu'il en soit, nous pensons qu'on peut, sans risquer de trop s'éloigner de la vérité, rapporter la mort du ménestrel brabançon à l'une des quinze dernières années du xiii^e siècle.

Il nous reste de lui quatre grandes compositions épiques ou romanesques : les *Enfances Ogier*, *Berte aus grans piés*, *Buevon de Commarchis* et *Cléomadès*. Ils furent sans doute écrits dans l'ordre indiqué par l'auteur lui-même en ces vers empruntés au dernier de ces ouvrages :

Je qui fis d'Ogier le Danois,
Et de Bertrain qui fu ou bois,
Et de Buevon de Commarchis,
Ai un autre livre rempris
Moult merveilleus et moult divers.

De ces quatre productions, une seule, *Berte aus grans piés*, a été publiée.

La geste des *Enfances Ogier*, qui comprend au delà de 8,000 vers, est, d'après l'analyse qu'en a donnée M. Paulin Paris, une paraphrase un peu traînante, quoique généralement versifiée avec élégance, du poème rude, mais animé, que Raimbert de Paris écrivit, au

¹ *Codd. Mss. British Museum*, n° 6965.

commencement du XIII^e siècle, sur les aventures de cet Ogier le Danois dont la merveilleuse légende se mêle si étroitement à celle des paladins de Charlemagne.

Le poëme de *Berte aus grans piés*, dont nous devons la première publication à M. Paulin Paris et dont une seconde édition se prépare en ce moment par les soins de M. Gaston Paris, un des plus jeunes et cependant un des plus érudits philologues français, est la deuxième composition d'Adenès. Il a pour sujet la légende de cette Berthe, fille du roi Flore de Hongrie, dont les romanciers du moyen âge ont fait la mère de Charlemagne, soit d'après une chronique provençale, inédite encore, mais mentionnée par M. Paulin Paris¹, soit d'après la chronique allemande de Weihenstephan² que l'on rapporte au XIII^e siècle, soit d'après des récits populaires dont Godefroid de Viterbe³ s'était déjà fait l'écho un siècle avant Adenès et peut-être même antérieurement à la chronique provençale dont il vient d'être parlé⁴.

Buevon de Commarchis, qui est la troisième chanson de notre poëte et que l'on regarde comme la plus faible de ses productions, constitue un simple imitation ou plutôt un simple remaniement du *Siège de Barbastre*, l'une des branches du cycle romanesque d' Aiméry de Narbonne et de ses enfants.

¹ *Histoire littér. de la France*, t. XX, p. 702.

² VON ARETIN, *Älteste Sage ueber die Geburt und Jugend Karls des Grossen*.

³ GOD. VITERB. *Chronic.*, part. XVII, ap. PISTOR., t. II, p. 300.

⁴ Dans le cours de cette notice, nous avons constamment écrit *Berte aus grans piés* par respect pour l'orthographe des manuscrits existants. Mais nous croyons qu'il faut lire *Berte au gran pié*, conformément à la légende allemande d'après laquelle la mère de la véritable Berthe

Enfin, le dernier ouvrage d'Adenès que nous connaissons, c'est le roman de *Cléomadès*, qui est aussi le plus considérable de ses écrits.

D'après ce qu'il nous apprend lui-même, au début de ce poème, l'idée lui en fut suggérée par deux grandes dames, et ce ne fut pas sans une certaine crainte qu'il entreprit ce travail :

Je m'esmay forment de l'emprise
Comment l'aie bien à chief mise ;
Mais ce me fait reconforter
Que me daignierent commander
Que je ceste estoire entendisse
Et à rimer l'entrepreïsse
Deux dames en cui maint la flour
De sens, de biauté, de valour.

Quelles sont ces dames, il n'ose le révéler, de crainte de leur déplaire.

Leur nons ne vueil en apert dire ;
Car leur pais aim et dout leur ire,
Si que bien sai que je morroie
De duel, se fait ne dit avoie
Riens fors leur plaisir et leur gré.
Pour ce seront leur non nommé,
Se je puis, si couvertement
K'entendre ne puissent la gent
Les nons d'eles, quand les liront,
S'on ne leur monstre où li non sont.

(appelée *Bertha mit dem grossen Fusse*) reconnut sa fille à la différence qu'il y avait entre les deux pieds de la prétendue mère de Charlemagne, et conformément à ce vers de Godefroid de Viterbe, qui, parlant de Pepin le Bref, dit :

Eius sponsa fuit *grandi pede* nomine Berta.

D'ailleurs, cette opinion s'accorde parfaitement avec les *Reali di Francia* où il est dit (lib. VI, cap. 11) : « Io vi avviso che Berta ha un « piè un poco maggior dell' altro, ed e il piè destro. »

Après avoir ainsi piqué la curiosité du lecteur, il lève enfin le voile vers la fin du poème; encore n'emploie-t-il que la forme de l'acrostiche pour faire connaître les noms de ses deux gracieuses inspiratrices.

Tes dames qui me commanderent
Vfaire ce livre, moustrent
Royaument leur humilité.
Or me doinst Diex que à leur gré
I'aie ma peine emploie.
Ie li pri que il m'en aye.
Nonmer les vueil, k'en couvent l'ai,
En ce livre, et je le ferai.
Cont me couvient bien aviser
En ce que on ne puist trouver
Fourme ne voie qui ensaigne
Riens nule qui leur nons apraigne
Vceaux qui querre les vorront.
N'en dout riens, jà ne trouveront
Chose escrite, n'en ai pas soingne,
En quoi on me truiست en mençoingne,
Mais en verité la plaisans;
V ce fait bon estre tendans.
Rien ne vaut chose mençoingnable;
Ie m'en tieng à la veritable.
Diex! donnés me sens par quoi
Nonmer les puisse, si com doi.
Maintenant, se Diex me consaut,
Vi nonmé une qui moult vaut.
Cont me couvient l'autre nonmer,
V Diex! tant parfont à amer!
Moult est chascune bonne et sage
En fais, en dis et en usage.
Rien doivent à Dieu obeir,
Tiemment cuer et cors offrir.
V dès mouteplient en bien.
Ne croi k'en eles faille rien.
Ce don leur donna Dieux sans doute.
Haïr leur fist mauvaistié toute;
En leur cuers mist, ainsi le croi,

Amours pour lui aimer en foi.
Nonmées les ai, ce sachiez.
Ne cuit pas k'entendu l'aiez,
Ne je ne quier ne ne vorroie.

Cet acrostiche donne le nom de Marie, reine de France, et celui de Madame Blanche, fille de saint Louis, qui, devenue veuve de l'infant de Castille, était rentrée en France en 1273. Ce furent donc, au dire du poète, ces deux princesses qui lui inspirèrent d'écrire les aventures merveilleuses de Cléomadès.

La geste elle-même il la dédia à Robert d'Artois :

'A noble conte, preu et sage,
D'Artois, qui a mis son usage
En Dieu honorer et servir,
Envoi mon livre, pour oyr
Comment il est fais et dités.

On a discuté la question de savoir si l'invention du cheval de fust ou d'ébène, qui est le pivot principal sur lequel tourne le roman d'Adenès, appartient en propre à notre poète ou si elle est d'origine orientale. M. Keightley croit en trouver des traces dans la littérature persane, et la regarde comme une transformation du cheval enchanté des *Mille et une Nuits*, dont l'histoire a pu être introduite dans la péninsule hispanique par les Arabes, pour prendre racine dans la langue espagnole ; et là, pense-t-il, Blanche de France, familiarisée avec les poètes de cet idiome pendant le séjour de neuf années qu'elle fit au delà des Pyrénées, recueillit cette fable pour la transmettre au ménestrel de Gui de Dampierre¹.

¹ KEIGHTLEY, *Tales and popular fictions*, p. 43, 71 et suiv.

Quoi qu'il en soit de cette machine poétique, nous la retrouvons dans le roman de *Pierre de Provence et de la belle Maquelonne*, dont quelques-uns font remonter l'origine au XII^e siècle¹. Plus tard, le vieux poète anglais Chaucer transforma le cheval de fust en un cheval de bronze dans un de ses contes (*Squier's Tale*), et plus tard encore Cervantès en fit le coursier du Géant Malambrun et ce fameux Clavilègne le Véloce du haut duquel Sancho Pança vit la terre grosse tout entière comme un grain de moutarde².

M. Keightley va plus loin. Il incline à croire que la contexture même du roman devait être connue en Espagne, où Blanche de France a pu en prendre connaissance³. Mais ce n'est là qu'une simple assertion, qu'il serait fort difficile de justifier.

Moins aventureux que l'écrivain anglais, M. Paulin Paris se borne à dire que le sujet du poème paraît emprunté aux traditions espagnoles ou moresques, tous les principaux personnages mis en scène par l'auteur étant espagnols ou sarrasins. Mais nous n'avons pu retrouver, ni dans le Romancero ni dans aucune autre source de l'ancienne littérature hispanique, la moindre trace de l'action développée par le ménestrel brabançon.

Un fait cependant nous frappe, c'est la coïncidence de l'apparition de Cléomadès avec la tentative que fit le roi Philippe le Hardi pour s'emparer de la Cerdagne et du Roussillon et dans laquelle il perdit la vie en 1285.

¹ GRAESZE, *Lehrbuch einer allgemeinen Literaturgeschichte*, t. IV, p. 386.

² *Don Quichotte*, livre XLI.

³ *Ouvr. cit.* pp. 42 et 43.

Le poète n'aurait-il pas cédé à un motif politique en appelant l'attention sur ces provinces convoitées par la France, malgré l'abandon que Louis IX en avait fait en échange du Languedoc par le traité de Corbeil en 1258? N'aurait-il pas à dessein donné pour aïeul à son héros un roi de Sartaigue, c'est-à-dire, de Cerdagne et non pas de Sardaigne, comme l'ont cru à tort le comte de Tressan¹ et le baron de Reiffenberg²? Nous nous bornons à poser ces questions sans entreprendre de les résoudre.

Quant à l'agencement du poème et aux nombreux épisodes dont il est orné, nous ne doutons point qu'il n'en faille faire honneur à Adenès lui-même. Et, certes, le poète y a fait preuve d'un talent de composition que bien peu d'écrivains du XIII^e siècle ont atteint. On peut lui reprocher çà et là quelque longueur, quelques détails trop développés; mais son œuvre forme un ensemble de conception dont toutes les parties se tiennent et sont étroitement liées l'une à l'autre. Du reste, le lecteur en jugera lui-même.

Une partie de l'action de Cléomadès se passe en Espagne, et sur cette contrée Blanche de France a pu donner au poète des indications certaines. L'autre partie se passe en Italie, pays qu'Adenès connaissait pour l'avoir vu de ses propres yeux et où il avait recueilli sans doute les légendes relatives à Virgile l'enchanteur et tous les détails locaux qui abondent dans le roman.

Nous ne pouvons nous défendre de croire qu'Adenès

¹ *Corps d'extraits des romans de chevalerie*, t. I, p. 293.

² *Chronique rimée de Philippe Mouskès*, t. I, *Introduction*, p. CLXXVI.

a essayé de se peindre un peu lui-même, dans l'intéressant personnage de Pinchonnet, le modèle des ménestrels, qui montre tant de sagacité et de dévouement à servir Cléomadès, mais qui n'oublie pas de rappeler adroitement que tout service mérite sa récompense.

Grant eür a à servir gent
Qui aient tel entendement
Que service sachent merir
Ceaus qui le sevent desservir ;
Car moult souvent ont le bienfait
Cil qui n'ont pas service fait
Par quoi le deüssent avoir.
Ce puet on en maint lieu veõir
Que cil qui desservi aront
Le merir, au merir faurront,
Et en porteront le merite
Cil qui aront esté tout quite
De desservir le guerredon
Dont il enporteront le don.
Souventes fois est avenu
Ce que j'ai ci amenteü.
Ne sont ne avisé ne sage
Cil qui maintiennent tel usage ;
Mais je ne l'amet à nului.
Bien se gart chascuns endroit lui
Qu'il paie le desserveõur.
Si aura aumosne et honnour ;
Car qui autrui service prent,
Pechié fait, se il ne le rent.

Le poème de Cléomadès a été l'objet de nombreuses imitations, qui ont paru sous des titres différents, tels que le *Cheval de fust*, *Celinde et Meliarchus*, etc., mais qui toutes reproduisent d'une manière plus ou moins servile l'œuvre du poète belge. Le roman de *Valentin et Orson* en est une contrefaçon grossière.

La création d'Adenès fut au nombre des lectures dont le moyen âge fit un de ses principaux délices. Froissart lui dut une des scènes les plus gracieuses que nous rencontrions dans ses poésies, et nous ne pouvons nous empêcher de la rappeler à nos lecteurs.

Droitement sus l'eure de prime,
S'esbatoit une damoiselle
A lire un rommant. Moi vers elle
M'en vinc, et li dis doucement
Par son nom : « Ce rommant, comment
« L'appelés-vous, ma belle et douce? »
Elle cloï atant la bouce ;
Sa main dessus le livre adoise.
Lors respondi comme courtoise,
Et me dist : « De *Cléomadès*
« Est appelés ; il fut bien fais
« Et dittés amoureusement.
« Vous l'orés ; si dirés, comment
« Vous plaira, dessus vostre avis. »
Je regardai lors son doulc vis,
Sa couleur fresce et ses vers yeulx.
On n'oseroit souhedier mieulx ;
Car chevelis avoit plus blons
Qu'uns lins ne soit, tout à point lons,
Et portoit si très belles mains
Que bien s'en passeroit dou mains
La plus friche dame dou monde.
Vrais Diex ! com lors ert belle et monde,
De gai maintien et de gent corps !
« Belle, di-je, adont je m'acors
« A ce que je vous oë lire.
« N'est sons d'instrument ne de lire
« Où je prende un si grant esbat. »
Et la damoiselle s'embat
En un lieu qui donnait à rire.
Or ne vous saroi-je pas dire
Le doulx mouvement de sa bouche.

.

Et quant elle ot lit une espace,
Elle me requist, par sa grasce,
Que je vosisse un petit lire.
Adont lisi tant seulement
Des feuilles, ne sçai deus ou trois.
Elle l'entendoit bien entrois
Que je lisoie, Diex li mire.
Adont laissames-nous le lire¹.

Remplacez, dans cette scène, le roman de Lancelot par celui de Cléomadès, substituez à Froissart et à la belle liseuse Paul de Rimini et Francesca de Ravenne, et vous vous croirez transporté dans la Divine Comédie de Dante².

Vers la fin du xv^e siècle parut une traduction en prose française du roman de notre ménestrel, et, au commencement du siècle suivant, une translation en prose espagnole. On connaît de l'une et de l'autre plusieurs éditions³. Ajoutons que tout récemment il en a été publié en Angleterre une imitation très-abrégée, en vers français assez médiocrement tournés⁴. Rappelons aussi qu'en 1481, un an après l'apparition de la première édition de la version en prose française, William Caxton fit paraître à Londres une traduction du roman du Renard, dont le trente-deuxième chapitre rappelle d'une manière assez narquoise le héros de notre poëme et le cheval de fust. Dans l'énumération des objets précieux que le renard prétend avoir perdus, se trouvait, dit-il,

¹ *Œuvres de Froissart*, édit. de Buchon, *l'ÉpINETTE AMOUREUSE*, p. 206 et suiv.

² *Inferno*, canto V.

³ GRAESZE, *ouvr. cit.*, t. IV, p. 219.

⁴ *Cléomadès, conte traduit en vers français modernes, du vieux langage d'Adenès li Roy*, par le chevalier DE CHATELAIN. Londres, 1859.

un petit miroir dont le cadre était fait de même bois que celui qui servit au roi Crompart pour fabriquer le coursier destiné au roi Marcadigas et par lequel Cléomadès fut enlevé¹.

Le manuscrit dont nous publions ici le texte est celui de la Bibliothèque de l' Arsenal, à Paris (Belles-Lettres, n° 475). Peut-être est-il la copie même qui fut présentée par Adenès au comte d'Artois, Robert II. Il est d'une remarquable correction et est précédé d'une grande miniature qui a été plusieurs fois reproduite. Elle représente la reine de France, qui repose sur un lit de parade, la tête appuyée sur sa main gauche et tenant une fleur dans sa main droite. Cette princesse, sur la robe de laquelle on voit figuré le blason de France, parti de Brabant, est accompagnée de deux autres dames assises sur de riches coussins. L'une est Blanche, fille de saint Louis, comme l'indique sa robe au blason de France, parti de Castille; l'autre est Mahaut, fille du comte Robert II, ainsi que le marque sa robe portant les couleurs de l'Artois. Blanche tient la main levée dans l'attitude d'une personne qui parle, et elle a l'air de faire un récit auquel la reine et Mahaut semblent prêter une attention profonde. Adenès, à demi agenouillé devant le lit de la reine et reconnaissable au rebec posé sur son genou, ainsi qu'à la couronne qu'il porte sur la tête comme roi des ménestrels, suit avec recueillement les paroles de la royale conteuse.

Le texte, nous l'avons reproduit dans toute son

¹ KEIGHTLEY, *ouvr. cit.*, p. 69 et suiv.

intégrité. Cependant nous nous sommes permis de restituer çà et là, mais en l'indiquant toujours entre crochets, quelque mot évidemment resté dans la plume du scribe ou altéré par lui, et de donner la préférence à quelque leçon meilleure, fournie par le manuscrit du même poëme qui se conserve à la Bibliothèque Impériale de Paris (n° 7539) et qui a été peut-être exécuté, ainsi que l'autre, sous les yeux du poëte. Toutes les variantes que présentent les deux transcriptions se trouvent scrupuleusement indiquées dans notre édition. Nous y avons ajouté aussi quelques annotations faites par M. Paulin Paris au codice de l'Arsenal; car nous avons tenu à laisser sur ce monument de l'ancienne littérature française en Belgique la marque d'un des hommes qui ont le plus fait pour remettre en honneur les créations du génie du moyen âge.

Bruxelles, 15 décembre 1865.

A. V. H.



CLÉOMADÈS



Fol. 1^{ro}.



- En non de Dieu le créateur
Qui nous doinst, par sa grant douçour,
Que les ames li puissions rendre,
Vorraï à rimoiier entendre.
Je qui fis d'Ogier le Danois
Et de Bertrain qui fu ou bois,
Et de Buevon de Commarchis,
Ai un autre livre rempris
Moult merueilleus et moult divers.
- 10 Diex doinst que tex soit chascuns vers,
Que blasmés n'en soie et repris!
Moult est l'estoire de grant pris
Et à oyr moult gracieuse;
Tant est diverse et merueilleuse,
Que je croi c'onques nus n'oy
Si diverse comme cesti.
Je m'esmay forment de l'emprise
Comment l'aie bien à chief mise;
Mais ce me fait reconforter
- 20 Que me daignierent commander
Que je ceste estoire entendisse
Et à rimer l'entrepreïsse
Deux dames en cui maint la flour
De sens, de biauté, de valour.

Leur nons ne vueil en apert dire :
Car leur pais aim et dout leur ire,
Si que bien sai que je morroie
De duel, se fait ne dit avoie
Riens fors leur plaisir et leur gré.
30 Pour ce seront leur non nommé
Se je puis si couvertement
K'entendre ne puissent la gent
Les nons d'eles quant les liront,
S'on ne leur monstre où li non sont.

La fin de ce livre cerchiés
Se vous les nons trouver cuidiés
Des dames dont m'oés parler ;
Là sont, là les convient trouver,
Là les querés se vous voulés.
40 Bons jours leur soit hui ajornés,
Et demain, et après aussi
Leur aviengne ce que je di.

Diex en ces II dames assist
Tant de bonté quant il les fist
Et de beaulté, k'à souaidier,
I porroit on petit aidier ;
Car il n'i faut, par vérité,
Chose qui afière à biauté.
Sage et courtoise et debonaire
50 Est chacune ; car examplaire
Puet on de tous biens prendre en eles,
Tant par sont et bonnes et beles.

Dès ore mais vueil commencer,
Ceste matere aprochier ;
Car j'en ai tel commandement
Que n'i doi metre longuement.

Moult me tieng à boneüre
Quant tés dames m'ont commandé
De faire chose qui leur plaise ;
60 Liez en doi bien estre et aaise.
Et vous dirai raison pour quoi
Joie de cuer avoir en doi,
Pource que n'ai sens dont seüsse
Venir à chief se je n'eüsse
En leur dous commant pris l'avis
De l'uevre que ie vous devis.

Dames de si très grant hautece
Qu'eles sont, firent gentillece
Quant me daignèrent commander ;
70 Et certes moult en doi amer
Humilité par cui le firent.
Par li fu ce qu'eles me dirent
K'à faire empreisse ce livre.
Diex, se il li plaist, m'en delivre
En tel maniere et en tel point
Que ià de mesdit n'i ait point.
Car seur tous vices, sans mentir,
Doit on le mesdire haïr.
Et à ce a bonne raison ;
80 Car mesdis muet de traïson,
Et cil qui en traïson maint,
Ce sevent bien maintes et maint,
N'a part en Dieu ne Diex en lui.
Or gart Diex de honte et d'anui
Fol. 1 vº. Ceaus qui mainent en loiauté,
Et me doinst par sa volenté
Que je puisse venir à chief
De recorder de chief en chief
La très plus merveilleuse estoire
90 Qui onques fust mise en memoire.

Bien doit estre en autorité,
Pource qu'ele est, de verité,
Estraitte dou tans ancien,
Dès le tans Deoclesien.
Dire le vous vorrai briément ;
Vez en ci le commencement.

Ès estoires dou roi d'Espaigne
Trueve on que uns rois de Sartaigne¹
Fu jadis, qui Caldu² ot non.
100 Poissans fu et de grant renon.
Enfans ot, mais ne sai pas quans ;
Mais bien sai que à celui tans
Ot en Espaigne une pucele
Qui avoit non done Ynabele.
Plus bele ne convenist querre.
Hoirs fu de trestoute la terre
D'Espaigne et de tout le pays.
Sage fu en fais et en dis.

Caldu li rois, qui moult fu ber,
110 La fist requerre et demander
Pour I sien fill, et ainsi vint
Que le mariages avint.
Marcadigas à non avoit ;
Sages et biaux et preus estoit,
Et larges et courtois et frans.
Moult par furent les noces grans,
Car arréées telement
Furent qu'il afiert à tel gent.

¹ Cerdagne.

² Personnage imaginaire comme tous ceux qui vont entrer en scène.

Ne s'entramèrent pas agas
120 Ynabele et Marcadigas ;
Mais comme amis et comme amie
Moult menèrent honneste vie.

Cil d'Espagne moult honorèrent
Roi Marcadigas et amèrent ;
Car moult fu sages et vaillans,
Et à toute honnour entendans,
Et dous et courtois et loiaus,
Et dou cors hardis et vassaus.
A point sot donner et prometre
130 Et largement ens es bons metre.
Une teche en son cuer manoit
Tele que adès li sambloit
Qu'il ne povoit trop honnorer
Les bons, ne trop dou sien donner.

Gent estraitte de vilonnie
N'amoit point en sa compaignie,
Ains i amoit les chevaliers,
Les damoisiaus, les escuiers,
Qui de lignage èrent gentil.
140 Tel gent entour lui amoit il ;
Car tel gent convoitent tousiours
L'onneur et le preu leur seignours.
Tel gent pour leur seignour morroient,
Là où li vilain s'en fuïroient ;
Car li vilains par droit ne crient
Honte quant de vilain lieu vient,
Ne vilain ne sevent cremir
Honte, quant il cuident morir ;
Dont n'afiert pas que li vilain
150 Aient nul grant prince en leur main.

Riches vilains ne serviroit
Jamais, se son preu n'i savoit ;
Car sa nature à ce le coite
Que plus a et plus il convoite.
Pou li touche de quel part viengne
Avoirs, mais k'à son ces¹ le tiengne.
Pour ce, Marcadigas haoit
Les vilains, et gentis amoit ;
Car bien savoit que li gentis
160 Feroit vilonnie à envis.

Li haus hom moult folement oevre
Qu'il grant conseil vilain descuevre ;
Car qui par vilain veut ouvrer
De s'onnour bien doit meserrer ;
Car jà vilain ne loëront
Nule honnour, puis qu'il i verront
Que seur aus en puïst escheoir
Periex, ne de cors ne d'avoir ;
Car pieçà, con dist ce proverbe :
170 « De pute racine pute herbe ; »
Et si redist on à la fois :
« Adès reva li leus au bois. »
Bon fait entour lui avoir gent
Qui aiment miex honnour k'argent.

Cis rois en haute honnour monta
Pource que les gentis ama.
Les bons sot bien vers lui torner
Et moult les sôt bien honnorer ;
Et dou sien largement donnoit,
180 Chascun selonc ce qu'il valoit.
Ainsi le fist cil rois adont ;

¹ Sic. Le Ms. 7539 porte : « Avoir, fors qu'il as mains le tiegne. »

Et, se li roi qui ore sont
Et li prince ainsi le faisoient,
Je croi bien que miex en vaurroient.

De sa femme dirai I mot.
Done Ynabele, qui ainc n'ot
Son cuer saoulé d'onnour faire,
Dame fu de très bon afaire.
Les povres gentis damoiseles
190 Et les orphelines puceles
Et les dames desconseillies
Estoient par li adrecies.
Et leur fist mainte grant bonté ;
Car plaine estoit d'umilité,
Et de pitié, et de douçour,
Et de sens apensé d'onnour ;
Car largece la couronnée
Fu en son cuer enracinée.
Le roi ama moult et chieri,
200 Et li rois l'ama moult aussi.

La premiere année orent il,
Ce tesmoigne l'estoire, I fil,
Tel ainsi com je truis lisant
Que plus preus, ne puis ne devant,
Ne fust trouvez en nul pays
Ne qui d'armes si très grant pris
Fol. 2 1^o. Eüst, ce sachiez, com cil ot,
Sicom la mer la terre clot,
Fors que Judas Macabéus
210 Et Hector de Troies, sans plus.
Mais à ces II n'aatiroie
Nului, k'à envis mentiroie.

Biaus et gens et nobles et nès
Fu, et ot non Cléomadès.

Je ne cuit pas que plus courtois
Veïst onques princes ne rois
Que il estoit, n'en doutés mie
K'ains une seule vilonnie
Ne dist ne ne fist à nului,
220 Tant par avoit franchise en lui
Et fine debonaireté,
Et sens norri en loiauté.
De tout bien fu si entechiés
Que n'i failli riens, ce sachiés.

Si tost que il pot chevauchier,
Le fist ses peres envoier
En Grece et aprendre griïois.
Quant grieu sot, pour savoir tiois
Vint à Couloigne¹ en Alemaigne.
230 Avoec lui avoit grant compaigne
De barons et de chevaliers,
De damoisiaus et d'escuiers,
K'à lui ert bien aferissant
Qu'il menast noble vie et grant.
'A ce tans, c'est verités fine,
Avoit non Couloigne Agrapine.
En cel pays tant demora
Qu'il sot tyois; lors s'en ala
Ou roiaume de France droit
240 Que on adont Gaule nommoit,
Pour aprendre sens et honnour
Et ce qu'il afiert à valour.
Fu lonc tans en celui pays;
Car en es anciens escriis

¹ Cologne, Colonia Agrippina. Cette ville était, à l'époque d'Adenès, un des centres de civilisation les plus importants qu'il y eût dans le nord-ouest de l'Europe. Elle avait une école très-fréquentée, à laquelle le célèbre Albert le Grand fut préposé en 1249.

Trueve on que tousjours a esté
France la flours et la purté
D'armes, d'onnour, de gentillece,
De courtoisie et de largece ;
Ce est la touche et l'examplaire
250 De ce c'on doit laissier et faire.

Tant amenda cil damoisiaus,
Que nus mieudres ne nus plus biaux
Ne fust en nul pays trouvés,
Ne de toutes gens si amés.
En France demoura lonc tans.

N'ai pas nommé tous les enfans
Qu'ot Marcadigas li gentis
De done Ynabele au cler vis.
Trois filles orent, dont l'ainsnée
260 Fu Elyador apelée ;
Et l'autre ot non Feniadisse,
Qui n'estoit ne laide ne nice,
Mais bonne et bele et ensaignie
Si que de tous biens fu garnie ;
Et la tierce avoit non Marine,
Qui tant par avoit biauté fine
Que nature faire le sot.
Qui le fist au miex qu'ele pot.
Si gentement estoit taillié
270 Que se on l'eüst souhaidié ;
Car en li former à droiture
Mist Diex entierement sa cure.
Nature riens n'i oublia ;
Car je croi Diex li commanda.
Pour ce n'i osa oublier
Rien que Diex li volt commander,

Et ele fist si le commant,
Qu'ele fu bele et avenant.

Tant amendèrent et tant crurent
280 Les trois sereurs, que eles furent
D'âge tel que par raison
Peüst chascune avoir baron.
De leur teches vous parlerai
Au plus briément que ie porrai.
Bien vous puis dire au premier mot
Que nule d'eles teche n'ot
Qui ne fust toute de bonté.
Or revenrai à leur biauté
Dont le voir dirai, se ie puis,
290 Selonc ce k'en l'estoire truis.
Si bele en Espagne n'avoit
Que toute la mains bele estoit.
De chascune deviserai
La biauté au miex que porrai.

L'ainsnée fu bele et plaisans,
Sage et courtoise et avenans,
Et de maniere fu et d'estre
Tel comme pucele doit estre.
Cors et membres ot si faitis
300 Que, se à droit le vous devis,
Je ne croi que en li fausist
Rien qui par droit aferesist
'A damoisele noble et gente.
Et s'ert d'assez joene jouvente.
Vint et trois ans ot la pucele.

Or est droit que je vous espele
La biauté de sa suer seconde.
Blanche fu et vermeille et blonde :

Sachiez qu'ele ot XX [et] II ans
310 Et près ert' plus bele II tans
Que cele que i'ai devisée.

Or vous dirai de la mainsnée
Briément : parmi le bois² m'en vois ;
Ce fu la plus bele des trois.
De trestout bien fu ses cuers plains ;
XX ans avoit, ne plus ne mains.

'A mon pover monstré vous ai
De chascune ce que j'en sai.

Dès ore mais seroit saison
320 Que je monstrasse la raison
Por quoi Cléomadès estoit
Si preus que chascun le prisoit
Et que tout s'en esmerveilloient
Cil qui de lui parler oient.
De ce sai bien la vérité.
Moult longuement avoit esté
Li rois Marcadigas en guerre ;
Car tolir li vorrent sa terre
V roi qui à lui marchissoient.
330 Poissant furent, et moult avoient
Seur Marcadigas grant envie,
Pour ce qu'il menoit tele vie,
De la terre que il tenoit,
Que chascuns s'en esmerveilloit.
Pou parloit on se de lui non
Tant par estoit de grant renon ;

¹ Le Ms. porte : « *Et près ele plus bele II tans.* »

² En marge : « *voir Ms. 7539.* » (Note de M. P. Paris). — Ce manuscrit donne ici la variante : « *Parmi le voir m'en vois.* »

Sens, honnour, vallour et noblece,
Humilité, pitié, largece,
Fol. 2 v°. Debonnairété, courtoisie,
340 Ot tous jours en sa compaignie.
Hardis et de seür corage
Fu moult et de fier vasselage.

Li V roi dont je ci parol
Firent que musart et que fol,
Qui monstrèrent leur cruauté
'A home de si grant bonté.
Mais ce fist envie la male
Qui en enfer mainte ame avale.
Par envie enprënt on souvent
350 Ce dont on trop tard se repent.

Cil roi tout ensamble jurèrent,
Sor Marcadigas assablèrent,
Moult longuement le guerrièrent,
Lui et sa gent moult traveillèrent
Et li firent maint grant damage.
Mais, com hom de grant vasselage,
Se tint contre ses anemis.
Mais moult l'orent arriere mis
De sa terre k'essillie orent,
360 Dou pis li firent que il porent
Tout li V roi sans nül deport,
Ni regardoient droit ne tort ;
Car moult avoient grant desir
De leur volenté acomplir.

Et quant rois Marcadigas vit
Qu'il li faisoient tel despit,
Que sa terre à essil metoient
Et sa povre gent destruisoient,

Sachiez que moult près li touchoit.
370 Mai[s] partout estre ne povoit;
Car de toutes pars l'assailloient
Cil cinc roi qui le guerrioient.
Maintes fois leur vint au devant,
Mainte envaye forte et grant
Leur fist Marcadigas souvent;
Car moult deffendoit aigrement
Lui et sa gent et son pays,
Com chevaliers preus et eslis.

Un message as V rois transmist
380 Et de par lui savoir leur fist
K'à I d'aus combatre vorroit
Le quel que il miex lor plairoit,
Ou au plus vaillant de lor gent
Cors à cors, et par tel couvent
Que, se cil à cûi combatroit
Par ses armes le conqueroit,
K'Espaigne lairoit à tous jours
Ne mais n'i seroit ses retours;
Et, se cil est par lui conquis,
390 Qu'il voient fors de son pays.
Ce pour quoi tel chose manda,
Ce fu pour la pitié qu'il a
De sa gent qu'il voit essillier,
Ne n'a pover del adrecier;
Car moult avoient grant pover
Cil V roi, ce sachiez de voir.

Quant li roi ce mant entendirent,
Leur avantage pas ne virent
En ce; car trop estoit vaillans
400 Rois Marcadigas et poissans.
Et pour ce li ont remandé

Que, se bataille à jour nommé
Veut prendre à terme de II mois,
Que chascuns d'aus se tenra quois,
Et que riens ne li forferont
Dusques à tant que il venront
Tout droit au jour de la bataille ;
Car bien cuident que ce lor vaille,
Car bien trois tans de gent avoient
410 Que tout li Espagnol n'estoient.
Marcadigas leur remanda
K'à celui jour se combatra
'A aus, ce sachent par verté.
Donnée en fu la seürté,
Si que ambes II les parties
S'en tinrent très bien apaïies.

En tel point iluec demorèrent,
Et les nouveles s'en alèrent
En maint pays ; tant qu'il avint
420 Que à Cléomadès en vint
La nouvele. Là il manoit
El roiaume de France droit.
Quant cele nouvele oy ot,
Au plus tost que il onques pot
S'esmut pour aler cele part
K'à envis quitteroit sa part
De deffendre ce dont devoit
Estre sires quant Dieu plairoit.

Je croi k'ains hom de si pou d'ans,
430 Selonc le point de celui tans,
Eüst tel force com cil ot
Que XX [et] ¹ V ans sans plus n'ot.

¹ Comme dans le vers 305.

Adont ert pour enfés tenus
Cil qui n'avoit XXX ans ou plus.
De tous jeus où apartenoit
Force et vigour, tous ceaus passoit
Qui de tel jeu s'entremetoient.
Li plusour moult se mervelloient
Que il qui si joesnes estoit
440 Tel force et tel vigour avoit.
'A paines trovast on nului
Plus bel ne plus apert de lui.

Cléomadès tant exploita
Qu'il vint en Espagne droit là
Où li rois ses peres estoit.
Et quant Marcadigas le voit,
Savoir povez, grant joie en ot.
Et quant ses fiex salué l'ot,
Ainsi com il apartenoit,
450 Comme cil qui tout bien savoit,
Droit vers sa mère s'en ala,
Li et ses sereurs salua.

Là endroit fu, bien le sachiez,
Souvent acolés et baisiés.
Moult très grant joie li faisoient
K'en lonc tans veü ne l'avoient.
De sa venue grant joie orent
Cil dou pays quant il le sorent.
Quant leur damoisel ont veü,
460 Si bel, si gent, si par creü,
Si courtois et si afaitié
Que il ert, moult en furent lié.

Quant Cléomadès son point vit
De parler, à son pere a dit

Que il le face chevalier.
De ce ne se veut plus targier
Que chevaliers ne soit sans faille ;
Car estre veut à la bataille :
Ce ne lairoit pour tout l'avoir
470 C'on li porroit ramentevoir .

Fol. 3 r°. Marcadigas li debatoit
Pour ce que trop joesnes estoit ;
Et cil dist bien certainement
Que chevaliers outréement
Sera dedens cele journée
Que la grant bataille est nommée,
Et dist bien qu'il ne s'en tenroit
Pour plain val d'or, s'on li donnoit.

Sachiez k'au roi vint moult à gré
480 Quant vit la bonne volenté
Que ses fiex avoit de bien faire.
Ne l'en volt plus dire contraire,
Ains dist chevalier le fera
Puis que tel volenté en a,
Par si k'en convent li aroit
Que vers les bons larges seroit ;
Car grans princes ne puet avoir
Très haute honnour, tant ait d'avoir,
S'il ne set les bons honnorer
490 Et dou sien largement donner ;
Car ne vaut riens princes eschars,
S'il avoit d'or charchié M chars.
Cléomadès avant passa
Et li dist que larges sera ;
Or ne s'esmait de ce noient
Car il li tenra bien convent.

— « Biaux fiex, dist-il, Diex vous en oie
« Et vous tiengne en la droite voie
« Des bons honorer et servir
500 « Et de leur service merir. »

Tantost fist li rois commander
Que on feïst tost arréer
Cotes de dras d'or et mantiaus
Pour trois cens chevaliers nouviaux,
Et chascun armes et destrier
Veut c'on leur face appareillier
Pour amour de ce k'adouber
Veut son fill et armes donner.

Tost fu la besoigne arréée,
510 Puis que li rois l'ot commandée.
Chevalier furent au tiers jour.
Sachiez que mainte grant honneur
Y ot faite, et maint don donné;
Don n'i furent pas oublié,
Ains i furent bien en saison;
Donné y ot maint riche don.
La feste fu et bele et grant,
Et li jours aloit aprochant
Que la bataille estre devoit.

520 D'ambes II pars vinrent là droit
Où estre devoit la bataille.
Lacié y ot mainte ventaille
Et mainte fort broigne endossée;
Si ot mainte trenchant espée,
Et maint hiaume cler reluisant,
Et mainte ensaigne flamboiant,
Et mainte targe et maint escu,
Et mainte lance à fer agu,

Et maint dart et maint roit espier,
530 Et maint gavelot pour lancier ;
Maint chevalier riche et poissant
Y ot et maint cheval corant.

Cléomades sor I destrier
Séoit fin [et] fort et legier ;
Les armes son pere à label
Portoit, qui moult li sirent bel ;
Et estoient d'un vert dyaspre
Li label, et moult trouvoit aspre
Le cheval sor quoi il séoit ;
540 Si à point afrenés estoit
Que tournans estoit à son gré
Et mouvans tout à volenté.
En armes ert moult bien séans,
Et gracieus et avenans.
Apers ert et amanevis.
Sachiez nel vit pas à envis
Ses peres, mais moult li plaisoit
La maniere k'en lui avoit ;
Car moult ert bien aparissant
550 K'en lui auroit home vaillant.

Ses batailles a ordenées
Marcadigas, et arréées.
Trois batailles fist de sa gent,
Moult les ordena bel et gent,
Bien et à droit leur devisa
Comment l'une après l'autre ira.
En chascune bataille aloit ;
De bien faire les semonnoit.
En la premiere son fill mist ;
560 Tout aviséement le fist,
Car bien à son samblant véoit

Que ses cuers à honnour baoit.

Moult très à droit le chastia.

— « Biaux fiex, fait il, or i parra
« Se hui monsterrés que c'est voirs
« Que d'Espaigne soiez drois hoirs. »

Cléomadès li respondit.

— « Sire, fait il, je vous aï
« Que je ferai tout mon povoir
570 « Que on me tiengne pour vostre hoir ;
« Car, se je faz bien, on dira
« C'est vostre fiex qui fait aura¹ ;
« Et se autre chose en faisoie
« Vos fiex pas à droit ne seroie.
« Et pour ce me vorrai pener
« De non de tel pere sauver.
« Il n'i a que dou chevauchier
« Et des anemis aprochier ;
« Car j'espoir que bien deffendrons
580 « L'onnour que nous tenir devons. »

Quant Marcadigas l'entendi

Trestous li cuers l'en esjoï.

Quant de son fill ot tel confort,

S'il en ot joie, n'ot pas tort.

'A sa gent dist qu'il chevauchassent

Le pas sor frain, et si pensassent

Que cil qui pert son heritage

Par lascheté fait grant folage :

— « Folement se sont embatu
590 « Cil qui ci sont seur nous venu ;
« Car seur nos droit nous deffendons,
« Por quoi Dieu en ayde avons ;

¹ Le Ms. porte : « C'est votre fiex qui ce fait aura. »

« Et, en deffendant son pays,
« Doit chascuns hom valoir aus X
« Ou plus, ce vous di je por voir.
« Au besoing doit li biens paroir.
« Chascuns ait seüre esperance ;
« Car Diex sera en nostre aidance. »

Ainsi sa gent amonnestoit
600 Marcadigas, et chevauchoit
En conroi ordenéement.
Moult chevauchoient noblement.

Fol. 3 v^o. Ce fu à une matinée.
Mainte ensaigne desvolepée¹
Y ot au vent, et maint penon ;
Si ot maint escu, maint blazon
Et maint riche hiaume luisant,
Et maint chevalier desirant
D'acroistre le non lor seignour
610 Et d'aquerre non de valour.
De deffendre leur herités
Sambloit chascuns entalentés.
Sagement et bel chevauchoient,
Com gent qui d'armes duit estoient,
Les batailles l'une après l'autre,
Le petit pas, lance sor fautre,
Escus as couls, hiaumes laciez.

En l'avant bataille estoit chiez
Cléomadès, cui moult tardoit
620 Que l'estours assablés n'estoit.
La seconde après lui sivant
Menerent doi frere vaillant.
Li uns avoit non Fercatas,

¹ Sic. Comp. v. 5429.

Et li autres Helyadas.
Bel et preu et loial estoient.
De guerre ambedui moult savoient.
Li uns portoit armes vermeilles
'A II blanches passans oueilles¹ ;
Li autres teles les portoit,
630 Mais que labiaus² bleus i avoit
Qui moult très bien i avenoient.
Li dui frere moult s'entramoient,
Dont ne faisoient pas folage;
Et cil qui tient cel usage
Font que sage et com avisé.
Souvent en ont esté blasmé
Frere, quant il se descordoient,
Et encore demain feroient.
Bien en doivent estre mains³ fort
640 Frere, quant ne sont d'un acort.
En l'arriere bataille fu.
Marcadigas, qui tant valu
Que nus hom povoit plus valoir.

Or vous vorrai amentevor
De ceaus qui sont à l'autre lés,
Où maint en ot qui bien armés
Estoit, et seur corant destrier.
Mainte baniere baloier
I veïssiez et mainte ensaigne.
650 L'uns d'aus monstre l'autre et ensaigne
La gent Marcadigas venir.
Lors veïssiez les rens fremir.
V batailles faites avoient ;

¹ En marge de ces deux derniers vers, M. Paulin Paris a écrit le mot *Béarn*.

² Lambel.

³ Le Ms. porte : *maint*.

Vers Marcadigas aprochoient
Le passet rengié et serré.

Mais n'ai encor pas devisé
Qui les V batailles guioit.
Chascuns des rois une en avoit.

La premiere ot Garsianis.
660 Cil estoit moult entalentis
De ceaus d'Espaigne faire mal
Et estoit rois de Portingal.
C'ert la bataille ou chief devant.
Espaignol vont moult maneçant,
Et moult leur tarde k'assemblé
Ne sont à aus et ajousté.
Seürement vont aprochant
Les Espaignos, et moult jurant
Que, s'il les truevent, n'iert pas gas.
670 Mar virent roi Marcadigas.
Plain erent d'outrageus bobant.

L'autre bataille après sivant
Menoit li rois Bondars li Gris.
De Gascoigne ert nés et norris,
Et si en estoit rois clamés.
C'estoit de tous li miex montés.
Seur I cheval liart séoit,
Tel que meilleur ne convenoit;
Car fins ert et seür et fors.
680 Pour sus combatre cors à cors,
Ne nol meillour cheval de guerre
Ne trovast on en nule terre.

La tierce bataille guia
Galdas des Mons, qui bien cuida

Celui jour destruire Espaignos.
Mais on dist : « Cuidiers fu uns sos. »
Cil ert sires des Toulousans.
C'ert adont uns roiaumes grans.
De Bourdiaus d'usqu'à Montpellier
690 Ot toute la terre à baillier.
Bien ert sa bataille estofée
De gent noblement arrée.
Bien cuidoient cel jour conquerre
Marcadigas, lui et sa terre.

La quarte bataille menoit
Uns rois qui grant desir avoit
Que li estours fust assablés.
D'Arragonne fu rois clamés,
Et ot non Agambars li Lons,
700 Ainsi k'en escrit le trouvons.
Cil recuidierent moult bien faire
Sor ceaus d'Espaigne lor afaire.

La quinte ot rois Sormans li Rous.
Cil estoit li plus fel d'aus tous
Et qui plus savoit de malice.
Roi fu dou regne de Galice.
Par lui fu premiers commencié
Icele guerre et atisié.

Quels armes orent li V roi
710 Deviserai, si com je croi.
'A droit, si com l'ai entendu,
Garsianis portoit l'escu
Dyaspré de vert et de jaune,
'A une noire teste d'aune ;
Et la teste estoit coronnée
D'une coronne à point ouvrée

De gueules, qui bien i séoit.
Et Agambars li Lons portoit
L'escu d'or palé de vermeill.
720 En toute l'ost n'ot son pareill
De longueur ne de grande taille;
Cil desiroit moult la bataille.
De gueules et de vert partis
Ert li escus Bondart le Gris,
Et i avoit d'or I lion
Passant, à teste de mouton.
Armes portoit moult desguisées
Sormans li Rous, mais devisées
Les vous arai assez briément :
730 L'escu d'or à I vert serpent
Portoit, et ot eles vermeilles
Li serpens, et bleues oreilles;
Et ot aussi la teste bleue,
Et ot blans piés et noire keue :
Fol. 4^{re}. C'erent ses armes, vraiment.
Galdas des Mons l'escu d'argent
Portoit, à trois coronnes noires,
'A I ourle de verdes poires.

Jà avoient tant exploitié
740 D'ambes II pars, et chevauchié,
Que entre aus n'avoit c'un biau plain;
Veöir se porent tout à plain.

Quant les batailles s'entrevirent,
Sachiez que d'ambes pars fremirent.
Cléomadès vit aprochier
Les anemis. Sans plus targier
Dist à sa gent que il brochassent
Et k'à ces premiers assamblassent.
Et, si tost qu'il les ot semons,

- 750 Chascuns feri des esperons.
Mais devant tous, près d'une archie,
S'en venoit, la lance enpoignie,
Cléomadès moult fierement
Comme hom plain de grant hardement.
Le premerain qu'il encontra
De coup de glaive le porta
'A la terre mort estendu.
Dou tronçon a si referu
Un autre, que il l'abati.
- 760 De cel poindre trois encheï
Qui onques puis n'orent santé.
Lors a le bon destrier hurté
Des esperons, et trait l'espée
Qui ert trenchans et acerée.
Enmi les anemis s'embat,
Trenche et coupe, et fiert, et abat
Hiaumes, escus, targes, blazons,
Nés et visages et mentons.
Ne povoit nus hom soustenir
- 770 Les grans coups qu'il povoit ferir.

Tost fu redoutés malement.
Après lui assamblent sa gent
Qui durement conforté sont
De ce que tel chevetaine ont.
Ains qu'il fussent parassamblé,
En ot maint à terre porté,
Qui onques puis ne releva.
La seconde bataille ala
Assamblar moult hardiement,

780 Com gent de grant apensement
Et qui d'armes estoient duit.
Maint arçon i veissiez vuit,
Et mainte resne traynant,

Et maint home à terre gisant.
Fercatas le fist bien ce jour,
Il et ses frères et li lour.

Quant Marcadigas vit sa gent
Assambler si très noblement
Et vit que cil là réusoient
790 Oû sa gent assamblé estoient,
Sachiez que pas ne li desplot.
Si tost que perceüs les ot,
'A sa gent dist : — « Or leur alons ;
Sachiez desconfis les avons. »

Lors veïssiez chevaus brochier,
Escus et targes embracier
Et brandir maint espie trenchant.
Marcadigas trestout devant
S'en venoit la lance en poignie.
800 'A l'assambler : « Castele ! » escrie.
Maint escu percié et troé
Y ot, quant furent ajousté,
Et mainte targe depecie,
Et maint cors de vassal sans vie,
Et mainte lance tronçonnée.
Moult par i ot fiere mellée.
Moult fu la bataille crueuse
Et fiere et aspre et perilleuse.

La bataille en fuie tourna
810 Oû Cléomadès assambla.
Garsianis ert chevetaine
De la bataille premeraine;
C'estoit cele qui s'en fuioit.
Grant noise et grans cris i avoit ;
Mais moult i ot des leur ocis,

Et navrés et à meschief mis,
Ains qu'il fussent à ce mené
Que il fussent dou champ tourné.

Cléomadès tant redoutoient
820 Que ses coups atendre n'osoient.
Et à ce avoit bien raison ;
Car ne puis veïr que nus hon
Peüst ferir coups si despers.
Hiaumes, ne escus, ne haubers
Ne povoit nului garandir,
Puis k'à coup i povoit venir
Que de ce coup ne le tuast
Ou au mains qu'il ne l'afolast.

Cele bataille s'en tourna.
830 En une autre bataille entra
Comme desconfit s'en venoient ;
Car entre leur gens se féroient.
Mais sachiez que Cléomadès
Les sivoit au dos moult de près
Et sa gent après le sivoient
Qui de ses fais merveille avoient.

Que vous iroie je contant
Ne la besoigne pourloignant?
La chose vous acourcerai.
840 Li V roi que nommé vous ai
Des V batailles que il orent
Firent une, si tost qu'il porent.
Estour y ot fier et mortel.
Je cuit k'ainc puis ne vit nus tel
Si aspre ne si assaillant,
Si aigre ne si deffendant ;
Car dou matin jusqu'à la nuit

Ne menerent autre deduit
Fors que toute jour chaploier
850 Et de l'un l'autre damagier.

Sachiez que ne se tint pas quois
Cléomadès à cele fois.
Enmi le tas des anemis
S'estoit, comme chevaliers, mis.
Ou plus dru d'aus s'ert embatus.
Mains en fu par lui abatus
Le jour, et mains deffigurés,
Et mains mors, et mains afolés.

Quant Marcadigas son fill voit
860 Comment les rens fremir faisoit
Et les batailles remuer,
« Castele! » li ot escrier.
Toute la bataille branloit
Au lez là où il se tournoit.
En son cuer en a Dieu loé,
Quant son fruit vit si meuré
Fol. 4 v^o. Et moult plus que devant ama
L'ente qui si fait fruit porta.

Lors se feri Marcadigas
870 Si anemis¹ ou plus grant tas.
Moult durement les assailloit;
Car de très grant vaillance estoit
Et de très grant apensement.
Souvent avoit l'ueill à sa gent.
Quant aucun en véoit retraire,
Ne vous sarois je pas retraire²
Comment les savoit ravoier

¹ Le Ms. porte : *S'anemis*. Comp. v. 951.

² Le Ms. porte : « Ne vous *saroié* je pas retraire. »

Et à droit d'armes ensaïgner.
Quant il véoit qu'il en ert poins,
880 Souvent li ot valu cis poins.
'A paines fust nus si doutiex,
Qui fesist mal devant ses iex,
Tant que il cuidast ne seüst
Que Marcadigas près li fust;
Car en son bon ensaïgement
Prenoient tel apensement,
Que il plus honte redoutoient
Que il à mourir ne faisoient.

Cléomadès point n'arrestoit,
890 Mais tout adès les assailloit.
Roi Agambart ot abatu
'A la terre tout estendu.
Au cheoir si fort se bleça
K'ains puis ce jour coup ne donna;
Mais sa gent l'orent relevé
Et sor son cheval remonté.

'A celui point tout droit avint
Que Galdas des Mons là sorvint.
Entre lui et Bondart le Gris,
900 Sous Cléomadès fu ocis
Ses chevaus à cele venue.
Mais je croi c'onques mais veüe
Fust nule merveille si grant
Com de lui v[e]oir¹ deffendant.
Quant à pié fu en mi aus tous,
Mustiaus et cuissel et genous,
Moult chier comparer convenoit
Ce que ses chevaus mors estoit.

¹ Le Ms. porte : *voir*.

Dou bran qui ert soilliez et tains
910 S'aidoit com chevaliers certains
De prouèce¹ et de seürté
Ét de hardement apensé.
Entour lui si grant parc faisoit
Que nus assaillir nel osoit.
Ce de quoi plus il l'assailloient,
C'estoit de dars qu'il li lançoient.
Près de lui n'osoient aler
Tant se faisoit à aus douter.
Savoir poez qu'il l'ocesissent
920 Moult volentiers, se il pouissent.

Dou rescourre moult se penoient,
Sa gent et grant paine i metoient.
Mais tant erent afebloié
De lui qui estoit mis à pié
Que moult en erent esbahi;
Leur cuer et leur coup amenti²;
Et avoit chascuns tant à faire
Qu'il ne savoit auquel lez traire.

Boudars li Gris estoit montés
930 Seur I cheval qui estoit tés
Que on ne peüst souhaidier
'A fin souhait meilleur destrier.
Et Cléomadès le choisi
Haut et grant et fort et fourni.
Vers lui s'en vint moult fierement,
Le cheval par la resne prent,
Le bran tint qui estoit soilliez
De couper bras et poins et piez
Et d'espandre sanc et cervele,
940 Mainte entraille et mainte bouele,

¹ Le Ms. porte : *prouce*. ² *Amenri*?

En fist espandre aval les chans ;
Car fors ert et li brans trenchans.
Si en feri Bondars le Gris
Que dou coup fu si estordis
K'à la terre chei pasmés;
Et Cléomadès est montés
Seur le destrier fort et isnel,
Cui que il soit lait ne cui bel.
Lors muet à aus com hom irés ;
950 Cui il ataint cil est alés.
Si anemi se desconfirent
Forment quant remonté le virent,
Et li sien sont rasseuré
Quant il le virent remonté.

Marcadigas tout en tel point
Avoit esté droit à ce point.
Sormans li Rous li ot ocis¹
Son cheval, et Garsianis.
Ne vous puis pas tout devise[r] ;
960 Grant paine ot à lui remonter.
Là ses chevaus demora mors ;
Fu un petit navrés ou cors,
Mais n'estoit pas plaie mortés.
Tant ot fait qu'il fu remontés,
Et venoit rescorre son fill
S'on li ot dit en quel perill
Il avoit longuement esté.
Liez fu quant il l'a retrouvé
En autre point qu'il ne cuidoit.
970 En son cuer Dieu en gracioit.
« Castele ! » escrie hautement.
En l'estour rentra fierement.
Lors li vint rois Galdas ; adont

¹ Le Ms. porte : *ocit*.

Des brans entr'acointier se vont.

Moult y avoit fiere mellée.
Souvent fu « Castele ! » escriée.
Mais tant vous di que là endroit
Marcadigas trop pou avoit
Des siens ; car si chargié estoient
980 Que tous les bras plains en avoient
De toutes pars et de tous lez.
Li chevaus sur quoi remontez
Fu Marcadigas li gentis,
Fu là endroit souz lui ocis.
N'est merveille s'il ot anui
Et meschief de cuer, quant souz lui
Fu mors ses chevaus à cele heure.
Galdas des Mons li corut seure,
L'espée ou poing ; car moult desire
990 Forment qu'il le peüst ocire.
Quant Marcadigas se vit mis
'A pié entre ses anemis,
Bien vit que il mestier avoit
De deffendre, et il en faisoit
Son pouvoir à loi de vassal ;
L'espée ou poing rendoit estal
'A guise de hardi sengler.
Qui li veïst esboueler
Chevaus et entour lui ferir,
Fol. 5^{re}. 1000 Bien le deüst à preu tenir.

Sa gent durement se penoient
Dou rescorre et abandonnoient
Moult très hardiement les cors.
Mais tant i ert grans li effors
De leur anemis là endroit
Que trois contre I en y avoit ;

Ce n'estoit pas comparoison.

'A Cléomadès le dist on
Que ses peres ert en tel point,
1010 Et il tantost le cheval point
Des esperons. Lors s'adreça
Droit là où cil li ensaigna
Qui dite l'en ot la nouvele.
L'espée ou poing, criant « Castele ! »
S'en vint droit à cele mellée
Qui estoit fiere et drue et lée.

El plus grant tas moult aigrement
S'embat plains d'ire et de talent
De ses anemis damagier.
1020 'A terre en fist maint trebuchier
Ains que à son pere venist.
Droit devant son pere se mist
Qui bien mestier d'ayde avoit;
Car s'espée brisié estoit
Et ses escus tous découpés
Et ses hiaumes tous descercelés.

Sachiez que tost fu conneüs
Cléomadès quant fu venus
'A cel estour que je vous di.
1030 Tost furent li renc aclari.
Ne se faisoient pas prier
Si anemi de traire arrier.
Li uns sor l'autre s'entassoit
Au lez là où il se traioit;
Car si très perilleus estoient
Si coup, k'atendre nes osoient,
K'armeüre n'avoit durée,
Tant fust forte ne bien ouvrée,

Contre les coups que il féroit.
1040 Pour ce chascuns le redoutoit.

Vers le roi Galdas s'adreça ;
Et Galdas vers lui se torna,
Car moult ert chevaliers hardis
Li rois Galdas, et de grant pris.
Chascuns tenoit le bran haucié.
Tost ot li uns l'autre aprochié.
Si à point l'un l'autre encontrerent
Que les espées s'assenerent ;
Car les coups geterent ensamble.
1050 Mais ainsi avint, ce me samble,
Que l'espée Galdas trencha
Si que l'autre parmi coupa
En la moienne tout parmi ;
La piece à la terre en chei.
Quant Cléomadès vit s'espée
Qui estoit en mi leu coupée,
L'espée forment convoita
Qui la sene ainsi coupée a.
Sachiez qu'il fera son pouoir
1060 S'il puet de cele espée avoir.
Un petit le cheval brocha.
Au roi Galdas les bras geta,
Par la chaienne le saisi
'A quoi li brans d'acier pendi
Que il convoitoit moult forment ;
'A lui le tire telement
Que le roi Galdas reversa
Seur le cheval, et rompue a
La chaienne tout erramment.
1070 L'un et l'autre, si com j'entent,
L'espée et la chaienne aussi
Enporta, pour voir le vous di.

Ne sot pouoir de retenir
Galdas, ainçois convint cheïr
Lui et le cheval en I mont.

Liez fu Cléomadès adont
Quant il ot l'espée conquise
Dont il avoit grant convoitise.
Ressoignie ot l'espée à non ;
1080 Ne croi k'ains mieudre veïst on.

Quant Cléomadès se senti
Dou bran le roi Galdas saisi,
Savoir povez, moult en fu liez,
Et li rois Galdas moult iriez
Quant relevez fu et il voit
Celui que il de mort haoit
Qui de s'espée estoit saisis¹
Moult en fu de cuer abaubis.
Sachiez que mainte grant colée
1090 Fu par Cléomadès donnée
Puis ce di à ses anemis
De l'espée que vous devis.

Galdas des Mons fu remontés.
Mais ains puis le jour ne fu tés
Qu'il tornast vers Cléomadès,
Ainçois eschivoit tout adès
Les lieus là où il le savoit ;
Car moult à redouter faisoit.
Cléomadès le bran d'acier
1100 Tint en son poing, que moult ot chier.
Le premerain qu'il en féri
Jusques ens es dens le fendi.
Tant féri de çà et de là

¹ Le Ms. porte : *Qui de s'espée s'estoit saisis* ; mais, d'après le système du poëte, ce vers serait de neuf syllabes.

Et les rens si aclaroia¹
Que ses peres ot recouvré
Cheval, et l'orent remonté
Sa gent, qui moult grant joie avoient
De ce que remonté le voient.
Une autre espée li baillierent,
1110 'A sa chienne la lierent ;
Car s'espée avoit depecie
En deffendant honnour et vie.
Bien le cuidierent, tel fois fu,
Sa gent dou tout avoir perdu.
Si eüssent il, cest passé²,
Se ses bons fiex n'eüst esté
Qui le rescoust, si com vous di :
Au besoing connoist on l'ami.

Quant Marcadigas vit son fill
1120 Qui l'ot rescous de tel perill,
N'est merveille s'il en fu liez.
Li rois n'est gaires detriiez.
Après ce qu'il fu remontez,
Tantost est en l'estour rentrez.
Tout en combatant, Dieu prioit
Que il de son fill garde soit ;
Car bien voit, se il le perdoient,
Que perdu et alé seroient.
Moult se maintenoit noblement
1130 Marcadigas et fierement.
Fol. 5 v°. Sa gent savoit bel rassamblar
Et de bien faire amonester.
Mains coups fu iluec departis.

¹ Le Ms. porte : *Que les rens si aclaroia.*

² « *Par verté* » variante. (Note de M. P. Paris.) — Cette variante est fournie par le Ms. 7539.

Encor gisoit Bondars li Gris
Droit enz ou lieu où il cheï
Quant Cléomadès l'abati.
De lui rescorre se penerent
Sa gent, tant qu'il le remonterent.
Molt ot esté en pasmoison
1140 K'en lui n'avoit sens ne raison.
Et, quant à lui fu revenus,
Sachiez tout vraiment que nus
Ne l'eüst mené de plus près
Là où seüst Cléomadès;
Car essaié ot malement
Sa grant force et son hardement.
Souvent cele part regardoit
Là où Cléomadès savoit.
Mais de plus près ne l'aprochast
1150 Pour tant escorchier se laissast;
Car qui veïst les rens cerchier
Et ses anemis damagier
Cléomadès en pluseurs lieux,
Bien desist : — « C'est d'armes li diex. »
On pouoit bien, pour voir, jurer
Que tex hom faisoit adouter.

Puis ce di que remonte fu
Cléomadès, et qu'ot tolu
'A Bondars li Gris son destrier,
1160 Firent pou plus que traire arrier
Cil qui leur aversaire estoient.
Peureusement [il] se tenoient¹;
Car Cléomadès si menés
Les ot, puis qu'il fu remontés,
Qu'il estoient de toutes pars.

¹ Le Ms. porte : *Peureusement se tenoient.*

Brisié et derrout et espars.

Cléomadès tant redoutoient
Que devant s'espée fuioient
Com fait aïe devant faucon
1170 Et grue pour l'alerion.
Morir ou cheoir convenoit
Celui qu'il à plain coup féroit.
Ce jour a bien as siens paru
K'en lui avoit force et vertu ;
Car je croi mal leur fust alé
S'il n'eüst là ce jour esté.

Espagnol apertement voient
Que cil de là se retraioient
Aussi com en desconfisant.
1180 Tantost perçoit leur convenant
Marcadigas. Lors escria
As siens : — « Seignor, or i parra
« Se ainsi nous eschaperont ;
« Veoir pouez, desconfit sont. »

Droit après ce I seul petit
Que Marcadigas ot ce dit,
Orent leur anemi torné
Les dos, comme desbareté,
Et s'en aloient qui ains ains.
1190 Lors veïssiez parmi ces plains,
Et parmi mons et parmi vaus,
Grans pourrières et grans enchaus.
Trestous li chans estoit jonchiez
De mors, de navrez, de blechiez,
De nés coupez, de chiés, de mains.
Jambes, piez, bras n'i ot pas mains.
Tant en gisoit de tous costés

Que ce fust à veoir pités.
Tant y ot de mors et de pris,
1200 Que n'i saröie metre pris
Ne somme; tant en y avoit,
Que chascuns s'en esmerveilloit.
Tant avoit li enchaus duré
Que il estoit près k'à vespré.

Lors fist Marcadigas sonner
Ses cors, pour sa gent rassambler.
'A celui tans coustume estoit
Que, si tost com les cors ooit,
Devers leur chief se retraioient
1210 Cil qui les cors oys avoient.
Et cil aussi ainsi le firent.
Leur gens parmi les chans requièrent,
Dont assez mors en y avoit.
Chascuns son ami requeroit,
Et estoit coustume à ce jour
Que cil qui erent vainqueour
Tout droit en ce lieu demoroient
Où la victoire eü avoient.

Li vainqueour là demorerent,
1220 Et li desconfit s'en alerent
Si dolent et si irascu
Com cil qui estoient vaincu.
Tout droit au lieu sont retorné
Dont au matin erent sevré.
Tentes et aucubés et trés
Y ot ne plus ne mains k'assés,
K'à tout leur pouoir i estoient
Venu, pour ce que il cuidoient
La terre d'Espagne conquerre :
1230 Pour ce orent empris la guerre.

Mais entre savoir et cuidance
Sachiez a moult grant differance.
Cuidiers a maint home arrieré,
Et savours maint home alevé.
Puisque savours fait avancier,
Fols est qui se tient au cuidier.
Pou voit on venir à honneur
De gent qui trop soient cuideur.
Grant seigneur, petit, ne moien
1240 Tant a en cuidier fort loien
Que nus desloier ne s'en puet,
Se il conseil croire ne vuet,
Et se ¹ pert si en plusieurs lieus
Que ce est damages et dieus².

Sachiez k'ainsi ert avenu
Que tout V erent revenu
Li roi et arrier retorné,
Moult dolent et moult tormenté.
N'est merveille se dolent erent;
1250 Car le tiers pas ne ramenerent
De ceaus qu'il en orent menez,
Tant en ot en l'estour remez.

Quand cil qui furent eschapé
Furent là endroit rassamblé,
Conseil prirent qu'il s'en fuioient.
Li plus d'aus à ce s'acordoient;
Car, s'il atendent lendemain,
Il seront tous pris à la main
Et honni et destruit et mort.
1260 Au fuir ont pris leur acort,

¹ Le Ms. porte *ce*.

² *Deuil*.

Car deffense i vaurroit petit.
Li V roi s'i sont assentit.

Fol. 6 r°. Tous ont guerpi, tentes et trés.
Chascuns d'aus s'est de là sevrés ;
Car lendemain tant redoutoient
Que là plus demorer n'osoient.
Sachiez que moult pou atendirent
L'un l'autre, quant de là partirent.
Tous ceaus qui n'en porent aler
1270 Convint là endroit demorer ;
Et encore demain feroit
Là où tel besoigne avenroit.
Grant chose a en faire l'estuet ;
Bien savez : qui ne puet, ne puet.

Chascuns des rois tant exploita
Que de là endroit eschapa.
Que vous diroie je lonc conte,
Fust à honneur ou fust à honte,
Ne comment qu'il fust avenu ?
1280 En leur pays sont revenu ;
De leur meschief sont conforté,
En ce que il sont eschapé ;
Car bien sevent tout en apert
Cil qui pert la vie tout pert.
Trop lonc parlement vous feroie
Se de chascun vous devisoie,
Comment ala ne comment vint,
Ne k'à son r'aler li avint.
Chascuns ne fist pas ce qu'il vot,
1290 Ains fist chascuns au miex qu'il pot.

La bataille que je vous di
Fu par I jour de merkedi.

Chascuns cele nuit trespassa
Si comme li tans l'aporta.
En l'ost Marcadigas disoient
Que par Cléomadès avoient
Sauvé trestout entierement,
Vie et honnour et tenement.

'A merveille fu regardés,
1300 La nuit que l'estours fu finés.
De sa très grant poissant valour
S'esmerveilloient li plusour.
Sachiez volentiers le baisast
Sès peres, se faire l'osast,
Pour ce que de cuer l'amoit tant;
Mais n'ert pas chose aferissant.
N'ert merveille se il l'amoit
Pour la bonté k'en lui savoit.

La plaie le roi fu tentée
1310 Et à point remise et bendée.
Lié sont de ce qu[e] il n'i a
Perill, et que très bien garra;
Car li maistre ainsi dit leur ont.
N'est merveille se lié en sont.
Cele nuit fu bele et plaisans,
Car il faisoit si très douz tans
Que se on l'eüst souhaidié;
Ce leur a moult la nuit aidié.

Lendemain, droit à la journée,
1320 Furent leur gent toute arrée
Pour aler au lieu où cuidoient
Les rois qui fuïs s'en estoient,
Ainsi com vous oy avés;
Mais n'i trouverent fors navrés

Et gent qui fuir ne s'en porent.
De ceaus tirent ce que il vorrent
Et ce que il i apartint
Ne sai pas kan qu'il i avint.
Mainte tente, maint paveillon
1330 Et maint tré de riche façon
Trouverent, et moult d'autres biens.
Car n'en avoient porté riens .
Li roi ne cil qui s'en fuioient ;
'A l'eschaper plus entendoient.
Departi fu en pluseurs mains
Cele journée le gaains.
Sachiez que maint coffre effondré
Y ot, et maint sac desciré,
Et mainte bouge decoupée,
1340 Ainçois qu'ele fust deffermée.
Entre argent et joiaus et or
Trouverent moult très grant tresor,
Or en paillole et en tarin,
Maint anel d'or et maint bacin
Trouverent, et maint grant jouel
Qui estoient et riche et bel.
Mainte riche vaisselemente
Touverent, bele et noble et gente,
Pos, hanas et platiaus d'argent ;
1350 Car moult estoient riche gent
Li roi qui s'en erent fuī.

Quant poins en fu, de là parti
Se sont, et arrier retorné
Quant tout orent pris et troussé.

Marcadigas si departi
Le gaaing qui fu fais iki,
K'ains n'en retint IIII besans.

Se il en i eüst X tans,
Si l'eüst il trestout donné
1360 Ceaus qui en avoient sué
Ou hiaume, et leur sanc expandu.
Sages et larges et preus fu.
Dou sien propre tant leur donna
Que chascuns de lui se loa.
En leur pays sont repairié
Riche d'avoir, et de cuer lié
De ce que desconfit avoient
Ceaus qui destruire les cuidoient.

Marcadigas est demorés
1370 De joie riches et comblés.
Son roiaume a bien deffendu.
Il et ses fiex sont revenu
Là où done Ynabele estoit
Et ses filles que moult amoit.
Ne demandez pas se il furent
Conjoy, car estre le durent.

Quant done Ynabele parçoit
Son fill, dont tant de bien avoit
Oy dire les repairans,
1380 Moult fu ses cuers liez et joians ;
Car par son fait erent vaincu
Li autre, et li sien retenu.
De li fu baisiez moult souvent
Et de ses sereurs ensemment.

Cléomadès I veu youa
Tel, que jamais ne finera
De guerroier tous les V rois
Qui orent fait tant de desrois
'A son chier pere par envie.
1390 Ou il i laissera la vie,

Ou il les fera repentir
De ce qu'il cuidierent honnir
Son pere et ceaus de son pays.
Ainsi l'a voué et empris.

Fol. 6 v°. Et sachiez que tout acheva
Le veu, ains riens n'en oubliä.
Mais, ains qu'il le peüst furnir,
Enconvint il maint coup férir
Et mainte grant paine endurer ;
1400 Ne pourquant le fist achever.

Trop i metroie longuement
Se je vous disoie comment
Le veu qu'il fist à chief mena.
Si asprement ceaus guerroia
Qui envers son pere mespirent
Et qui à lui guerre entrepirent,
Qu'il en prist cruel vengeance.
Mais je vous dirai moult briément
La vengeance que il emprist,
1410 Ainsi quel'estoire le dist.

Cléomadès si se prouva
En armes, et si exploita
Que loez fu de ses amis
Et doutez de ses anemis.
Car les V rois qui guerroié
Orent son pere et damagié
Fist tous venir à sa merci
Et furent tout à lui sougi.

Quant à merci furent venu ,
1420 Tel raënçon et tel treü
Li rendirent comme lui plot ;
Ne tout entour la terre n'ot
Prince ne roi ne haut baron

Ne fust en la subjection
De Marcadigas et de lui.
Trop longuement et à anui
Vous tenroie, se recorder
Vous vouloie et tout deviser
Les emprises, les féreïs,
1430 Les batailles, les poigneïs,
Les assaus ne les grans estours
Des chastiaus, des viles, des tours,
Les fuïrs ne les enchauciers,
Les retours ne les raliiers
Qui i furent, ains k'achevée
Fust la guerre ne afinée.
Je ne l'aroie pas conté
En tout le plus lonc jour d'esté.
Mais par Cléomadès avint
1440 Que la guerre à si fait chief vint.
'A paines vous recorderoie,
Jà si pener ne m'en saroie,
La valour qui en lui estoit
Et adès i monteplioit.

C'ert li arbres de hardement
Enracinez d'apensement,
Entez de très haute prouece,
Fueillis d'onnour et de largece,
Floris de bonne volenté,
1450 Fructefiez de seürté,
Assavorez d'umble douçour,
Meürs de force et de vigour.

Sa gent qui avoec lui estoient
Sachiez que si grant cuer prenoient
Es grans fais d'armes qu'il faisoit,
Que chascuns hardis en estoit.

- Li couart hardi devenoient
Quant lez Cléomadès estoient.
Tous cuidoit estre asseürez
1460 Qui lez lui estoit ajoustez.
Ses hardemens et ses avis
Faisoit les siens preus et hardis ;
Et s'en lui hardement avoit,
De tel pouvoir avoec estoit
K'à paines povoit il férir
Nului, nel convenist chér
De son cheval, ou vif ou mort.
Bien durent avoir grant confort
Gent qui avoient tel seignour
1470 Oü tant ot prouece et valour.
Mais de lui ore me tairai ;
D'autre chose vous parlerai.

- Sachiez que droit à celui tans
Ot el regne des Aufricans
Trois rois qui grant richece avoient ;
Car moult très grant terre tenoient.
Li uns de l'autre marchissoit
Moult près, et moult l'un l'autre amoit.
Chascuns savoit moult de clergie,
1480 D'ingromance et d'astronomie ;
Car à celui tans vraiment
Ert coustume communament
Que li grant seignour qui estoient
Adont de clergie savoient
Et savoient de tous langages.
Tex estoit adont li usages.

Les trois rois vous vorrai nommer
Dont j'ai commencié à parler.
L'uns avoit non Melocandis ;

1490 Cil fu sages clers et soutis.
Biaus et gens, nobles et courtois
Fu, et de Barbarie ert rois.
Et l'autres ot non Baldigans;
Cil refu grans clers et sachans.
Et fu moult biaux et bien tailliés,
Nès et courtois et afaitiés.
Plains fu de grant chevalerie.
De Maroc tint la seignorie.

Et li tiers avoit non Crompars;

1500 Cil sot presque tous les VII ars.
Lais et petis fu et boçus.
Iex enfossez et nés camus
Avoit, et si ot courbe eschine
Et le menton sor la poitrine.
Moult fu sages et bien lettrés.
De Bougie fu rois clamés.

Un jour se furent ajourné
Cil troi roi que j'ai ci nommé,
En leur pays, je ne sai ù.

1510 Mai[s] ce dont leur parlement fu
Sai ainsi com l'oy conter.
Moult avoient oy parler
Des trois plus beles Espaignoles
Dont on tenist onques paroles.
Par oïr dire les amoient;
Car ainc veües nes avoient.
'A ce s'assentirent tout troi
Qu'il iroient à grant conroi
Au roi Marcadigas rouver
1520 Ses filles pour aus marier.

Lors s'est rois Crompars avisés
Que laidement ert figurés,

Et pour ce envis li donroit
Cil rois sa fille saroit droit.

- Fol. 7 r^o. « — Seigneur, fait il, n'est pas agas
« Li grans povoirs Marcadigas,
« Car sougit et obéissant
« Sont à lui tout li marchissant
« Par la proece de son fill ;
1530 « Mais qui ore avoit cuer soutill,
« Par quoi peüssions arréer
« Que chascuns peüst presenter
« I jouel de très grant richece
« 'A ce roi qui a tel noblece,
« Je croi que valoir nous porroit. »
Lors dist chascuns bon lor sambloit.

Quant Crompars ot qu'il s'assentoient
'A ce que les joiaus feroient,
Cele chose moult li plaisoit ;

- 1540 Car son avantage i cuidoit.
« — Seignour, fait il, quant fait arons
« Nos joiaus, tout ensamble irons
« En Espagne à ce noble roi.
« Et sachiez bien que je i voi
« Une chose, s'en sui creüs,
« Qui moult nous puet metre au desus.
« Tout ce sai je bien vraiment,
« Et vous dirai raison comment.
« Rois Marcadigas a tel non,
1550 « Que chascuns dist k'ains si preudon
« Ne fu, ne de tel convenance.
« Car tout dient que sans faillance
« Tient kan que en conve[na]nt a ;
« Et pour ce, kant nous venrons là,
« Nos joiaus li presenterons
« Par si cun don de lui arons

« Tel que nous li vorrons rouver ;
« Et il n'a pas le cuer aver,
« Ains l'a si large que, sans faille,
1560 « Nous donra le don, quoi qu'il vaille.
« C'est li poins par quoi miex poons
« Venir à ce k'empris avons ;
« Car, se de lui avons l'otroi,
« Ses trois filles aurons nous troi ;
« Car nous li dirons c'est li dons
« Que nous de lui avoir volons.
« Jà n'i faurons, au mien espoir ;
« Car quan qu'il dist tient on pour voir. »

 Tout troi sont à ce assenti
1570 Que il le feroient ainsi.
Ne vous sai pas bien deviser
Comment il sorent achever
Les joiaus, ne quel terme il mirent
Au faire ; mais si fais les firent
Que nus n'i peüst amender,
Jà tant s'en seüst bien pener ;
Car li desiriers qu'il avoit
D'avoir celes dont tant ooient
Dire de bien à toute gent,
1580 Leur i fist tout entierement
Metre cuers et cors et pensé.
Tant firent que si achevé
Furent li jouel, et si fait,
C'onques puis ne furent si fait.

 Or deviserai les joiaus.
Moult fu chascuns riches et biaus.
Une geline, ce m'est vis,
De fin or fist Melocandis,
Et trois poucines qui sivoient

1590 Cele geline, et si chantoient
Si doucement que il sambloit
Chascun qui chanter les ooit
K'ains n'oy si grant melodie.

Baldigans ne s'oublia mie,
Ains fist un home de fin or
Qui valoit plus d'un grant tresor;
Une trompe en sa main tenoit
Où mainte riche pierre avoit.
En tel maniere ert arréés

1600 Li tromperes et compassés,
Que qui le trompeëur eüst
Trestout certainement seüst
Ke, se nus pourchaçast vers lui
Traïson ne mal ne anui,
Li tromperes trompast tantost
Si très haut, que parmi I ost
Fust bien de toutes pars oys :
Si fais fu com je vous devis.

Or vous dirai dou roi Crompart.

1610 Cil refist grandement sa part;
Car il fist un cheval de fust.
Je ne croi k'ainc puis nus tex fust.
Si faitement le sot ouvrer
Li rois Crompars, et arréer,
Que, quant il vouloit, il estoit
Assez tost où estre vouloit,
Et tout aussi tost retournés
Ert arriere quant c'ert ses grés.

Li chevaus ert tous de benus¹,

1620 Fors tant que desouz et desus

¹ D'ébène. (Note de M. P. Paris.)

Avoit chevilletes d'acier.
Par ces chevilles adrecier
Povoit on faire le cheval,
S'on vouloit, amont ou aval,
Ou par en coste, ou de travers.
Par foi cil cheval fu divers ;
Car, quant on l'avoit esmeü,
Jamais ne l'eüssent veü
Nule gent, ce sachiez de voir,
1630 S'il ne fussent à l'esmouvoir.
Nes cil qui au mouvoir estoient
En petit d'eure le perdoient ;
Car trop plus tost ert esloigniés
Que karrel qui est descochiés.

Or sont li troi jouel nonmé
Qui Marcadigas présenté
Furent, pour ses filles avoir.
Chascuns valoit moult grant avoir.
Gent de petit entendement
1640 Demandent à la fois comment
Tels choses pueënt estre faites
Que je vous ai ici retraites.
Aucun en sont tout esbahi.
Et savez vous que je leur di ?
Je leur di que nigromancie
Est moult merveilleuse clergie ;
Car mainte merveille en a on
Faitte pieça, bien le set on.

Bien savez que Virgiles¹ fist

¹ On sait que, durant une partie du moyen âge, le poète Virgile passa pour un nécromancien extraordinaire et qu'on lui attribua toute sorte d'opérations magiques. Un grand nombre de ces fables furent recueillies par Gervais de Tilbury dans ses *Otia imperialia*, d'où elles passèrent dans les écrits de la plupart des poètes contemporains ou

- 1650 Grant merveille quant il assist
II chastiaus seur II oes en mer ;
Et si les sot si compasser
Que qui l'un des oes briserait
Tantost li chastiaus fonderoit
Où ens on auroit l'uef brisié.
Encor dist on que essaïé
Fu d'un des chastiaus, et fondi.
'A Naples le dist on ainsi.
- Fol. 7 v^o. Encor est là l'autres chastiaus
1660 Qui en mer siet et bons et biaux ;
Si est li oes, c'est verités,
Seur quoi li chastiaus est fondés¹.

Près de Naples un vile a,
Puchole² le claime on pieça,
Où Virgiles fist pluseurs bains
Qui faisoient malades sains,
Et ot seur chascun baing escrit
De quel maladie garit
Estoient cil qui s'i baignoient ;
1670 Par l'escripture le savoient.
Mais sachiez que fisicien,
Qui ont fait maint mal et maint bien,
Depecierent tous les escrits ;
Car ce n'estoit pas leur pourfis.
Encor se de tels bains estoient
Croi je que pou les ameroient.

immédiatement postérieurs, en se grossissant d'une infinité de fictions nouvelles. Voy. SIEBENHAAR, de *Fabulis quæ media ætate de P. Virgilio Mar. circumferebantur*.

¹ Ce fort, appelé le Château de l'Œuf, fut bâti, sous l'empereur Frédéric II, par l'architecte Nicolas de Pise, sur le rocher où se trouvaient autrefois la villa et les viviers de Lucullus.

² Pouzzoles.

- 'A Naples fist il de metal
Seur I piler un tel cheval
Qui chascun cheval garissoit
1680 D'aucun mehaing, se il l'avoit,
Mais con le loiait au piler.
C[e] ay, pour voir, oy conter.
Li mareschal qui lors estoient
Ens ou pays ne gaaignoient
Nule riens à mareschaucier.
Pour ce le firent depecier;
Dont il firent mal et outrage,
Mais trop leur faisoit grant damage.
Je croi qui à Naples iroit
1690 K'encor le cheval trouveroit.
'A Ronme¹ fist, c'est verités,
Virgiles plus grant chose assez;
Car il i fist I mireöir
Par quoi on povoit bien savoir,
Par ymage qu'il y avoit,
Se nus vers Romme pourchaçoit
Ne fausseté ne trayson
De ceaus de leur subjection.
Et fist une mousche d'arain
1700 De quoi encor le pris et ain².
'A Naples cele mousche mist,
Et de tel maniere la fist
Que, tant com la mousche fu là,
Mousche dedenz Naples n'entra.
Mais je ne sai que puis devint

¹ *Sic.*

² *Aim.* Ms. 7539. — Cette dernière forme peut sembler préférable. Mais plusieurs poètes du XIII^e siècle écrivent *ain* pour *aime*, comme on le voit dans le *Roman de la Rose* v. 1979 et v. 4024, et dans le *Roman du Renard*, v. 10241. On trouve encore cette forme dans le *Paradis d'Amour*, de Froissart.

La mousche, ne qu'il en avint.

- Encor Virgiles fist un fu
Qui longuement à Romme fu.
Adès et nuit et jour ardoit,
1710 Grant aise à pluseurs gens faisoit.
Devant ce feu ot I arcier
Qui n'ert ne de fer ne d'acier,
Ains ert de coivre; si sambloit
Qu'il vousist traire ou feu tout droit.
En son front escrites estoient
Lettres qui en ebrieu disoient :
« Qui me ferra je trairai jà. »
Et un musars passa par là
Qui d'un baston l'arcier féri,
1720 Et il traist el feu : s'estaint si
Que ains puis ne fu ralumés.
Ainsi avint, c'est verités.

- Moult ot en Virgile sage homme
Et soutieu; car il fist à Romme
Une chose moult engingneuse,
Moult soutieu et moult merveilleuse.
Briément la vous deviserai,
Au plus adroit que je porrai.
Ne cuidiez pas que ce soit guile;
1730 Car as IIII cors de la vile,
Seur IIII tours de la cité
Qui erent de la fermeté,
Fist IIII grans homes de pierre
De très merveilleuse maniere;
Car fait erent par nigromance
La longueur d'une droite lance.
Erent grant et d'une façon.
Seur chascune tour tout enson

En mist I, quant si fais les ot
1740 Comme lui sist et com lui plot.
En tel maniere fait estoient
Que tout droit adès se tenoient,
Chascuns tous ses membres avoit
Tels com au cors apartenoit.

Or vous dirai que là faisoient
Cil home, ne de quoi servoient.
En la main d'un des homes mist
Virgiles, au jour qu'il les fist,
Une grant pomme de laiton.
1750 Par cele pomme savoit on
Des IIII tans la verité,
Si com de printans et d'esté,
Et de gayn, qui après vient,
Et puis d'yver. Or me convient
K'entendre face clerement
De ces tans le departement.
Pour ce furent li homme mis
Seur les tours que je vous devis.
L'une des tours ot non printans,
1760 La seconde, estés, li plaisans ;
La tierce, gayns, li amés ;
La quarte, yver, li redoutés.
Si tost comme printans passoit
Et li tans d'esté revenoit,
Li hons qui ert desus la tour
De printans, ert de tel atour
Que il getoit droit en la main
Del homme d'esté tout à plain
La pomme que tenue avoit ;
1770 Et li hom d'esté la getoit
Tout droit à l'oume de gayn
Quant ses termes avoit pris fin ;

Et li hom de gayn l'avoit
Tant que ses drois termes venoit ;
Adont la getoit, à ce point,
'A l'oume d'yver tout à point.
Chascune main ert si bendée
De fer et si bien atornée,
Que ele brisier ne pavoit
1780 Quant la pomme à li s'asséoit.

Ainsi aloit, n'i faillist jà,
Cele pomme qui dont fu là ;
Car adès à point s'esmouvoit.
De l'une tour à l'autre avoit,
Ç'ai oy tesmoignier au mains,
Trois milles, pou plus ou pou mains.
Par cele pomme adont savoient
Le droit point quant li tans entroient,
Par la chose que vous devis,

1790 Cil de Romme et cil dou païs

Fol. 8 r°. Et cil de mainte autre contrée ;
Car c'ert chose moult renommée.
Moult longuement dura ainsi
Cele pomme k'ains ne failli
Que ele n'alast à son droit,
De tour en tour, là où devoit.
Mais puiscedi fu essillie
Romme et la chose depecie ;
N'ainc puis ne fu, par verité,

1800 Romme de tel autorité

Que ele à celui tans estoit
Que Virgiles i repairoit.
Ne puis ne fu clers qui refaire
Seüst pomme de tel afaire.
Ou il ne l'osent entreprendre,
Ou il entendent plus aprendre ;

Car convoitise deçoit mout
Clergie et laie gent par tout.
Il en sont pou qui entechié
1810 Ne soient de celui pechié.
De ce ne vueil or plus parler ;
'A autre chose vueil viser.

Moult fit Virgiles de grans fais.
Mais de lui à parler me tais ;
Car se tous ses fais vous disoie
'Trop longuement i meteroie.
Grans clers fu, sages et soutiex,
Virgiles, n'en cuit nus de tiex.
Car il fu tex clers à son tans
1820 Que pou en estoit de si grans.
Encor pert bien à son ouvrage
K'en lui ot soutieu home et sage.
Par l'ueuvre connoist on l'ouvrier,
Ce puet on par droit tesmoignier.

Savez pour quoi j'ai recordées
De ses merveilles et contées ?
Pour ce que vous devez savoir
K'aussi bien porent sens avoir
Li troi roi de merveilles faire ;
1830 Car clerc furent de grant affaire
D'astronomie et d'ingromance,
Car appris l'orent dès enfance.
S'en sorent tant, au dire voir,
Que on n'en porroit plus savoir.

De ce plus ne vous parleroie.
Qui croire m'en veut, si m'en croie,
Et qui ne le veut, si le laist ;
Car dès ore en avant me plaist

Que die, sans longue bargaigne,
1840 Comment li troi roi en Espagne
Porterent le riche present
’A Marcadigas le roi gent.

Quant il se furent arréé
Après ce ont pou sejorné.
Tant ont li uns l’autre attendu
Que ensamble sont revenu.
Lors dist Crompars qu’il loëroit
Se chascun d’aus s’i acordoit,
Que il meüssent si à point
1850 Qu’il venissent là à ce point
Que rois Marcadigas fu nés.
Ce seroit li mieudre d’assés ;
Car trop grant feste celui jour
Font Espagnol pour leur seignour.

— « Et s’à celui jour li rouvons
« Le don que requerre voulons,
« Ce jour plus tost le nous donroit
« Que un autre jour ne feroit.
« La feste iert, vraiment le sai,

1860 « Tout droit le premier jour de may.
« Ce jour fu nés li rois d’Espagne,
« Tout droit en Cales, en Sartaigue ;
« Pieça que j’en sai la nouvele
« Par un marcheänt de Castele
« Qui en ma terre est repairans.
« En mon pays vient tous les ans
« Pour acheter singes et ours
« Et marcheändises plusours. »

— « Je lo que le façons ainsi, »

1870 Dist Melocandis. — « Je l’otri ; »
« Aussi faz je », dist Baldigans ;
« C’est chose bien aferissans. »

Leur afaire ont apareillié
Que n'i ont gaires detriié.
De leur pays, si com moi samble,
Murent li troi roy tout ensamble.
Que vaurroit que je vous diroie
De leur voie, ne conteroie?
Tant firent k'en Espagne furent
1880 Et se maintinrent com il durent
Et com à rois apartenoit.
Marcadigas trouverent droit,
Ainsi com ai dit et conté,
En Espagne, en une cité
Qui moult ert noble et bien séant,
Et a non Sebile la Grant.
Là ont Marcadigas trouvé
Le jour de sa nativité.
Pour ce grant joie et grant baudour
1890 Ot à Sebile celui jour;
Car li haut baron dou regné
Estoient illuec assamblé.

'A ce tans, à coustume avoient
Li grant seigneur que il faisoient
De celui jour qu'il erent né
Grant feste et grant sollempnité.
Et pour ce grant feste faisoient
Li Espagnol; car moult amoient
Marcadigas, lor bon seignour,
1900 Car sages fu et plains d'ounour.
'A Sebile ot maint haut baron
D'Espagne et dou regne environ.
Le jour que cil roi vinrent là,
Auscuns moult s'en esmerveilla
Pour quel raison venu estoient
En Espagne, ne qu'il queroient.

- Cléomadès, comme courtois,
Ala encontre les trois rois
'A tout grant plenté de sa gent,
1910 Et moult les reçut bel et gent,
Et très à point les honnora.
Devant son pere les mena
Qui moult grant joie à son cuer ot
De leur venue, quant le sot.
Moult très bel les sot recevoir ;
Car moult ot en lui de savoir.
Chascuns leur fist honnour et joie
Plus que dire ne vous saroie.
Chascuns regardoit à merveilles
1920 Crompart, qui avoit grans oreilles.
Bouche et visage et iex et nés
Ot tels que miex sambloit maufés
Fol. 8 v°. Qu'il ne faisoit hom terriens.
De biau n'ot en lui nule riens
Dont on se peüst percevoir ;
Ce vous di je bien tout pour voir.
De si diverse taille estoit
Que chascuns s'en esmerveilloit.
Quant virent lor lieu de parler,
1930 Devant le roy vinrent ester.
Cléomadès les compaignoit,
Comme cil qui tous biens savoit.

Melocandis premiers parla
Au roy, et moult biau li moustra
La raison pour quoi il estoient
Là venu, et que il queroient,
Tout belement et par compas.
Tantost ne li descouvri pas
La chose qu'il plus desiroit ;
1940 Car moult à point parler savoit.

Quant au roi ot assez parlé
Si li dist : — « Biau sire, aporté
« Vous avommes de no pays
« Trois joiaus riches et soutis. »

Lors li devise mot à mot
Quel force chascuns joiaus ot.
Et li rois les en mercia ;
Car les joiaus forment prisas,
Car moult furent¹ bien à prisier.

1950 Dist Baldigans : — « Je vous requier
« Sans plus I seul don pour nous trois »
— « Et je le vous doing », dist li rois,
« Puisque venu m'estes veõir ;
« Or n'espargniez pas mon avoir,
« Ne vile k'aie, ne chastel,
« Ne or, ne argent, ne jouel ;
« Mais demandés hardiement,
« Car je vous tenrai bien couvent. »

Quant Crompars l'ot, tost respondi :
1960 — « Sire, la vostre grant merci.
« Liez nous avez fais et joians ;
« Car li dons est riches et grans,
« Sire, que donné nous avés.
« Ainc si biaux dons ne fu donnés.
« Maintenant vous deviserai
« Que jà plus n'en atenderai
« Quel don de vous avoir voulons :
« Vos trois filles vous demandons.
« Pour ce sommes nous esmeü
1970 « De nos pays et ça venu.
« Otroué avés no requeste,

¹ Le Ms. porte : *frent*.

« Drois est que la chose soit preste
« Par quoi nous avez otroiié
« Le don dont nous sommes si lié;
« Quant vous plaira, nous moustrerons
« Les joiaus que dit vous avons. »

Quant Marcadigas l'entendi
Moult courtoisement respondi.
Bien voit que on deceü l'a,
1980 Mais ainc pour ce ne se mua.
Del otroi riens ne li grevoit,
Fors Crompars, qui si lais estoit.
Des autres se passast assés,
Se li rois Crompars ne fust tés
Que vous m'avez oy retraire.
Mais ce li torne à grant contraire.
— « Seignour, fait il, requis m'avés
« Don qui moult est de moi amés;
« Mais sachiez bien pas ne cuidois
1990 « Que vous deüssiez tele voie
« Aler que mès filles requerre.
« Viles, chastiaus, tresors, ou terre
« Cuidai que avoir vousissiez,
« Dont j'estoie joians et liez.
« Si vous pri, se vous tant m'amés,
« Que de ce don me deportés.
« [Je] nel di pas pour ce, sachiez,
« K'assez vaillans gens ne soiez.
« Moult ai oy de bien retraire
2000 « Et de vous et de vostre afaire.
« Mais ne vueil pas k'en I seul jour
« Aient mes trois fillés seignour.
« Plus volentiers, se je povoie,
« 'A trois fois les ¹ marieroie.

¹ Le Ms. porte : *la*.

« Ne vueil pas en I jour passer
« Ma joie de les marier. »

Et cil dient : — « Comment qu'il aille,
« No don voulons avoir sans faille ;
« Car ce k'en couvent nous avés
2010 « Créons bien que vous nous tenrés.
« Miex vorriens estre tout troi mort
« Que dou don nous feïssiez tort. »
Et dist li rois : — « Je vous tenrai
« Couvent, puisque j'en couvent l'ai ;
« Car je ne vueil pas commencer
« 'A mentir, car trop lait mestier
« Y a, et cil qui le maintient
« 'A mauvaise teche se tient.
« Ne rois ne doit pas estre tés
2020 « Que il soit de mentir restés.
« Et chascuns s'en doit bien tenir ;
« Car laide chose est de mentir. »
Quant cil l'oient, joie en ont grant
Le roi en vont moult merciant.

Crompars s'est un pou avant trais,
Qui hideus ert et contrefais,
Mais de clergie avoit grant non.
De Marine a rouvé le don ;
Car bien avoit enquis que ele
2030 Estoit de moult loing la plus bele.
— « Rois, fait il, je vorrai avoir
« Vo mainsnée fille, pour voir.
« L'ainsnée ne vueil pas rouver. »
Bon se fait d'outrage garder.
Et li rois n'a rien respondu,
Moult li desplot que si lais fu
Cil qui sa fille li rouvoit ;

Mais à envis l'en¹ mentiroit.

Lors a Melocandis rouvée
2040 Au roi Marcadigas l'ainsnée,
Et la moienne Baldigans,
Qui moult ert bele et avenans.
Com gent apensée et honneste
Firent, sagement lor requeste.

'A Cléomadès moult desplot;
Mais, pour ce que ses peres l'ot
Otroié, n'i mist contredit,
Fors tant k'à conseil li a dit
Que de cel otroi moult li poise.
2050 Et li rois dist que il s'en coise;
Car ce que en convent leur a,
Ce dist, loiaument leur tenra,
S'il nel perdent par trayson
Ou par aucune mesprison.

Fol. 9^{ro}. — « Une autre fois me garderai
« D'otroier don tant que saurai
« Quel don on me vorra rouver.
« Mais tart en sui à aviser. »

Dist Cléomadès : — « Moult m'anuie
2060 « Que cis hom à ce nés de truie
« Doit avoir Marine, ma suer.
« Sachiez que moult me touche au cuer
« K'ainc ne fu si bele riens née,
« Ci a trop dure destinée.
« 'A envis m'i assentiroie
« Se je pour vous faire l'osoie. »
Dist li rois : — « Faire le convient. »
Adont li consaus le roi vient

¹ *Li mentiroit*, Msc. 7539.

Que Cléomadès ot mandé.

2070 Au roi ont ensamble monstre
Qu'il seroit bon c'on essayast
Les trois joiaus et esprouvast
Pour savoir se tel pover ont
Li jouel k'entendre li font.
Et li rois dist bon li sembloit
Et que bien raison y avoit.

'A Baldigant a li rois dit
Que il feissent sans respit
Les joiaus iluec aporter :

2080 Veoir les veut et esprouver.
Et cil nel ont pas destriié;
Tout tantost i ont envoié.
Et uns vallés trestout errant
Vint as filles le roi courant.
Ces nouveles leur a contées
Ainsi qu'il les ot escoutées.
Ne leur dist pas qu'il ne savoit
Liquels laquele avoir devoit.
Forment en furent esmaries.

2090 Toutes trois sont de là parties;
En une chambre sont entrées,
Et puis si se sont avisées
Qu'eles en tel lieu se metroient
Que tout à plain veoir porroient
Ceaus qui les avoient rouvées
Au roi leur pere et demandées.
Lors fist chascune en coste I huis
De son coutelet I pertuis.
Nus veoir ne les i poveroit

2100 Et chascune par tout véoit.

Les trois rois virent lés leur pere
Près de Cléomadès leur frere.

Melocandis et Baldigans

Chascuns leur sambla moult plaisans
Et courtois, et de tel semblance
Que bien samblent gent de vaillance;
Mais dou tiers sont en grant erreur,
N'i a cele n'en ait paour,
Quant eles le virent si lait,
2110 Si hideus et si contrefait.
Moult desiroient à savoir
Laquele le devoit avoir.
Chascune grant fréour avoit
Qu'ele donnée ne li soit.
N'i ot nule qui miex n'amast
Morir que ce c'on li donnast.

Ainsi par la chambre esgardoient
Les puceles tant qu'eles voient
Aporter les riches joiaus,
2120 La geline et ses pouciniaus,
Et l'oume de fin or massis
Où mains rubis estoit assis,
Et le chevalet de benus :
Tel cheval ne vit ainc puis nus.

Lors fu la royne mandée,
Done Ynabele la senée.
En la chambre le roi entra.
Chascuns des rois la salua.
La royne moult sagement
2130 'A chascun d'aus son salu rent,
Car moult ert courtoise et sachant.
Un petit ot le cuer dolant
Dou don que otroié avoit
Li rois. Mais moult biau s'en passoit.
Son pensé couvroit, comme cele

Qui de maniere ert bone et bele.
Lors s'assist li rois erraument,
Et la royne et l'autre gent.

Quant par la chambre sont assis
2140 Chascuns se taist ; mos n'i fu dis.
Lors a rois Melocandis prise
La geline d'or et l'a mise
En la chambre trestout enmi
Et les trois poucins d'or aussi ;
Et lors si s'est d'une part trais.
Et chascuns se tint tout en pais ;
Car moult durement desiroient
Cil et celes qui là estoient
Celle merveille à esgarder.
2150 Lors commencierent à aler
Tout IIII ensamble maintenant,
Mais la geline aloit devant ;
Aussi com se chascuns fust vis
Aloient, ce leur fu avis.

Quant alé orent ensement
Lors commencierent doucement
Et très plaisamment à chanter,
Et si à point à acorder,
Que je ne croi c'onques oye
2160 Fust si très plaisant melodie ;
Si que trestout s'en esjoïrent
Cil et celes qui les oïrent.
Dist li rois : — « Bien avons trouvé,
« Melocandis, en verité,
« K'ains riens si volentiers n'oy
« Ne si riche jouel ne vi. »

Melocandis à tous plaisoit
Et il et ce que fait avoit ;

Car moult ert biaux et bien tailliez,
2170 Et sages et bien afaitiez.
Moult plot le roy et la royne
Et le poucin et la geline,
Et cil qui les ot aportés
Fu et d'aus et de tous loés.

— « Sire, ce dist Cléomadès
« Moult samble estre courtois et nès
« Melocandis, et de bon sens.
« Ma suer ait, c'est bien mes assens.
« De cestui me tieng apaié :

2180 « Je redout moult pieur marchié. »

— « Voire, ce dist Marcadigas,
« Et si ne tient pas terre agas ;
« Car il est rois de Barbarie,
« Qui est assez grant seignorie.
« Moult me samble bien emploiez
« Li dons qui li est otroiez.

Fol. 9 v^o. « Alez, portez li de par moi,
« Sa demande je li otroi. »

Quant done Ynabele l'entent,
2190 Au roi dist que bien s'i assent,
Et bien li plaist que sa fille ait
Puis que il l'en a le don fait.

Et Cléomadès maintenant
Li dist devant tous, en oïant
Que ses peres li a donnée
Sa fille qu'il a demandée :
— « De tout la vous a otroiie
« Et bien la tient à emploie ;
« Aussi fait ma dame ma mere,
2200 « Puis qu'il plaist ainsi à mon pere,

« Et je m'i assent bien aussi
« Puis qu'il plaist à mon pere ainsi.
« Elyador aurez l'ainsnée,
« Puis que avez cele rouverte. »

Et Melocandis enclina
Vers le roi, et l'en mercia.
Liez fu, car bien i ot raison :
En son cuer fu joie en saison.

Quant Elyador entendi
2210 Que cis avoit l'otroi de li,
Moult en fu lié en son corage ;
Car bien sait que dou mariage
De li et dou lait roi Crompart
Estoit ele quite à sa part.
'A pou que ne failli li cuers
De grant paour à ses II suers,
Si par furent en grant effroi
Pour maistre Crompart, le lait roi.

Lors passa avant Baldigans
2220 Qui moult fu biaux et avenans,
Et dist au roi : — « Je vous present
« Cest home d'or, par tel couvent
« Que, se nus vers vous pourchaçoit
« Trayson, tantost tromperoit,
« N'à nului de vostre lignie.
« Si fais est il, n'en doutez mie,
« Et iert, de ce soiez certains,
« Tant qu'il sera entre vos mains ;
« Et, s'à un autre le donnés
2230 « 'A celui resera tous tés.
« Tous jours pour celui trompera
« Qui vers lui comme sien l'aura ;

« Ce vous vueil je pour voir jurer,
« Nel puis ore autrement prouver. »

Et li rois dist bien l'en créoit
Et que sa fille li donroit.
Done Ynabele de celui
N'ot au cuer ire ne anui,
Et à ce avoit bien raison
2240 Car assez estoit riches hon ;
De Grenate fu rois et sire,
Ainsi l'ai, pour voir, oï dire.

Feniadisse li otroie
Li rois, et cil en a grant joie,
Le roi en encline et mercie.

Or ne fu pas Marine lie,
C'or cuide ele bien entresait
Que li lais rois à femme l'ait.
S'en fu si de dueil acorée
2250 K'à la terre cheï pasmée,
Et ses serours la releverent
Et doucement la conforterent.
Mais confors n'i valoit noient ;
Qu'ele se pasmoit si souvent
Que c'ert pitez à esgarder.
Ne la pvoient conforter
Ses seréurs qui moult s'en penoient,
Mais à chief venir n'en pvoient.
Et Elyador, comme sage,
2260 Envoie à son frere I message
Que à li viengne tost parler
Hasteëment, sans arrester.

Cléomadès i vint errant,
Et, quant il sot le couvenant

Pour quoi sa suer ploroit si fort,
Si li dist qu'ele se confort
Et qu'ele ne s'esmait noient ;
Car il fera, s'il puet, comment
Li rois Crompars pas ne l'ara ;
2270 'A son pover s'en penera.
— « Ainçois, fait-il, vous reponroie
« Et metroie hors de la voie
« Là on ne vous porroit trouver,
« Que le deüssiez espouser. »

De ce que Cléomadès dist
Marine I petit ensousrist.
Triste ot esté et explorée ;
Mais ce l'a moult reconfortée
Que Cléomadès dist li a
2280 Que Crompars pas ne l'auera.
Mais I petit trop longuement
Tinrent iluec lor parlement,
Car, entrues que il là estoient
Et Marine reconfortoient,
Parla rois Crompars en tel point,
Si sagement et si à point,
Que rois Marcadigas li a
Otroié que Marine aura.

Le cheval ot ja receü
2290 Marcadigas et retenu,
Et tant avoit li rois raisnie
'A la royne et conseillie
Que ele li avoit graé
Que il feïst tout à son gré
Et qu'ele bien s'i assentoit
Puis que faire le couvenoit.

- Ne vous puis pas tout deviser
Leur paroles, ne raconter.
Tant firent qu'il orent tout troi
2300 De roi Marcadigas l'otroi
Dou don qu'il leur avoit promis,
Si que jà ot leur joiaus pris ;
Et, quant Cléomadès le sot,
Au plus tost que il onques pot
Vint à son pere tout irés ;
Mais, com sages et avisés,
Sot bien couvrir ire et anui
Quant il en avoit point en lui.
Devant son pere vint ester ;
2310 Moult très bel li prist à moustrer
'A conseil que ne l'oy nus
Fors il et ses peres, sans plus,
Et sa mere qui tant l'amoit
Que plus amer ne le povoit.

- « Sire, fait il, moult me merveil
« Oû vous preïstes tel conseil
« Qui otroiastes à nul fuer
« 'A ce roi Marine ma suer
Fol. 10 r°. « Qui tant est bele et debonnaire
2320 « Que nature la sot miex faire.
« Et rois Crompars par est si lais,
« Si hideus et si contrefais,
« Que je croi que, se ele l'a,
« K'à nul jour mais joie n'aura,
« Ains morra de dueil, ce sachiez ;
« Et ce seroit trop grans meschiez ,
« C'onques ne vi jour de ma vie
« Plus bele ne miex ensaignie ;
« Et vous en avés fait le don
2330 « 'A ce roi qui est sans raison.

« Je ne sai à quoi tex hom vaille ;
« N'est pas hom, ains est devinaille.
« N'est drois que si laide figure
« Ait si très bele créature.
« 'A envis m'i assentiroie
« Se je pour vous faire l'osoie.
« Maintenant sui de li venus ;
« Ains si grans duels ne fu veüs
« Qu'ele a demené puiscedi
2340 « Que ceste nouvele entendî.
« Je vous pri, se vous tant m'amés,
« Que ma suer pas ne li donnés ;
« Se pour moi le voulés laissier,
« Moul't vous en vorroie prier. »

Dist Marcadigas : — « Je li ai
« O'troïé, et je li tenrai ;
« Car drois rois ne doit pas mentir.
« Pour ce li vorrai je tenir
« Couvent, que k'avenir m'en doie ;
2350 « Car pour riens je n'en mentiroie.
« Autrement feroie je mal.
« Et s'ai receü son cheval,
« N'en puis par droit arriere aler
« Se ne me vueil deshonnorer.

Dist la royne : — « Biaux doux fils,
« Moul't devriez vouloir à envis
« Que mon seigneur fust reprové
« Que il eüst fait fausseté.
« Onques ne menti à nului,
2360 « Et non fera il à cestui.
« Puisque avenu est ainsi,
« Couvent leur tiengne, je l'en pri.
« Tous jours reprové nous seroit
« S'en menço'ge trouvez estoit. »

Quant Cléomadès entendi
Le roi, moult li desabeli,
Et plus près dou cuer li toucha
Que par semblant ne demoustra.

— « Sire, ce dit Cléomadès,

- 2370 « Ne savons se cil chevalès
« Est tex qu'il nous fait entendant.
« 'A tout le mains, sachiez avant
« Se ce est veritez ou non
« Qu'il parait de ma suer le don. »

Et li rois dist bien li plaisoit,
Et k'à l'esprouver s'assentoit.

- Lors fu rois Crompars apelez
Qui estoit boçus et pelez.
2380 Bien voit au samblant dou visage
Cléomadès qu'au mariage
Ne fassent pas bien, ce li samble.
Tous li cors de fréour li tremble.
Bien pense qu'il s'en vengeroit
S'en aise et en lieu en venoit.

- Cléomadès dist que savoir
Veut dou cheval se tel povoir
A en lui comme dit leur a.
Dist Crompars : — « Vous le saurez ja.
« Et, se vous voulez esprouver
2390 « Le chevalet et sus monter,
« Assez tost saurez vraiment
« Se je di voir ou se je ment ;
« Et, se trouvez sui en mençongne,
« J'otro c'on me face vergongne,
« Car je l'arai bien desservi. »
Dist Cléomadès : — « Je l'otri ;

« Sus monterai, comment qu'il aille,
« Ce vous ai je en couvent, sans faille.
« Tout maintenant essaierai
2400 « Le cheval, plus n'arresteraï. »
De ce mot fu Crompars moult liez,
Car bien pensoit c'or iert vengiez
De Cléomadès se il puet;
Car de cuer la vengeance vuet,
Car moult crueus et fel estoit,
Sa façon par droit le devoit.

Et lors li tromperes trompa
Pour ce que rois Crompars pensa
Vers Marcadigas trayson.
2410 De la trompe oyrent le son
Cil qui là assamblé estoient;
Mais moult pou garde s'en prenoient
Que Crompars eüst enpensé
Vers Cléomadès cruauté¹.

Au trompeür petit penserent
Et legierement s'en passerent,
Pour ce que cil qui marchissoient
Entour aus leur songit estoient
Et pensoient k'à la mellée
2420 Vers aus n'aroit nus rois durée.
Pour ce le laisserent ester,
Ni orent cure de penser
Qu'il ne doutoient que nus hon
Leur osast faire desraison.

Le cheval maintent en la court,
Et chascun i va et acourt

¹ Le Ms porte : *crauté*.

Pour savoir se ainsi iroit
Cis chevaus que Crompars disoit.
Sele y ot bonne et bien séant
2430 De benus, forte et bien tenant,
Et estriers tels et si faitis
Que s'uns grans hom ou s'uns petis
I montast, trestout à droiture
Fussent à point et à mesure.
Fraint y ot tel qu'il convenoit
Et k'à tel cheval aferoit.

Marcadigas dist à son fill
Qu'il sache s'il y a perill
Ainçois que il soit sus montés.
2440 Dist Crompars : — « Sire, n'en doutés
« Que jamais ne se verseroit
« Cis chevaus, ains va tous jors droit ;
« Tex est li chevaus, sans mentir. »
Cléomadès ne volt souffrir
Que nus sur le cheval montast
Ne la grant merveille essayast
Fors il. Et il [y] est montez ¹,
Et Crompars est avant passez.
Au front dou cheval vint tout droit.

2450 Une chevillete y avoit ;
Fol. 10 v°. Un petitelet la tourna,
Et li chevalès s'en ala
Si très tost, que cil qui le virent
Mouvoir, assez tost le perdirent,
Ne sorent qu'il fu devenus.
S'en fu chascuns tout irascus.

Dist Marcadigas à Crompart :

¹ Le Ms. porte : *Et il est montez*. Nous suivons ici la leçon du Ms. 7539.

— « Faites retourner ceste part
« Le cheval, trop est esloigniez ;
2460 « Il me samble assez essaiez ;
« Je ne quier que on plus l'essait. »
— « Sire, dist Cromptars entresait,
« Je n'ai povoir dou retorner ;
« Car j'oubliai à deviser
« 'A Cléomadès, au partir,
« Comment il porroit revenir.
« Ne m'en souvint s'en fu alés.
« Moul't en sui de cuer tormentés.
« Tant en ai grant ire et contraire
2470 « Que ne le porroie retraire. »

— « Biaux amis, dist Marcadigas,
« Ne sai se vous dites agas
« Ou à certes. Mais, par ma loi
« Ne par la foi k'à mon fill doi,
« Se Cléomadès tost ne r'ai,
« Griément à souffrir vous ferai ;
« Car mais de prison n'isterés
« Si sera ici retornés
« Cléomadès li miens chiers fis ;
2480 « De ce povés estre tous fis.
« Par l'oume d'or savoir puet on
« K'envers moi pensiez trayson.
« Par son tromper le sai et voi ;
« Mais trop à tart m'en aperçoi.
« Bien me doit torner à anui
« Que si mal apensés en fui,
« Que vous meïsmes n'essaiastes
« Le cheval que vous me donnastes. »

Toute la gent fu tormentée
2490 Qui là endroit ert assablée ;

Car bien cudent avoir perdu
Celui qui tant leur a valu.
Par parole moult se deffent
Crompars. Mais ne li vâut noient;
Car il fu menez en prison
Tantost, sans point d'arrestoison.
Dolans fu quant il ot empris
Ce pour quoi Espaignol l'ont pris.

Volentiers se repentesist
2500 De son malice, s'il povist.
Pour ce se fait bon aviser
'A com fait chief on puet torner
De la chose ains c'on l'ait emprise.
Qui lui et s'onour aime et prise
Bien en doit chascun souvenir
Que à honeur bee à venir.

Pour Cléomadès demenoient
Grant duel et moult le regretoient.
Bien le devoient regreter;
2510 Car à son tans n'avoit nul per
K'en lui ot, ce sachiez de voir,
Kan k'en chevalier doit avoir,
Si com de sens et de valour
Et de gentillece et d'onour,
Et de vigour et de pover
Et de tous biens, au dire voir.

Je ne vous saroie pas dire
Le grant duel ne le grant martire
Que menerent ses trois serours.
2520 Pasmées, en lermes, en plours,
Les enporta on toutes trois.
Marcadigas, com sages rois,

Confortoit ses filles, et lui
Ne pourquant, se nus ot anui
Corelment, il l'avoit si fort
Qu'il se haoit plus vif que mort ;
Et ne pourquant si sagement
Confortoit et lui et sa gent,
Que nus hom le povoit plus faire ;
2530 Car moult fu de très bon afaire.

La royne fit duel si fort
Que au sien duel n'ot nul confort.
Sa maisnie l'en ont portée
En sa chambre toute pasmée,
Et l'ont desus son lit couchie
Triste et dolente et esmarie.

Tost fu de joie en duel muée
La gent qui là ert assemblée.

Moult fu Melocandis dolans,
2540 Aussi fu li rois Baldigans ;
Conseil prirent que il iroient
Au roi, et si s'escondiroient
Entre aus II de celui meffait
Que li rois Crompars avoit fait.
Ainsi le firent que vous di.
Marcadigas leur respondi
Que nul mal gré nes en savoit
Ne riens ne leur en demandoit,
Ains se tenoit d'aus apaié ;
2550 Et cil l'en ont moult mercié.

Dist Baldigans : — « Puis que vous dites
« Ce chascuns de nous en est quites
« Et que riens ne nous demandés

« De ce meffait, dont nous donnés
« Le don que nous avez promis. »

Dist Marcadigas : — « Biaus amis,
« Droit a en ce que dit avés.
« Dou don ne quier estre quités,
« Puis que en couvent le vous ai.
2560 « Mais, dus qu'à tant que je saurai
« De mon fill aucunes nouveles,
« Ne sai lequel, laides ou beles,
« Ne vous porrai tenir couvent;
« Quar je cuit bien certainement
« Que mes filles de duel morront
« Se eles leur frere ne r'ont.
« Pour ce n'est raisons k'ens ce point
« Parlons de les marier point,
« K'en ce point pas ne le feroient;
2570 « Pour tant ocire se lairoient. »

Cil voient bien que raison a
En ce que li rois leur monstra.
Lors penserent k'au demorer
Povoient petit conquerer.
Ainsi leur plot que il prenoient
Congié au roi, si s'en iroient.

— « Sire, ce dist Melocandis,
« Nous en irons en nos pays,
« Tant que vous nous remanderés. »
2580 Et li roi dist c'est bien ses grés,
Et que il les remanderoit
Quand verroit que pouns en seroit.
Fol. 11 r°. Et cil li ont en couvenant
Que il revenront à son mant.
De lui se tinrent apaié;

En lermoiant ont pris congié.

Li rois andeus les acola
Au partir. Lors s'en retourna
Dedens sa chambre, à cuer destroit
2590 Pour son fill que tant il amoit.
Bien cuida couvrir son meschief;
Mais il n'en pot venir à chief.
Quant les autres ot confortés,
N'i valut riens, sens naturés,
Ne avis, ne apensemens,
Que, si griés ne fust ses tormens
Pour son fill que tant il amoit,
K'en lui nul confort ne savoit.

Bien cuidoit que il fust perdus.
2600 Droit ert qu'il en fust irascus;
Car bien connoissoit sa vigour
Et sa très grant poissant valour.
Moult fu dolans et esmaris.
Cele part se traist où ses lis
Estoit; tantost sus se coucha
'A tele heure k'ains n'en leva
Dusqu'à tant que nouveles sot
De celui que tant amer pot.
Trop plus que ne vous ai conté
2610 Sont partout dolant et iré.

De là se sont parti li roi.
De la sale issirent andoi.
De la royne pas ne prirent
Congié; car pour ice le firent
Que ele si grant duel faisoit
Que nus à li parler n'osoit.
N' encore pas veü n'avoient

Celes que il avoir devoient.
Savoir povez qu'il les veïssent
2620 Moul't volentiers, se il pouissent;
Mais ce c'on amender ne puet
Savez bien que laisser estuet.

De là endroit sont departi.
Ainsi s'en vont com je vous di.
Dolant furent que mescheü
Au roi Crompart telement fu;
Mais bien virent apertement
Qu'il ot tout aviséement
Le preu Cléomadès tray.
2630 S'en erent triste et abaubi;
Moul't très mauvais gré en savoient
Roi Crompart, et moul't le haoient,
Et bien pensoient k'à nul jour
N'auroient mais à lui amour.
Car par trayson destourbés
Les avoit et dehonnorés;
Car par son meffait esloingnoient
Ce pour quoi là venu estoient.
Sachiez que moul't près leur touchoit.
2640 Chascuns d'aus moul't Crompart haoit.
Souventes fois fu d'aus maudis.
Et Crompars dolans et pensis
Demora, k'amender nel pot;
Maint anui en la prison ot.
Trayson l'ot à ce mené,
Ele et sa serour Fausseté,
Qui mainte gent ont fait anui.

'A tant me tairai or de lui;
Quant tans en iert g'i revenrai.
2650 De Cléomadès parlerai.

Qui seur le chevalet s'en va.
En petit de tans le porta
Si loing qu'il ne sot où il fu.
Lors vit il bien que deceü
L'avoit Crompars et engingnié ;
Mais n'ot pas le cuer esmaïé,
Ains l'ot si ferm en seürté
Com cil où ains n'ot lascheté.
Car au besoing voit on l'avis
2660 Des seürs cuers et des hardis.
Bien voit qu'il n'aura autrement
Confort, s'en son cuer ne le prent.
Et là en pot il assez prendre ;
Car n'en estoit pas à aprendre
Li cuers, ains en ot tant apris
Que li cors en avoit grant pris.
Lors se commence à aviser
C'une cheville vit torner
Crompart, droit ou front dou cheval.
2670 Lors tasta amont et aval
Pour savoir que ce povoit estre.
'A une chevillète à destre
Assena, et il l'a tournée ;
Et li chevaus, sans demorée,
S'est tantost à destre tournés.
Lors tasta au senestre lés ;
Pluseurs chevilles i trouva ;
L'une après l'autre ressaia,
Tant qu'il vit bien qu'il torneroit
2680 Le cheval quel part qu'il vorroit.

Moult durement li abeli
Que la chose trouva ainsi.
De ce dut il bien estre liez ;
Car jamais ne fust repairez

Se il ne se fust avisés
Des chevilles dont vous oés ;
Car par les chevilles aloit
Les chevaus quel part c'on vouloit.
Vers la poitrine retasta,
2690 'A une cheville assena
Qui en tel fourme faite estoit
Que, si tost que on la tournoit,
Li chevaus, tout en arrestant,
Aloit vers la terre avalant,
Si belement et si soué
Com pluie en avril chiet sor blé.

Tant fist que il sot la maniere
D'aler et avant et arriere
Et bas et haut quant il vouloit.
2700 En ce moult se rasseüroit.
Moult volentiers fust revertis
Au lieu dont il ert departis ;
Mais ne sot quel part commencer
Pour vers Espagne radrecier,
Car li chevaus l'ot formené
De ce que si tost l'ot porté.

De ce ne vous esmerveilliez
Se il fu las et traveilliez
K'en une nuit et mains d'un jour
2710 Le porta de si grant radour,
Que il vint en une contrée
Qui ore est Toscane apelée.
Adonc avoit non autrement
Cil pays, mais ne sai comment.

Fol. 11 v°. C'ert un roiaumes moult poissans.
Sires en ert li rois Carmans.

Ce fu uns rois de grant noblece,
De grant povoir, de grant richece.
Femme avoit bonne et bele et sage
2720 Et estraitte de haut lignage,
Et si avoit à non Clarmonde.
N'ot meilleur dame en tout le monde.
Entre done Ynabele et li
N'orent pas à bonté failli;
Car II meilleurs dames n'avoit
Si loing com li siecles duroit.

N'erent orgueilleuses ne fieres,
N'outrageuses, ne bobantieres¹;
En eles manoit courtoisie
2730 Et humilitez la florie.
Est dont florie humilitez?
Oil; et les flours de li [sont] téz²,
Que cil qui en Paradis sont
Des fleurs de li lor chapiaus font.
Les esclices sont de pitié
Et les liures d'amistié.
Tel chapel sont plus avenant
Que cil qui sont fait de bobant,
Ne d'orgueil, ne de gloutenie :
2740 Cil sont chapel de dyablie.

Lonc tans ot esté mariée
Done Clarmonde la senée
Au roi Carmant; mais ainc avoir
Ne porent que I tout seul hoir.
Ce fu une fille; mais ele
Fu de tout le mont la plus bele.

¹ *Beubancières*. Ms. 7539.

² Le Ms. porte : *et les flours de li téz*.

Clarmondine fu apelée.
Plus bele ne fu oncques née;
Plus estoit gracieuse et gente
2750 Que ne soit en may fleur seur ente.

'A celui tans pou savoit on
Roi qui plus fust de grant renon
Comme li rois Carmans estoit
Qui celui roiaume tenoit,
Fors Marcadigas. Mais à lui
Ne doit on comparer nului
Qui à son tans fust rois clamés :
De tous biens les ot tous passés.
'A son tans ne fu si parfaits.
2760 Mais de lui ore à tant me tais.

Cléomadès vit I chastel
En coste I plain, très fort et bel,
Où il ot mainte bele tour;
Bos et rivieres vit entour,
Vignes et praeries grans.
Moult fu li chastiaus bien séans.
La façon dou chastel deïsse,
Mais je dout moult que ne meïsse
Trop longuement au deviser,
2770 Pour ce m'en vueil briément passer.

Dou chastel vous dirai le non.
Miex séant ne vit ains nus hon;
Lors l'apeloit on Chastiau noble.
N'ot tel dusqu'en Costentinnoble,
Ne de là dusqu'en Osteriche
N'ot plus bel, plus fort ne plus riche.
Carmans à ce point i estoit
Que Cléomadès vint là droit.

Forment li sambloit li chastiaus
2780 De toutes pars riches et biaux.

Cléomadès lors s'avisa
Que vers ce chastel se traitra.
Bien pensoit qu'en tel lieu manoiert
Gent qui de grant afaire estoient.
Ce fu si k'après la journée,
Moult faisoit bele matinée;
Car mays estoit nouviaus entrés.
C'est un tans qui moult est amés,
Et de toutes gens conjoys;
2790 Pour ce a non mays li jolis.
Une très grant tour, haute et forte,
Avoit assez près de la porte,
Qui estoit couverte de plonc,
Plate deseure; car adonc
Les faisoit on ainsi couvrir
Pour engiens et pour assaillir.

Cléomadès a avisée
La tour, qui estoit haute et lée;
Lors pense qu'il s'arrestera
2800 Sor cele tour tant qu'il sara,
Se il puet, la certaineté
Quel pays c'est qu'il a trouvé.
Lors a son cheval adrecié
Vers la tour de marbre entaillié.
Les chevilletes si tourna
Que droit seur la tour s'arresta.
Si coiemert s'est avalés
Que seur aigue coie vont nés.

Quant Cléomadès fu venus
2810 Seur la tour, tantost descendus

Est dou cheval. Si esgarda
Une entrée qui estoit là
Par où on povoit avaler
Ou chastel, et par tout aler.
Lors pensa c'u chastel iroit,
Et son cheval iluec lairoit ;
Car moult très volentiers menjast,
Ce sachiez, se il le trovast ;
Mais moult biau deporter se sot
2820 De ce que amender ne pot.

Iluec a laissié son cheval.
Par les degrez s'en vint aval.
Moult noble lieu par tout trouva.
Tant ala de çà et de là
Qu'il est venus en une sale
Qui n'estoit ne laide ne sale,
Mais moult bele et nouviau jonchié.
Une table y avoit drecié
D'yvoire à pierres de cristal.
2830 Tout si fait furent li hestall.
Très blanche nape ot desus mise
Ouvrée de diverse guise.
Sor l'un cor de la table avoit
'A mengier kan k'il convenoit,
Et sor l'autre coron à destre
Ot vin si bon que vins pot estre,
En pos d'or¹ et hanas autés.
Viande et vin i ot assés.

Or est raisons que je vous die
2840 Que cele table senefie,
Ne pourquoi on mis i avoit

¹ Le Ms. porte : *d'os*. Dans le Ms. 7539 on lit : *d'or*.

La viande qui sus estoit
Et le vin et la blanche nape.
Ainçois que li contes m'eschape,
Vous en dirai la verité.
De lonc tans ert acoustumé
Fol. 12 r°. En ce chastel et establi
Que on, II mois en l'an, ainsi
Le faisoit, et ne plus ne mains.
2850 Mays en estoit li premerains ;
Car en ce mois le commença
Cil que cel chose acoustuma
Dès le premier commencement.
Or vous di je certainement
Que li secons estoit gayns
Qu'il fait bon aler es jardins.
Ces II mois, chascune vesprée
Estoit la viande atournée ;
Desus la table la metoient
2860 Et puis le vin, lors s'en aloient
Quant fait l'avoient beneïr
'A leurs prestres au departir.
Pour may et gayn honorer
Fist on cele chose estorer :
Le may pour sa joliveté
Et le gayn pour sa plenté.
Lendemain si tost revenoient
Que leur diex aorez avoient
Selonc le tans qui lors estoit.
2870 De cele viande menjoit
Carmans ou II morsiaus ou trois,
Et puis si bevoit une fois,
Et puis li autre grant seignour
Faisoient ainsi tout entour.

Et, quant il avoient mengié

Entour la table et soulacié,
Adont leur feste commençoit.
Plenté d'estrumens y avoit :
Vièles et salterions,

2880 Harpes et rotes et canons
Et estives de Cornouaille.
N'i failloit estrumens qui vaille ;
Car li rois Carmans tant amoit
Menestreus, que de tous avoit.

O lui avoit quintarieurs,
Et si avoit bons leüteurs,
Et des flaüteurs de Behaigne,
Et des gigueours d'Alemaigne,
Et flaüteurs à II dois.

2890 Tabours et cors sarrazinois
Y·ot. Mais cil erent as chans
Pour ce que leur noise ert trop grans.
N'estoit maniere d'estrumens
Qui ne fust trouvée léens.

Cléomadès, qui fain avoit,
Fu liez quant la table perçoit,
Et pense que il mengera
Puiscedi que il trouve là.
Au chief de la table devant

2900 Ot une fontaine sorjant,
Ouvrée de marbre liois
Plus bele ne vit quens ne rois,
'A IIII lionciaus d'argent
Qui erent ouvré richement,
Par où venoit cele fontaine
Cler sourdant par conduit d'araine ;
Et Cléomadès i lava

Ses mains, et tantost il ala'
Vers la table, se s'i assist
2910 Com cil qui volentiers le fist.

Assez menja tant com lui plot;
Et, quant mengié et beü ot,
Si s'est de la table levez.
Vers l'uis d'une chambre est alés
Qu'il vit un petit entrouvert.
Savoir veut de quoi cis huis sert.
En cele chambre entra errant;
Un grant vilain trouva gisant.
Près ert aussi grans c'uns jaiâns;
2920 Moult ert fel et fiers et poissans
Et outrageus et pou bontables².
En sornon ot non Desrainables
Et en son droit non Rustemans³.
Maus gracieus estoit et grans.
Tout vestus seur I lit dormoit.
De barbe tant ne quant n'avoit;
Car tex fu, ce sachiez de voir,
Que barbe ne devoit avoir.

'A son chevet avoit pendues
2930 Espées, guisarmes, maques,
Misericordes et fauchons,
Et bracheus⁴ et bouclers roöns,
Et une targe navaroise,
Et une grant mache turcoise;
Et si avoit pendu encor
Une arbaleste fait de cor,

¹ Le Ms. porte : *ila va*.

² *Poi doutables*. Ms. 7539.

³ *Tutemans*. Ms. 7539.

⁴ *Targes*. Ms. 7539.

Et un cueure ¹ plain de quarriaus :
En travers parmi ses mustiaus,
I ut un grant hace danoise ².
2940 N'ot pas talent de faire noise
Cléomadès, ains s'avisa
Que il pas ne l'esveillera ;
En coste lui, moult belement,
Passa outre tout coiëment.

Quant le grant vilain ot passé,
Lors a I aloir trespasé
Qui en coste I praël séoit
Où moult de floretes avoit.
Quant au cor de ce praël vint,
2950 Un petitelet coi se tint ;
I huis vit entaillié d'yvoire.
Sachiez que fort seroit à croire
De cel huis com fais il estoit
Qui la façon vous en diroit.

Cléomadès vers l'uis se traist ;
Pour la biauté qui moult l'en plaist.
Une piece l'uis regarda,
Et après à lui le tira
Un pou, et li huis erranment
2960 Ouvri moult debonairement.
Lors est Cléomadès passez
Un pou avant, si est entrés
En une chambre k'ains nus hon
Ne vit chambre de tel façon ;
Car tuit cil qui ainc chambre virent,
Ne de chambre parler oïrent,

¹ *Un coffre.* Ms. 7539.

² Le Ms. porte : *I ut une grant hace danoise.*

Ne virent si très merveilleuse,
Si riche ne si gracieuse.
'A grant merveille riche estoient
2970 Li piler qui la soustenoient.

Plus bele ne vit quens ne rois.
Ne de pilers ne de parois
N'i ot œvre¹ qui entaillié
Ne fust d'uevre triforié².
D'estoires d'ancienneté
I ot il ouvrage à plenté
Qui fu fais de maistres ouvriers.
Or me seroit il bien mestiers
Fol. 12 v^o. Que je fusse si avisés
2980 Que li combles bien devisés
Vous fust de la chambre et adroit
Là où Cléomadès estoit;
Ne pourquant au miex que porrai
La façon en deviserai.

Li combles fu d'uevre esmaillié.
Mainte œvre à point faite et taillié
I ot de diverse coulour.
Li combles fu de tel valour,
Que la disme pas n'en porroie
2990 Recorder, car jà ne saroie.
Mais de tant sai bien la maniere
Del ouvrage que mainte pierre
I ot très riche et precieuse.
Moult fu la chambre deliteuse.
Fenestres teles i avoit
Com à tel chambre apartenoit.

¹ « Pierre » Ms. 7539.

² « Trifoirie » Ibid.

D'yvoire et de benus estoient
Si ouvrées k'à tous plaisoient.

'A piece n'auroie conté
3000 De ce lieu toute la biauté.
Se chascune chose en vouloie
Deviser, trop i meteroie ;
Car, à deviser seulement
La richece dou pavement
De la chambre dont vous oëz
Seroie je tout encombrez ;
Et pour ce le lairai ester,
Car trop metroie au deviser.

Li rois Carmans et la royne
3010 Orent ce lieu pour Clarmondine
Si arréé que je vous di ;
Car il la paramoient si
Que on povoit plus fille amer.
Et, pour le lieu et li garder,
I estoit li grans vilains mis
Qui à l'uis gisoit endormis.

Par dedenz cele chambre entra
Cléomadès. Lors s'arresta,
Tant que il ot bien esgardé
3020 La chambre dou lonc et dou lé.
En esgarder se deduisoit
La grant merveille qu'il veoit.
Clarté de chandoiles i ot
Par quoi bien partout veoir pot ;
Et si estoit jà ajourné,
Par quoi i ot assez clarté.
Sachiez que moult pleü li a
La noblece que il trouva.

- Trois lis vit où ens se gisoient
3030 Trois damoiseles qui dormoient,
Moult beles, cè li fu avis.
Moult erent riches chascuns lis¹
Où eles estoient couchies ;
Courtoises et bien ensaignies
Furent, et de moult grant lignage.
Chascune ert bonne et bele et sage.
L'une d'eles ot non Florete,
Et li autre avoit non Gaiete,
Et la tierce ot non Lyadès.
3040 Moult regarda Cléomadès
Les trois lis, mais ne sot que faire,
Ou aler avant, ou retraire.

- 'A l'autre lés à destre avoit
I autre lit qui tex estoit
Que vous m'orrés jà recorder.
Briément le vous vueil deviser.
Je ne croi k'ains nus hom veïst
Nul si biau lit, ne tant vausist.
D'or ert, et mainte riche pierre
3050 I ot de diverse maniere.
N'erent pas pierres de cristal,
Mais fin rubi oriental,
Esmeraudes ét kamahieu ;
Tels pierres orent là lor lieu ;
Jagonces, toupaces, saphir
Et gros pelles pour l'embelir ;
Car gros pelles blanc d'Oriant
Sont moult gracieus et plaisant
Pour I riche ouvrage acesmer.
3060 Tant parfist cis lis à loer

¹ Le Ms. porte : *Moult èrent riches chascuns des lis.*

K'ainc si riche lit ne vit nus.
I esprevier ot par desus
Qui moult riches et biaux estoit.
Le lit tout entour pourprenoit
Li espreviers que je vous di :
Et, selonc ce que j'ai oy,
Puis je bien pour voir tesmoignier
K'ains nus ne vit tel ne si chier.

La façon en deviserai

- 3070 Au plus adroit que je porrai.
De soie ert ouvrez par maistrerie,
D'uevre cointe, noble et jolie.
Partout avoit chançons escrites,
Les meilleurs et les plus esclites
C'on peüst nule part trouver
Au tans dont vous m'oez parler.
Tout estoient li chant noté,
N'en y avoit nul oublié,
Et s'erent faites si adroit
- 3080 Les lettres, que riens n'i failloit
D'uevre si très fine et riche,
Qu'on ne doit pas tenir à niche
L'ouvrier qui la fist, ne celui
Qui tel le fist faire pour lui.
Dou cele de la chambre issoit
Une main d'or à quoi pendoit
Cil espreviers moult gentement
Et tendoit si faiticement
Que nus n'i peüst amender
- 3090 Jà tant s'en seüst bien pener.

Bien devoit estre cis lis gens
[Et] biaux et riches ; car dedens
Gisoit, si com l'estoire dist,

La plus bele k'ains nus veïst,
Ne je ne croi que mais veïr
Puist nus si bele, au dire voir,
Si k'en l'escrit le truis et voi;
Et vous dirai raison pourquoi.

Puis que Diex le monde forma
3100 Et k'Evain à Adam donna,
Ne fu si bele creature,
Tant par estoit bele à droiture
Que, s'ele peüst departir
De sa biauté pour embelir
Autres qui mestier en euïssent,
En li assez biauté preïssent,
C. ou plus en enbelesist
Et assez biauté retenist.
Et sachiez bien que de plaisance
3110 Par ot si très grant abondance,
Fol. 13 r°. Que nus nel peüst regarder
Cui ne convenist oublier
Anuis et corrous et ahans,
Tant par ert gente et avenans;
Et s'ert si plaine de tous biens
K'en li ne failloit nule riens.

Quant Cléomadès veü a
Ce lit, cele part s'aprocha:
Car volentiers vorroit savoir
3120 Qui si biau lit pavoit avoir
Et qui dedens pavoit gesir.
De ce avoit moult grant desir,
K'ains n'ot veü si riche lit.
Et tant l'aprocha que il vit
La bele pucele dormant.
De plus bele nul ne demant;
Car on ne la porroit trouver

Ne deçà ne delà la mer,
Ne à ce tans ne puis ce di,
3130 Ne devant ce qu'ele nasqui.

De li la taille devisasse
Se je seüsse ne cuidasse
Que je la moitié en pouïsse
Deviser, je l'entrepreïsse ;
Mais je dout tant que je ne faille
'A deviser la noble taille
Et la très grant biauté de li,
Que je forment m'en esbahi.
Et ce n'est pas moult grant merveille ;
3140 Car sa biauté n'ert pas pareille
De riens nule à autre biauté ;
Car d'autant com plus grant clarté
Donne li solaus que la lune,
Ñ se prendroit¹ femme nesune
'A la biauté que ele avoit.
De si loing toutes les passoit,
Qu'il n'i avoit comparison
Ne de taille ne de façon,
Ne de riens k'à biauté afiere,
3150 Ne de gracieuse maniere,
Ne d'estre, ne de contenance,
Ne de riens qui tourt à plaisance.
Et s'estoit li cuer de li tés
Qu'il n'i manoit fors que bontés ;
Et s'estoit fine débonaire.
Tel pucele devoit bien plaire.
X [et] IX ans ot, et plus non.
Clarmondine ot la bele à non.

Un petitelet s'abaissa

¹ Ms. 7539. Le Ms. 175 porte : *Prendoit*.

- 3160 Cléomadès, si esgarda
La pucele qui se dormoit ;
Et, quand Cléomadès la voit
Si plaisamment blanche et vermeille,
De sa grant biauté s'esmerveille
Plus que de riens qu'il veïst onques.
Bien tesmoignoit ses cuers adonques
Que onques mais n'avoit veü
Si bele riens com cele fu.
Lors se pensa que, s'il osoit.
3170 Mout volentiers la baiseroit.
Tant s'enhardi qu'il la baisa
II fois, et ele s'esveilla,
Les iex ouvri en souspirant
Qui mout erent dous et plaisant.
Mout durement s'espauri
Quant I home vit devant li.

Mout s'esmerveilla dont venoit
Cil hons ne quel chose il queroit.
N'ert merveille s'en ot erreur¹ ;

- 3180 Un petit trambloit de paour.
Son douz vis a vers lui torné,
Cléomadès a regardé ;
Bien li sambla k'ains mais damel
Ne vit si plaisant ne si bel.

Cléomadès s'agenoilla
Devant li et la salua ;
Et ele son salu li rent
Et li dist : — « Biau sire, comment
« Estes vous ci endroit venus ?

- 3190 « Folement estes enbatus ;
« Ne sai qui vous i amena,

¹ Ms. 7539. Le Ms. 175 porte : *Paour*.



- « K'ainc mais céens nus hom n'entra
« Dusqu'à tant que fusse levée.
« Irié en sui et tormentée,
« Car fait [m']avez trop grant outrage,
« Se fiex n'estes le roi d'Arcage,
« Qui a [à] non Bleopatris :
« Cil là doit estre mes maris.
« Ses peres Balcabé a non
3200 « Qui moult est rois de grant renon.
« Je ne cuit pas que ce soiez.
« Se c'estes vous, ne le noiez ;
« Car, se vous Bleopatris n'estes,
« Se vous aviëz V^e testes
« N'en porriez vous une porter,
« Ce ne vous quier je jà celer.
« Et mes peres li rois Carmans
« M'a dit, bien a passé II ans,
« K'ou monde si bel home n'a
3210 « Que cil à cui donnée m'a.
« Et je cuit bien que nus fors il
« Ne se metroit en tel peril :
« Et pour ce ne sai que j'en die.
« Voir m'en dites, je vous en prie ;
« Car estre me samblés courtois,
« Et biaux et nobles et adrois,
« Avenans et plaisans et nès. »
— « Bele, ce dist Cléomadès,
« Plus biau de moi sont il assez ;
3220 « Si sui je cil dont vous parlez,
« Et si sui cil qui sans faillir
« Sui tous à faire vo plaisir.
« Pour ce, par fine amour vous pri,
« Ne vous anuit que je sui ci. »

— « Dont me dites, ne soit celé,

« Qui vous a céens amené,
« Ne pour quel raison fait l'avés. »
— « Damoisele, jà le saurés.
« De mon regne sui çà venus;
3230 « Ne sevent que sui devenus
« Cil de la terre et dou pays
« Là où je fui nés et norris.
« Moult vous desiroie à veõir,
« Pour ce que vous devoie avoir;
« Pour ce sui céens embatus.
« Bien croi que ne m'i sache nus.
« Et, puis que veüe vous ai,
« 'A vostre congié m'en r'irai;
« Car ne vueil pas tant demorer
3240 « Que de riens vous doie grever.
« 'A envis vous corrouceroie. »
Clarmondine l'ot, s'en ot joie;
F^o 13 v^o. Car trestout vraiment cuidoit
Que cil là Bleopatris soit.
Tout ce retint pour verité
Que Cléomadès ot conté.

La maniere moult li plaisoit
De Cléomadès. S'avoit droit;
Car de courtoisie et d'avis
3250 Ert la toupace et li rubis.
Moult volentiers l'ot escouté
Et à chief de fois esgardé;
Et, quant ele plus l'esgarda,
Plus li plot et plus le prisä.

Li sens de lui et la biauté
Ont le cuer de li si donté,
Que dou dart se senti atainte
Qui navré en a maint et mainte :

C'est li dars que amours set traire
3260 Ceaus qu'ele veut à li atraire.
Amours à point ce dart lança
K'à I coup II cuers assena.
Cléomadès droit à ce point
Senti son cuer de ce dart point;
Dou dart d'amours, si com moi samble,
Furent andoi navré ensamble.

Quant Clarmondine se senti
En si fait point que je vous di,
Ses damoiseles a huchies
3270 Et eles se sont esveillies.
Chascune moult s'esmerveilla
Pourquoi cil hons ert venus là.
Et Cléomadès, com courtois,
Les salua trestoutes trois;
Mais nule ne l'en respondi,
Tant erent leur cuer esmari.

Cléomadès tantost perçoit
Que sa venue leur pesoit,
Et pour ce tantost s'avisa
3280 Que de cele chambre istera
Tant que eles soient levées;
Bien voit qu'eles sont effrées
Pour ce qu'il estoit venus là.
Et Clarmondine dit li a
Que il ne li tourt à anui
Se eles n'ont parlé à lui;
Car, quant la verité saront
De lui, grant joie li feront.

Moult debonairement li proie
3290 Que point ne se mete à la voie

Si leur ait dite la raison
De sa venue et l'ochoison ;
K'à vergoigne li torneroit
Se chascune bien ne savoit
Pourquoi ne comment il vint là.
Cil dist que ainsi le fera
Ne de là ne se partiroit
Dusqu'à tant que il li plairoit.

Or, sachiez que de ce commant
3300 Ot Cléomadès joie grant ;
De joie tous li cuers li rist.
Après ce mot de la chambre ist.
Si entra en I praëlet
Moult gent et moult noble et moult net,
Où ot mainte diverse flour
Qui getoient très bonne odour.
Là s'est Cléomadès assis,
D'amours alumés et espris ;
Car onques mais n'avoit sentu
3310 Nul dart d'amours tel com cil fu.

Et la pucele s'est levée
Qui noblement fu acesmée ;
Mais, ainçois k'acesmée fust
Ne que de son lit se meüst,
Vinrent à li ses [trois] puceles ¹
Si effrées comme celes
Qui cuidoient estre honnies
Dou roi Carmant et mal baillies ;
Car Clarmondine leur conta
3320 La chose si com ele va

¹ Le Ms. porte : *Vinrent à li ses puceles*. Comp. v. 3030.

Qu'ele n'i a riens oublié ;
Car bien cuidoit, par verité,
Que ce que il dit li avoit
Fust voirs, ensement le créoit.
Celes dient que le vorront
Veïr, et sa parole orront.
Et Clarmondine leur a dit
K'aine si courtois de lui ne vit,
Plus sage, ne plus bel parlant,
3330 Ne plus bel, ne plus avenant.
Forment plus as trois damoiseles
Quant entendirent les nouveles
Que Clarmondine dit leur a.
Chascune d'eles bien cuida
Que ce fust toute verité
Que ele leur avoit conté.
S'en sont auques rassouagies¹ ;
Et, quant furent apareillies,
Trestoutes IIII sont issues
3340 Fors de la chambre, et sont venues
Enz ou praël, là où séoit
Cil qui amours saisi avoit,
Et cele enz ou praël entra
Cui amours aussi saisie a :
Ses puceles furent o li.
Et Cléomadès sus sailli ;
Liez est de ce que venir voit
Cele qui tout son cuer avoit.

Contre li s'en vint sans demeure.
3350 — « Bele, fait il, à très bonne heure
« Puissiez vous hui estre levée. »
— « Biau sire, tele destinée

¹ *Asouagies*. Ms. 7539.

« Vous soit destinée à tous jours
« Que vous aiez joie d'amours. »
— « Damoisele, cil vous en oie
« Qui les amans puet donner joie,
« Et d'amours si grans biens vous viengne
« K'à son servise vous retiengne;
« Car, s'ainsi estoit que je di,
3360 « Dont n'auroit pas amours failli
« Qu'ele n'eüst de son maisnage
« Bele pucele et bonne et sage. »
— « Biau sire, se je tele estoie
« Que vous dites, lie en seroie. »

Cléomadès courtoisement
Les trois puceles erranment
L'une après l'autre salua.
'A chascune moult agréa
La maniere k'en lui véoient ;
3370 Son sens et sa biauté prisoient.
Tout V s'assisent ou praël ;
Ne croi k'ainc nus veïst si bel.
Moult ont Cléomadès trouvé
Courtois et à point emparlé ;
F^o 14 r^o. Car sages fu et entendans,
Et tous jours à honnour tendans,
Et par tout aidier¹ se savoit
Si bien que miex ne convenoit.

Cléomadès couvertement
3380 Enquist, ce n'oublia noient,
Tant qu'il sot bien en quel regné
Li chevaux l'avoit aporté,
Et que cele qu'il amoit tant

¹ Le Ms. porte : *Avoir*. La leçon du Ms. 7539 nous paraît préférable.

Estoit fille le roy Carmant.
De li meïsmes le savoit,
Dont en son cuer grant joie avoit
Que il avoit assis s'amour
En fille à roy de tel valour ;
Car li rois Carmans à ce tans
3390 Estoit des rois uns des plus grans
En tant que de très grant richour
Et de gentillece et d'onnour.
Une piece ensamble parlerent,
D'amoreus iex se resgarderent
Cléomadès et Clarmondine.
Amours en leur cuers enracine ;
Car que plus l'uns l'autre véoit
Plus l'uns l'autre amoit et prisoit.

Tant furent là k'ainsi avint,
3400 Que li vilains cele part vint
Qui ert mis à l'uis pour garder,
Dont ore m'oïstes parler.
Par une fenestre esgarda
Cléomadès qui séoit là.
Li vilains très grant merveille ot
Par où cil hom là venir pot ;
Car bien cuidoit avoir fermées
De cel lieu toutes les entrées.

Moult fu dolans et esbahis,
3410 Et courrouciez et esmaris,
Et jure que mais ne croira
Femme nule, quant cele là
Qui de tous biens avoit le non
A faite tele mesprison.
Bièn pense que ses damoiseles
En orront, s'il puet, gries nouveles.

D'iluec s'en est tournés atant,
Dire l'ala le roi Carmant.
Quant li rois tel nouvele oy,
3420 Sachiez pas ne li abeli;
Corrouciez fu et plains d'anui.
De sa maisnie prent o lui.
Vers le lieu s'en va où estoient
Cil et cele qui moult s'amoient.
Par le pertuis d'une fenestre
Regarda au lés devers destre,
Tant que Cléomadès choisi
Et sa fille lez lui aussi.
Sa fille I chapelet faisoit,
3430 Et Florete les flours cueilloit
Entre li et Cléomadès,
Entre¹ Gayete et Lyadès
Servoient de soie baillier
Pour le chapel faire lier.

Moult durement fu despaisiez
Li rois Carmans et courrouciez
Que uns hom k'ains veü n'avoit
Si privez de sa fille estoit
Qu'ele l'avoit là amené
3440 Sans son seü et sans son gré.
Lors se pense qu'il mandera
Lyadès ; car savoir vorra
Comment ele fu si hardie
Qu'ele a tel chose consentie.
Le grant vilain lors² i envoie
Cui cele chose moult anoie,
Car à garder li ert livrée

¹ *Entruec?*

² Ms. 7539. Le Ms. 175 porte : *Lues*.

La pucele sage et senée.
Ens ou praël s'en vint tout droit.
3450 Quant Lyadès venir le voit,
Trestout erranment s'est levée,
Car moult fu sage et avisée,
Et pensa qu'ele li diroit
La chose, et li descouverroit,
Pour ce que il pas ne cuidast
Que on nul malice i pensast
En ce que là venus estoit
Cet hom qui là trouvé avoit.

Bien se perçut que corrouciez
3460 Estoit li vilains et iriez.
Et il, moult despiteusement,
Li dist : « — Venez hastéement
« Au roi, qui mandée vous a. »
Et cele tantost s'avisa
Pourquoi li rois l'avoit mandée.
Errant est vers le roi alée,
Et l'a en la chambre trouvé.
Melancolieus et iré

Le trouva; mais tout erranment
3470 Li a conté tout l'errement
Si com Cléomadès l'ot dit.
Quant li rois Carmans entendit
Que cil dist que Bleopatris
Estoit, tous en fu esbahis;
Bien sot que n'est pas verités.
Tantôt est ou praël entrés,
Et cil dou praël sus saillirent
Sitost que le roi Carmant virent.

Ne fist pas samblant effréé
3480 Cléomadès; mais salué

A le roi moult courtoisement.
Mais ne li respondi noient
Li rois, ains dist c'om le presist.
Chascuns de sa gent main i mist.
Legierement se lascia prendre
K'ains ne fist samblant de deffendre;
Tout apenséement le fist,
Car deffense pou li vausist.
Quant la pucele a ce veü
3490 Moult en ot le cuer irascu ;
Car ne set pourquoi on le prent,
Com cele qui mal n'i entent.
Devant le roi s'agenoilla ;
Li rois meïsmes l'en leva.

— « Sire, fait ele, ce que doit
« Que vous voulés ici endroit
« Celui faire mal et hontage
« Qui sera, s'il vit, roi d'Arcage ;
« Et si m'avez dit grant pieça
3500 « C'est cil qui à femme m'ara.
« Ce li demonstrez povrement
« Quant pris et lieez l'ont vo gent.
« Pour ce, se venus m'est veoir,
« Ne doit il pas tel honte avoir ;
« Car aussi ait m'ame pardon
« Que il n'i entent trayson,
F^o 14 v^o. « N'il n'en a ouvré fausement. »
Et, quant li rois sa fille entent,
Bien entent que par li n'a mie
3510 Celui emprise¹ sa folie,
Et que moult très grant tort auroit
Cil que de riens l'en mescroiroit².

¹ Le Ms. porte : *Cil a emprise*. Nous suivons ici la leçon du Ms. 7539.

² Ces deux derniers vers manquent dans le Ms. 7539.

— « Fille, ce dist li rois, sachiez
« Ce n'est pas cil que vous cuidiez.
« Onques mais cest home ne vi.
« Grant merveille est dont il vint ci.
« Croire vous faisoit fausseté :
« N'est pas fiex le roi Balcabé.
« Quant il venra en ce pays,
3520 « Tous mes palais verrés emplis
« De rois, de princes, de barons.
« Je croi k'assez tost le verrons.
« Sachiez que cil est un guillerres
« Mauvais et traytres et lerres ;
« Vostre honneur vou vouloit tolir.
« Tart en venra au repentir ;
« Car je le ferai escorchier
« Tout vif, et la teste trenchier,
« Pendre, ou ardoir, ou enfouir :
3530 « 'A l'un ne puet il pas faillir. »

Quant Clarmondine l'entendi,
Près que ses cuers ne li parti ;
Car bien vousist que femme fust
Celui, et k'avoir le deüst,
K'ains n'ot veü, à son avis,
Nul plus courtois, ne miex apris,
Ne si bel, ne si avenant.
Moult li va près dou cuer touchant
C'on l'a en mençonge trouvé
3540 Dont ele cuidoit vérité
Et qu'estre deüst ses maris ;
Dont ses cuers fu si esmaris
K'à la terre cheï pasmée.
De là l'en ont sa gent portée
Moult dolente et moult courroucié
De cuer, et moult forment irié.

Ses puceles la reconfortent.
Tout droit sus son lit l'en reportent
Et li dient : — « Laissez le aler;
3550 « Puis que il nous vouloit guiler,
« N'avons de tel home que faire ;
« Car il n'est pas de bon afaire.
« Encor soit il et biaux et gens,
« C'est un deceveres de gens.
« Puis [que] il est de tel mestier,
« Drois est qu'il en ait son loier. »

'A Clarmondine ainsi parloient ;
Car reconforter la cuidoient.
Mais ce ne li ert nus confors ;
3560 Car ses cuers n'ert pas en son cors,
Et, pui que li cuers n'i entent
Au confort, ce ne vaut noient.
Et comment i entendra
Li cuers, quant il ne sera là
Où on le cuide conseilier ;
Ce ne porroit fructefier.
Avoec Cléomadès fu pris
Li cuers Clarmondine et saisis.

Done Clarmonde est là venue.
3570 Quant la nouvele ot entendue,
De la chose s'esmerveilloit ;
Sa fille moult reconfortoit,
Et li dist que ele avoit tort
Que ele menoit duel si fort
Pour un home que ne savoit
Qui il ert ne dont il venoit.

Lors li a Clarmondine dit
K'ains si courtoise riens ne vit,

Ne de ce nului ne croiroit
3580 Que de bon lieu venus ne soit ;
Car ne porroit estre autrement
Que nus hom de tel escient
K'en lui avoit, fust jà venus
Fors de bon lieu n'en parolt nus.

Sa mere à ce mot se leva
Et pense que veoir vorra
Cel home que tant a prisié
Sa fille. Lors n'a plus targié.
Tantost s'en vint au lieu tout droit
3590 Là où Cléomadès estoit.
En la court l'avoient mené ;
Entour lui s'erent assamblé.

Quant done Clarmonde vint là,
Cléomadès moult regarda.
Bien li sambla que voir ot dit
Sa fille de ce k'en lui vit.
Chascuns li demande et enquier
Quels hons est, où va, ne que quiert,
Ne comment il ert apelez ;
3600 Mais ses nons leur fu bien celez.

Moult à envis se nommeroit
S'autrement eschaper povoit.
'A chascun respont sagement
Et si très apensément,
Que trestout s'en esmerveilloient
De l'avis que en lui véoient ;
Et à ce se tenoit li plus
Que de bon lieu estoit venus
Et que moult grant pechié feroit
3610 Li rois Carmans s'il destruisoit

Si bel home comme cil ert,
Et qui si bien gentiex hom pert;
Et cil qui ce li loëront
Grant mal et grant pechié feront.

Li rois Carmans li demanda
Comment il estoit venus là,
Et pourquoi il avoit empris
'A tolir sa fille son pris
Si bon qu'ele l'avoit eü
3620 Dou tans que ele avoit vescu,
K'ains de nule n'oy parler
Cui il vousist miex ressembler
Se il fust de toutes à chief,
Pour ce li devoit estre grief.

Et, quant Cléomadès l'oy,
Au roi erramment respondi
Que pour ce n'ert pas venus là
N'onques vers li mal ne pensa ;
Et, se nus l'en vouloit rester,
3630 Il seroit tous près de prouver
Si avant que li rois diroit.
Et li rois dist prouvé estoit.
Ne quiert qu'on le prueve autrement ;
Mais volentiers sauroit comment
Ne par où léens venir pot,
Quant nus sa venue ne sot.
Dist Cléomadès : — « Jel diroie
« Se estre creüs en povoie.
F^o 15 r^o. « Sire rois, fait il, entendés.
3640 « Par tout estes moult renommés
« De sens, d'onnour et de raison ;
« Et, pour ce k'avez tel renon,
« Vous dirai comment je ving ci,

- « En espoir de vostre merci.
« Chevaliers sui, c'est verités.
« Destiné me fu, quant fui nés,
« Une chose moult merueilleuse,
« Moult diverse et moult perilleuse.
« Tous jours, au chief de III années,
3650 « Me prennent en mon dormant féés,
« Seur I cheval de fust me metent,
« Moult me maintent, moult me degetent,
« Moult me font de paine endurer;
« Mais je ne le puis amender,
« Car ainsi le convient à estre.
« Une fois me maintent à destre,
« Et à senestre l'autre fois;
« Par mons, par vaus, par chans, par bois,
« En tel point me vont pourmenant,
3660 « L'une heure arriere, l'autre avant.
« Des travaus que me font avoir
« Me font perdre tout mon savoir;
« Car si me maintent rudement
« Que j'en pert tout mon escient;
« Et, pour ce, doi avoir deport
« Quant eschapez sui de la mort.
« Trois jours, ne vous mentirai mie,
« Sui adès en leur compaignie;
« Et, quant ce vient droit au quart jour,
3670 « Seur toute la plus haute tour
« Que à ce point trouver porront
« Me metent, et puis si s'en vont.
« Hui main, si tost qu'il ajourna,
« Me mirent seur cele tour là.
« Sachiez que moult me travaillierent.
« Moi et mon cheval là laissierent.
« Encore i est li chevalès,
« Car celui me laissent adès

- Seur quoi en tel point me travaillent.
3680 Tous jours noviau cheval me baillent.
Or n'aurai mais garde en trois ans
Que j'aie plus de tels ahans.
Et, se de ce ne me créés,
Seur la tour le cheval querés.
S'ainsi n'est que m'oez conter,
Si me faites le chief couper.
Je vous pri que là envoie
Ainçois k'à la mort me jugiez.
Et, se vous voulés, je irai,
3690 Le chevalet apoterai ;
Car, se nus fors je l'aportoit,
Espoir tost le debriseroit,
Car n'en sevent pas la maniere.
Faites moi devant et derriere
'A vostre gent si près garder
Que je ne leur puisse eschaper.
Se il n'est ainsi que je di,
Onques n'aiez de moi merci.
Et, s'en verité trouvez sui,
3700 Ne me faites mal ne anui ;
Car ce seroit maus et pechiez
Se sans raison me destruisiez.

Et li rois dist jà le saura.
Tantost sus la tour envoia
Cléomadès, et de sa gent
Envoia avoec lui granment
Qui moult le guetoient de près.
Seur la tour vint Cléomadès.
Son chevalet trouva tout droit
3710 Ainsi que il laissié l'avoit ;
Devant le roi l'a aporté,
Et li rois l'a moult regardé.

Dou cheval moult se merveilloient
Tout cil qui là endroit estoient.
N'i ot nul esbahis ne fust
Quant virent le cheval de fust.
Li rois forment s'esmerveilloit
De la merveille qu'il véoit.
De grant piece mot ne sonna,
3720 Cléomadès moult regarda.
De Cléomadès ot pité
La royne si que ploré
En ot moult entrues qu'il contoit
Sa besoigne au miex qu'il pövoit
Pour querre tour de delivrance;
Car ne vit pas, à sa semblance,
Que il peüst en lui avoir
Par droit, fors bonté et savoir.

Lors s'est vers le roi aprochie
3730 La royne bien ensaignie.
Moult doucement au roi a dit
Que il eüst de lui mercit.
Tant li dist et tant li pria
Et tant de bons pöins li moustra,
Que li rois l'eüst tout quité
Se ne fust ce qu'il l'ot trouvé
Lès sa fille ou praël séant,
Et ce qu'il li fist entendant
Que estre devoit ses maris
3740 Et que c'estoit Bleopatris;
C'estoit ce qui près li touchoit.
Et à ce bien raison avoit;
Car bien li sambloit que traïr
Volt sa fille et s'ounour tolir;
Et, pour ce, à mort le juoient
Moult de ceaus qui iluec estoient.

Ne pourquant li a demandé
Li rois et forment conjuré
Pour quoi sa fille fist cuidier
3750 K'avoir la devoit à moillier
Et que fiex ert roi Balcabé ;
Voir l'en die, ne soit celé.
Et Cléomadès dit li a
Que la verité l'en dira.

— « Sire, fait il, quant aportés
« Fui seur la tour que vous veés,
« Trestout erramment s'en allerent
« Les fées qui m'i apporterent.
« Là demourai tous esbahis.
3760 « Delez ce chevalet m'assis ;
« Car forment estoie lassez
« Et traveilliez et afamez.
« Quant je fui revenus à moi
« Et un petit reposé m'oi,
« Par une entrée que trouvai
« Jus de la tour m'en avalai ;
« Car moult très volentiers seüsse
« En quel pays, se je peüsse,
« Les fées m'avoient laissié
3770 « Hui main quant d'eles oi congié.
F^o 15 v^o. « Car, seur m'ame, je ne savoie
« En quel pays venus estoie.
« Amont et aval tant alai
« K'en une sale me trouvai
« Qui netement ert atournée
« Et moult gentement arréée.
« Là trouvai la table drecie
« Et blanche nape de liie ;
« Viande et vin i ot assez,
3780 « Et je, qui estoie lassez,

- « En menjai, car grant fain avoie.
« Et lors si me mis à la voie,
« Quant je oi mengié et beü ;
« N'avoie encor nului veü.
« Un huis vi entrouvert I poi.
« Au plus tost que je onques poi
« Entrai en cel huis. Tout errant
« I grant vilain trouvai dormant.
« Lez lui tout coïement passai,
3790 « En la plus bele chambre entrai
« Qui soit el mont, si com je croi ;
« Trois damoiseles devant moi
« Vi qui seur trois lis se gisoient ;
« Bien me sambla qu'eles dormoient.
« En sus de leur lis m'eschiyai,
« Au coron de la chambre alai
« Où il en avoit I des lis,
« Dont je fui trestous esbahis
« De la chambre et de la noblece
3800 « Dou lit et de la grant richece
« Que je de toutes pars véoie.
« Durement m'en esmerveilloie.
« Vostre fille en ce lit trouvai,
« Que fous fis, car je l'esveillai,
« Pour ce que je savoir vouloie
« En quel pays venus estoie.
« Et, si tost que l'oi esveillie,
« Moult durement fu esmarie.
« Lors me dist que moult folement
3810 « Estoie venus telement,
« Et grant outrage fait avoie,
« Se je Bleopatris n'estoie
« 'A cui vous l'aviez otroïie.
« Quant j'oi cele parole oye,
« Je li dis trestout erranment

- « Que j'estoie certainement
« Bleopatris, lors le cuida,
« Et que venus estoie là
« Pour ce que volontiers l'eüsse
3820. « Veüe ainçois, se je peüsse,
« Que li mariages fust fais.
« Or, regardez se c'est meffais
« K'ainc malice n'i entendi,
« Ne je ne vostre fille aussi.
« Mais, pour le bien k'en li trouvai
« Quant en sa chambre à li parlai
« Et pour la biauté que g'i vi,
« M'avisai je de ce tour ci;
« Car à tous jours, se je pousse,
3830 « Avoecques li manoir vousisse
« Depuis que premiers l'oi veüe.
« Mais sachiez très bien que tolue
« Ne li vorrois avoir s'onneur
« Pour plain d'or cele haute tour,
« Ne onques pour li decevoir
« Ne ving ci, se sachiez de voir.
« Mais pour ceste raison cuida
« Que voir deïsse. Lors hucha
« Ses trois puceles erraument,
3840 « Et eles moult hastéement
« Se leverent isnel lé pas.
« Mau gré ne les en sachiez pas;
« Car bien samblerent hors dou sens
« Quant eles me virent léens,
« K'ainc d'eles ne fui respondus,
« Ne pour bon jour ne pour salus,
« Que onques leur seüsse faire,
« Tant avoient ire et contraire
« De ce que léens ere entrés.
3850 « Ireusement fui regardés,

- « De toutes trois. Lors m'en tournai.
« Dedenz I praëlet entrai.
« Quant vi qu'eles durent lever
« N'oi raison de plus demorer.
« Aval le praëlet alai
« Et tant i fui que j'esgardai
« Vostre fille et ses trois puceles
« Qui vers moi venoient com celes
3860 « De ce dont furent corroucies.
« Lors vi bien que tout devisé
« Lor ot vostre fille et conté
« La chose k'entendre li fis.
« Delez li ou praël m'assis.
« Des damoiseles m'acointai ;
« Bonnes et sages les trouvai.
« Ne fusse pas drois chevaliers,
« Ains fusse faillis et laniers,
« Se en tel lieu ne remainsisse
3870 « Si longuement que je pousse,
« Mais n'en quëisse remouvoir.
« Or, vous ai conté tout le voir ;
« N'aine malice n'i entendi,
« Si puisse je partir de ci,
« Et pour ce merci vous requier
« Que ne me faites destourbier
« Ne de mon cors ne de ma vie ;
« Car n'ai pas la mort desservie. »

Quant li rois ceste chose entent,
3880 D'une part apela sa gent
Et son conseil pour demander
Comment il en porra ouvrer.
Li un le juoient à mort.
Aucun disoient c'iert à tort,

Et que grans damages seroit
De tel home s'on l'ocioit.
Plusour dient c'on li coupast
I poing, et puis si s'en alast.
L'uns disoit avant, l'autre arrier.
3890 Grand debat avoit au jugier.
En la fin fu li acors fais
'A ce que il seroit desfais.

Lors dist li rois c'on le pendist
Et que on plus n'en atendist.
Cil commans moult desabeli
La royne quant l'entendi ;
Moult en fu dolente et irie.
De là endroit s'est departie,
Car n'eüst pas de v[e]öir cuer
3900 Que on feïst mal à nul fuer
Celui qui si grant grace avoit
Que nus hom plus avoir pouvoit.

Fol. 16 r^o. Et quant Cléomadès entent
De lui le mortel jugement,
D'un moult sage point s'avisa ;
Au roi Carmant moult biau parla.
— « Rois, fait il, s'en vous a noblece
« Ne droite honnour, ne gentillece,
« Puiscedi k'eschaper ne puis,
3910 « Par gentillece I don vous ruis,
« C'est que vous pas ne me pendez
« Comme larron qui est prouvez ;
« Car les chevaliers ne doit on
« Pas pendre, s'il ne sont larron,
« Ou s'il n'ont par trayson fait,
« Murdre ou autre vilain mesfait.
« Et, puis c'ocire me voulez,

- « J'aim miex estre tous découpez
« D'espées et [de] dars molus ¹
3920 « K'estre comme lerres pendus.
« Et, pour ce, vous requier et pri
« Que seur ce chevalet ici
« Me laissez monter sans estrif.
« Car j'aim autant cestui c'un vif ;
« Et, s'un vif me voulez baillier,
« De tant ferez plus à prisier.
« Si tost que monté me verrez
« Seur quel cheval que vous vorrez,
« Faites me tuer maintenant
3930 « D'armes, et je miex ne demant.
« Puis que je doi mort recevoir
« J'aim miex d'armes la mort avoir,
« Que ne feroie estre enfouis,
« Escorchiez, ou ars, ou boulis,
« Puis que ainsi m'est destiné ;
« Or me faites ceste bonté
« En l'onnour de chevalerie. »

Fol. 16 r^o. Et li rois Carmans l'i otrie ;
Car moult pou li chaloit comment
3940 Cil eüst pris son finement.
Et quant Cléomadès l'oy,
Trestous li cuers l'en esjoy.
Moult sagement les decevoit
En ce k'autre cheval rouvoit ;
C'ert pour ce que on ne cuidast
Que son cheval plus convoitast
Que il I autre ne feïst.
Tant parla au roi et tant dist,

¹ Le Ms. porte : *D'espées et dars molus*. Ce vers ne compte que sept syllabes.

Et si sagement exploita,
3950 Que li rois congié li donna
De monter seur son chevalet.
Et lors s'assemblerent vallet
Et plusours gens de maintes pars
'A espiex, à lances, à dars,
'A espées et à bastons ;
Grosses pierres en leur girons
Prendoient aucun pour ruer.
Cléomadès ala monter
Seur son cheval si tost qu'il pot
3960 Quant dou roy le congié en ot.

Liez fu quand il se sent montez,
Car bien sot qu'il fu eschapez.
Lors n'atendi pas longuement,
Ains mist la main apertement
Au front dou cheval, et tourna
La cheville, et lors s'en ala
Li chevaus à tout lui errant,
Si très tost parmi l'air fendant,
K'à merveilles s'en esbahirent
3970 Cil qui de là partir lé virent.
Moult se tinrent pour deceü
Quant ainsi eschapez lor fu.
Li uns vers l'aultre regardoit.
Chascuns si esbahis estoit
Que il ne savoient que dire ;
Corroucié furent et plain d'ire.

Dist li rois : — « Bien nous a tray
« Cis hom qui nous eschape ainsi ;
« Malement nous a deceüs
3980 « Quant ne savons qu'est devenus. »

Dirent sa gent : — « Sire, sachiez,
« N'est pas hom, jà ce ne cuidiez ;
« Miex créons que ce soit maufez
« Qui fors d'enfer soit eschapez
« Et se soit mis en guise d'onme.
« N'est pas hom mortex, c'est la sonme ;
« Car nule riens ainsi n'iroit
« Se dyables d'enfer n'estoit. »

Ainsi entre aus se derusoient.

3990 De plus en plus s'esmerveilloient.

Et Cléomadès s'en ala,
Qui moult très petit aconta
Se il furent lié ou dolant.
'A ce aloit petit pensant ;
Car tout adès li souvenoit
De Clarmondine, et bien baoit
Li à reveoir temprement.
Quant Clarmondine sot comment
Cléomadès d'aus eschapa,

4000 En son cuer joie en demena
Et en gracia asés Diex¹,
Car moult l'en aleja ses diex².

Comment que il s'en soit alez,
De ce n'iert jà ses cuers ostez
Qu'il puist estre que hom si fais
Venist onques de lieu mauvais ;
Si gens, si nobles, si plaisans,
Si biaux, si courtois, si sachans,
Fors que de bon lieu ne venoit.

4010 Dou tout à ce point se tenoit.

¹ *Et forment en gracia Diex.* Msc. 7539.

² Deuil.

De lui encore reveoir
N'avoit pas perdu son espoir.

Cléomadès qui s'en aloit
Le cuer Clarmondine enportoit;
Le cuer Cléomadès aussi
R'avoit Clarmondine avoec li.
Ainsi de cuers changié avoient;
Mais le change pas ne savoient.
Changes de cuers si amoureux
4020 Ne fu ainc fais com de ces II.
'A II cuers moult forment plaisoit
Li changes qui d'aus fais estoit.

Ne se tinrent pour engingnié
Li cuer, mais si bien apaié
Que au change faire, sans faille,
Ne mirent onques repentaille;
Car le change si fait avoient
Que repentir ne s'en povoient,
N'il n'en avoient volenté;
4030 Car amours leur ot commandé.
Car en tous lieux a son commant
Amours, ce sevent li auquant.
De ce vous lairai ore ester;
D'autre chose vorrai parler.

F^o 16 v^o. Cléomadès tant exploita
Seur son cheval, et tant erra,
Qu'il vit de la terre d'Espagne
Maint val et mainte grant montaigne.
Tant ot li chevalés porté,
4040 K'à Sebile, la grant cité,
Vint tout droit, par I merkedi.
Par fine verité vous di

C'onques ne fu joie veüe
Si grande k'à sa revenue.

Bras ouvers contre lui ala
Marcadigas, quant veü l'a ;
Baisié l'a, tenir ne s'en pot ;
Car onques si grant joie n'ot,
Ne onques mais seü n'avoit
4050 Que grant joie de cuer estoit.
Mais adont primes le sot il,
Quant vit Cléomadès son fil
Que il cuidoit avoir perdu.
De toutes pars sont acoru
Cil qui la nouvele entendirent ;
Mais, quant de lui parler oyrent,
Ses trois serours tel joie en orent,
K'à paine soustenir se porent.

Tant firent k'à leur frere vinrent.
4060 Toutes trois en leur bras le tinrent ;
Des bras leur mere l'ont osté
Qui le tenoit fort acolé ;
Baisié l'ont moult et conjoy.
C. tans plus que je ne vous di
Ont par la cité joie eüe ;
Car ne croi qu'il i eüst rue
Où on [n']oïst pas Dieu tonnans,
Tel joie aloient demenant.
Pour Cléomadès font tel joie
4070 K'à paines dire le porroie ;
De toutes pars s'esjoïssioient
Pour Cléomadès qu'ils r'avoient.

Son pere mena d'une part
Et sa mere. Moult li fu tart

- Que dit leur eüst et conté
Dont il vient et qu'il a trouvé.
— « Sire, fait il, je vous dirai
« Merveilles, car assez en sai.
« Sachiez que ne fu pas eschars
4080 « Envers vous li lais rois Crompars
« Quant le chevalet de benus
« Vous donna. Car je croi k'ains nus
« Ne vit jouel de sa valour.
« Plus vaut d'or que plaine une tour.
« Sachiez vraiment, sans cuidier,
« C' on ne le porroit esprisier.
« Nel di pas pour ce k'à nul jour
« Me plaise qu'il ait ma serour ;
« Car trop seroit mal emploiee,
4090 « Encor soit il rois de Bougie.
« Trop me pariroit près dou cuer,
« Je ne le vorroie à nul fuer.
« Dirai vous pourquoi je le di.
« Bien sai, quant je de ci parti,
« Que vous mauvais gré li seüstes
« De ce que tost ne me reüstes,
« Et croi bien que, pour ce mesfait,
« Li avez aucun meschief fait.
« Ne sai s'il est enprisonnés ;
4100 « Mais, s'il i est, si l'en getés
« Se il vous plaist. Si s'en ira
« En son pays ; car mais n'aura
« Ma suer, puis que il est tex hom
« Qu'il a fait rain de trayson ¹. »
Dist Marcadigas : — « Voirement
« Est il en prison fortement.
« Penduz, ou ars, ou escorchiez

¹ *Qu'il s'entremet de traison.* Ms. 7539.

« Fust tout vraiment, le sachiez,
« Se tost ne fussiez revenus ;
« De ce ne le destournast nus.
4110 « De la prison sera getez,
« Puis k'ainsi est que le voulez.
« Mais à ma fille a il failli ;
« Car il l'a par droit desservi.
« Jà faus hom ma fille n'aura
« Quant sa faussetez prouvé l'a. »
Et quant Cléomadès entent
Ce mot, moult li vint à talent.

Li rois I serjant apela,
4120 De prison geter li rouva
Crompart, et cil le fist ainsi
C'onques n'i mist point de detri.
Lors dist Cléomadès au roi :
— « Par amours, sire, dites moi
« Qu'est devenus Melocandis
« Et Baldigans? » — « Par foi, biau fis,
« Vers leur pays s'en sont r'alé
« Dolent de cuer et tormenté
« De ce que perdu vous avoient.
4130 « Le roi Crompart moult en haoient ;
« Mais chascuns m'a en couvenant
« Que il revenront à mon mant. »

Quant Cléomadès oye ot
Ceste raison, forment li plot
Que chascuns des rois revenroit
Quant ses peres les manderoit.
Après, sans longue demorée,
A s'aventure parcontée :
Comment sus la tour s'arresta
4140 Et comment à mengier trouva,

Et comment il trouva dormant
La bele fille au roi Carmant;
Et tout ainsi qu'il l'esveilla,
Et comment il s'en acointa,
Et comment li rois le fist prendre,
Et comment fu jugiez à pendre,
Et comment leur fist entendant
Que fées l'aloient portant,
Et comment il les amusa
4150 Tant que par son sens eschapa.

Sachiez que il n'oublia mie
Clarmondine, ains leur a prisie
Seur toute rien souverainement
De tout en tout entierement.
— « Sire, fait il, cele pucele
« Dont je vous di par est tant bele
« K'à paine dire vous porroie,
« Jà s'i pener ne m'en saroie,
« La centisme de sa biauté;
4160 « Et encore y a plus bonté.
« Sachiez quant je de li parti
« Mes cuers demora avoec li;
« En tel maniere i demora.
« Que jamais ne s'en partira,
« Ainçois le couvenroit partir
« C'on le peüst de là partir.
« Miex vorroie qu'il fust partis:
F^o 17 r^o. « C'est passé, jà n'en iert partis;
« Et ce saurez vous bien par taïs:
4170 « Que il n'en puet estre partans.
« Car maintenant vous vueil prier
« Que il ne vous vueille anuiier,
« Se vers li revois temprement;
« Car je ne puis vivre autrement.

- « Bien puis dire que mais n'aurai
« Femme nule, se cele n'ai.
« Car sachiez ne vorroie pas
« Que tous li mons et haus et bas,
« Terres, aigues douces et mer,
4180 « Et kan c'on i porroit trouver,
« Fust mien à faire mon vouloir,
« Et ne deüsse reveõir
« Cele à cui j'ai mon cuer donné.
« Car Clarmondine au cuer sené
« Jamais de cuer liez ne serai
« Dusqu'à tant que la reverrai ;
« Car, se mais veõir nel cuidoie,
« Jamais nul jour joie n'auroie. »

Marcadigas a bien oy

- 4190 Comment amours avoit saisi
Son fill. Lors l'a reconforté.
Et dist que bien a assené
Quant s'amour a en tel lieu mise ;
Car en moult haut lieu l'a assise,
Car moult a enz ou roi Carmant
Gentill roi, et sage, et poissant,
Et preudome, et de grant lignage.
Bien s'assent à ce mariage.

- « Biaux fiex, fait il, tout maintenant
4200 « Envoierai au roi Carmant
« Messagiers sages et senés.
« Sachiez que la pucele aurés,
« Qu'el monde n'a prince ne roi,
« Tant soit poissans, si com je croi,
« Qui ne fust moult joians et liez
« Se vous sa fille avoir vouliez.
« Or, en soiez asseürez ;

« Car, se je puis, jà n'i faurrez.
« Par amours la pucele aurons
4210 « Ou par force la conquerrons. »

Quant Cléomadès entendi
Son pere qui parole ainsi,
Bon gré l'en sot, ce fu raison.
— « Sire, fait il, donnés me I don
« Tel que je croi qu'il vous plaira. »
Et Marcadigas li donna.
— « Sire, fait il, n'envoiez point
« 'A Carmant, qu'il y a I point
« K'encore ne vous ai pas dit,
4220 « Qui n'est pas à nostre pourfit. »

Lors li dist que li rois d'Arcage
A pourchacié ce mariage
De Clarmondine et de son fill.
— « Et, pour ce, y auroit perill
« Tel que, se nous i envoions,
« J'espoir que pour ce i faurons ;
« Et, pour ce, m'avez otrié
« Que la voise par vo congié.
« Seur mon cheval tost i serai.
4230 « La pucele, espoir, amenrai.
« Car sachiez je ne me tenroie,
« Si me doinst amours de li joie,
« De li veoir, ce vous aï,
« Tant c'on fust là alé de ci
« Ne d'ilueques revénus ça.
« Pour kan qu'a entre ci et là,
« Dui entiers jour mouvoir vorrai ;
« N'en doutez jà, tost revenrai.
« Sire, plaise vous ensemment ;
4240 « Car mors sui s'il est autrement,

« Et, se vous voulez que mors soie,
« Si me destornés ceste voie. »

Li rois voit bien, comment qu'il aille,
Ira Cléomadès sans faille.

— « Biaux flex, fait il, vous i irés

« Par si que en couvent m'arés,
« Moi et vo mere la royne,
« Que, dedens bien prochain termine,
« Ferez trestout vostre povoir

4250 « De nous temprement reveoir;
« Car, se tost ne vous reveoie,
« Moul't grant meschief de cuer aroie. »

Et Cléomadès dit li a

K'à son povoir tost revenra.

N'a garde d'avoir nul anui

Tant qu'il ait son cheval o lui.

Ainsi que il iluec parloient
De leur besoigne, et devisoient,
Atant [est fols]¹ le roi Crompart

4260 Qui s'en vint tout droit cele part
Où li rois parole à son fil.

— « Ha! rois Marcadigas, fait il,
« 'A grant tort anui fait m'avez;
« Et, puis que vostre fill r'avez,
« Dont est raison que Marine aie.
« Car, pour nul meschief que je traie,
« Ne serai vers vous corrouciez,
« Se vous Marine me bailliez.
« Et vous le m'avez en couvent,

4270 « Ce savez vous bien vraiment.
« Et je la doi par droit avoir;
« Car vous avez trouvé en voir

¹ Le Ms. 175 porte : *Ez vous*, et le Ms. 7539 : *Hez vous*.

« Dou cheval que je vous donnai
« Tout ce que de lui devisai.
« Tous li mons vous tient à loial.
« Ne jà pour moi ne ferés mal ;
« Ains croi bien que vous me tenrés
« Ce que vous en couvent m'avés. »

Lors dist Marcadigas à lui :

4280 — « Certes, fait il, vous ne autrui,
« 'A mon pover, ne mentiroie ;
« Car bon fait aler droite voie.
« Mais la droite voie eschivastes
« Quant la chevillete tornastes
« Dou cheval, quant sus fu montés
« Mes fiex que vous ici véés,
« Qui tout m'a dit son convenant
« Et comment arriere et avant
« Va li chevaus par les chevilles.

4290 « L'amour de moi et de mes filles
« Et de mon fill perdu avez,
« Ne jamais Marine n'aurés.
« Pour ce k'avez fait trayson
« Vous retoil je de li le don.
« Sachiez que à l'amour de li
« Avez vous à tous jours failli ;
« Car droit vous devoit on honnir,
« Car vous me cuidastes trayr.

Fol. 17 v^o. « Ce fu pour ce qu'il vous sambla

4300 « Que à mon fill pas n'agréa
« Que vous eüssiez sa serour ;
« Ce vous fist faire ce faus tour.
« Je vous puis bien pour voir jurer,
« Ce ne vous quier je pas celer,
« K'escorchiez fussiez ou pendus,
« Se tost ne fust ça revenus

- « Cléomadès, qui moult me prie
« Que ne vous face vilonnie.
« Par lui estes, bien le sachiez,
4310 « Si tost de la prison lachiez ¹.
« Il vous est venus à bon port.
« Pour lui n'aurez garde de mort.
« Près fustes de mauvais marchié,
« K'à mort vous avoient jugié
« Tout li baron de mon pays.
« En ma terre avez pou d'amis;
« Vers vostre pays en r'alés,
« C'est dou miex que faire povés;
« Li demorers vous vaurroit pou
4320 « Et pour ce l'aler vous en lo ². »

Et dist Crompars : — « Ne m'en irai
« Dusqu'à tant que Marine arai.
« Pour tant serois je depeciez !
« Envers moi estes corrouciez;
« Mais, quant serés bien avisés,
« J'espoir que couvent me tenrés. »

- Dist Cléomadès : — « Voirement,
« Vous tenra mes peres couvent;
« J'à de couvent ne vous faurra
4330 « Que orendroit vous devisa,
« Que vous garde de mort n'aurés
« Et k'à ma suer failli avés,
« Non pas pour ce que ne soiez
« Riches et bien enlignagiez,
« Mai pour vo taille merveilleuse
« Dont ma suer est si peüreuse;

¹ Le Ms. porte : *Sachiez*.

² Ce mot, correspondant à *laudo* qui, dans la latinité du moyen âge, signifiait *je conseille*, se prononçait probablement *lou*.

- « Et, quant vers moi faus tour quéistes,
« Sachiez bien que pour ce perdistes
« Ce que vous avoit en couvent
4340 « Mes peres de premierement.
« Car pour moi nel vouloit laissier,
« Tant l'en seüsse bel priier,
« Que vous n'eüssiez entresait
« Marine, cui fust biau ne lait.
« Cele vous avoit otroiie.
« Perdue l'avez par folie.
« Laidement vous est mescheü ;
« Fausseté vous a deceü.
« N'est nus qui fausseté maintiengne,
4350 « Que il à mauvais chief n'en viengne.
« Sachiez que trayr me cuidastes,
« Mais vous meïsmes enpirastes.
« Mainte fois a petit aidié
« 'A maint fol ce qu'il ont cuidié.
« Mes peres mais ne vous croira,
« Ne à vous amisté n'aura ;
« Car, puis que il auroit trouvé
« Aucune gent en fausseté,
« Mais à s'amour ne revenroit
4360 « Cil qui fausseté fait aroit ;
« Car tous jours a loial esté
« Mes pères, yver et esté,
« Et loiaus sera tout adès. »

Crompars ot que Cléomadès
Li dist, s'en fu tous abaubis ;
Sans congié s'est de là partis.
Mas et dolans fu, et honteus
Tout aussi comme li pris leus
Qui n'ose nului regarder.
4370 Se parti d'iluec sans parler.

En la vile s'en vint tout droit
Où plenté de sa gent avoit
Qui là l'avoient atendu,
Dolant de cuer et irascu,
Pour ce que leur seigneur savoient
Enprisonné, et bien véoient
Que il avoit fait fausseté;
Ne pourquant l'orent agardé.

'A sa gent vint moult aïrés
4380 Crompars, et de cuer tormentés;
Car en tel point ert sa besoigne
K'au cuer avoit ire et vergoigne.
'A aus a dit qu'il s'en alassent
Et que là plus ne demorassent.
Et cil dient qu'il le feroient;
Car la coustume bien savoient
Que on maintenoit en leur terre.
Pour leur pays garder de guerre,
Ert établi d'ancisserie

4390 Ens ou roiaume de Bougie
Une moult grant diverseté,
Que, se nus faisoit fausseté
Qui tornast à desiretance
Ne à point de deshonorance
Envers le seignour dou païs,
Tantost estoit pris et saisis.
Cil avoit la teste coupée
Seur cui tel chose estoit prouvée;
Sans rachat convenoit morir
4400 Qui le seigneur vouloit trayr.
Celui point avoient usé
De moult grant ancienneté.

Et, se leur sires refust tés

Qu'il fust en nul pays restés
De fausseté que fait eüst,
Trestout certainement seüst
Que, se si home le savoient,
Par droit ocirre le povoient
Se dedens VII ans revenoit
4410 En la terre qui sienne estoit.
N'avoit que VII ans de respit
C'on ne li fesist tel despit
Que il fust à la mort jugiez,
Se dou mesfait n'ert rapaisiez
Que par son mesfait fait avoit.
Tel loi en Bougie courroit.

Au chief de VII ans, s'il vousist,
Dedenz son pays revenist,
Par si que, dedenz ce termine,
4420 Pourçaçast lettre bonne et fine
Que cil vers cui avoit faussé
Eüssent ou pays mandé
Que bien apaié se tenoient
De lui, et qu'il li pardonnoient
Quan qu'il avoit vers aus mespris,
Et bien avoit son los r'aquis.
Jamais n'i remeüst le pié
Se ainsi n'eüst besoignié.

Pour cette raison s'avisa
4430 Crompars que il demorra là.
F^o 18 r^o. Onques ne laissa avoec lui
Là endroit demorer nului;
Car, se ainsi ne le faisoit,
Autrement revenir n'osoit
Pour la coustume qu'il douta.
'A Sebile seus demora.

Souciex fu et malicieus ;
Et pour ce demora tous seus,
Pour ce qu'il ne vouloit que nus
4440 Seüst son afaire et son us,
Que ne se fioit en nului ,
Tant avoit de malice en lui.
Malades prist à visiter ;
Car de fisique sot ouvrier.
Pour ce k'amer se cuidoit faire,
En prenoit il si fait afaire
Que les malades à garir ;
Car bien en sot à chief venir.
De fisique ert si souverains
4450 Que pou en ert de si certains.
De là jusques en Salenique ¹
N'ot nul plus seür de fisique.

De lui vous lairai ore ester.
De Cléomadès vueil parler,
Qui là endroit ne demora
Mais que trois jours. Lors s'arréa.
Droit au quart jour, au matinet,
Fu montés seur son chevalet.
Nus hom sa voie ne savoit
4460 Fors ses peres, cui dit l'avoit,
Et sa mere done Ynabele,
Cui moult desplaisoit la nouvele ;
Et ses sereurs aussi le sorent
Qui moult très grant duel au cuer orent
De ce que telement s'en va
Ne ne sevent quant revenra.

Forment demorerent plorant
Et leur blanches mains destordant,

¹ *Salonique*. Ms. 7539.

Et Cléomadès s'en ala,
4470 Cui la voie moult agréa.
N'enporta o lui que s'espée
Qui ert trenchant et acérée,
Dont maint hauberc ot depané,
Et maint fort hiaume descerclé,
Et maint home mort abatu,
Et depecié maint fort escu.

L'espée avoit non Ressoignie ;
Mieudre de li ne fu forgie.
Cléomadès, sans nul detri,
4480 S'en ala ainsi que vous di.

Marcadigas, li gentiex rois,
Vint à ses filles toutes trois
Et la royne ensamble o lui ;
Ne moustrerent pas tout l'anui
Que il orent, ce povez croire.
Comme gent de bonne memoire,
Ont leur filles reconfortées
Et moult les ont asseürées
Et dit que eles se rapaient
4490 Ne pour leur frere ne s'esmaient ;
Car il revenra temprement,
Ce leur a il bien en couvent.
Ainsi Marcadigas disoit ;
Lui et ses filles confortoit.

Cléomadès tant exploita,
Et ses chevaux si le porta,
Que il a le chastel veü
Où dou dart d'amours navré fu,
Si k'encore ou cuer l'en esteche
4500 De ce dart li fers o la fleche.

Quant il a veüe la tour
Seur quoi s'arresta l'autre jour,
Lors sot il bien seürement
Que c'ert li chastiaus vraiment
Où ses cuers li donna congié
Le jour c'on l'ot à mort jugié.
Pour Clarmondine se laissa
Ses cuers, quant Carmant eschapa.

Cléomadès grant joie eüst
4510 S'en sa compaignie seüst
Le cuer la bele Clarmondine
Qui onques jour ne nuit ne fine
De penser à lui loiaument.
Adès estudie comment
Ele le puist jamais veöir.
Souvent li fait le cuer doloir
Ce que ne set quel part ala
Le jour qu'il se parti de là ;
Car ses cuers adès li disoit
4520 Que de bon lieu venus estoit.

Cléomadès s'est avisés
Que, tant que li jours soit passés,
Ne se traira vers le chastel.
En I bois, desouz I ormel
Qui estoit fueillis et ramez,
S'est Cléomadès avalez.

Desouz cel arbre descendi ;
Pluseurs chans d'oisiaus i oy.
Là s'est Cléomadès assis.
4530 Son cheval a delez lui mis.
Là demora jusqu'à la nuit.
Penser estoient si deduit.

Cléomadès ot grant pensée
Comment il eüst achevée
La besoigne que il chaçoit,
Et en moult grant paour estoit
Que Clarmondine ne fust mie
Ou lieu où il l'avoit laissie ;
Et encore ot plus grant esmai
4540 D'une chose que vous dirai,
Que ne li eüst fait anui
Ses peres pour l'amour de lui,
Et puis l'eüst de là sevrée
Et, pour paour de lui, menée
En autre lieu que là manoir,
Ou en chastel ou en manoir.

Ainsi souz l'arbre aloit pensant
Cléomadès et souspirant
Tant que li jours fu tous passez.
4550 Lors s'est de là endroit levez ;
Seur son chevalet remonta,
Car poins en fu, ce li sambla ;
Moult très douz tans et bel faisoit
Et la lune claire luisoit.

Quant son cheval ot apointié,
Vers le chastel l'a adrecié.
Si tost i vint comme lui plot
Au plus coïement que il pot.
En costé la grant tour passa ;
4560 Droit enz ou praël s'en ala,
Où trouvez fu dou roi Carmant
Avoec les puceles séant
F° 18 v°. Delez Clarmondine la gente,
Qui ne seroit mie dolente
Se le savoit si près de li.

Cléomadès lors descendi,
Et puis a mis son chevallet
En coste I mur en I anglet.

Or, sachiez bien de vérité
4570 C'on ne povoit de nul costé
Dedenz ce praëlet entrer
Que il ne couvenist passer
Par la chambre où cele gisoit
Qui dou mont la plus bele estoit.
Les puceles qui la servoient
L'uis dou praël laissié avoient
Cele nuit trestout entrouvert
Pour avoir l'air dou praël vert,
Et les fenestres tout entour
4580 Pour avoir la très douce odour
Qui des fleurs dou praël venoit.
Et, quant Cléomadès perçoit
La chambre qui n'estoit pas close,
Ne fust si liez pour moult grant chose
Que del huis que ouvert trouva.
Moult coiemment dedens entra.

Le lit à la pucele voit.
Lors pensa bien qu'ele i estoit ;
Car li lit aussi i estoient
4590 Oû ses damoiseles gisoient.
Koi se tint, et si escouta
Tant que vraiment li sambla
Que tout dormoient par léens.

Au lit, qui ert nobles et gens
Oû gist la fille au roi Carmant
S'en vint tout coiemment passant.
D'un douz baisier l'a esveillie.

Durement fu espaourie
Quant ele les iex entrouvri.

4600 En soupirant a dit : — « Ainmi¹
« Que fu ce ore qui m'adesa ? »
Quant Clarmondine veü a
Celui k'autrefois ot veü,
Tout tantost l'a reconneü.

En la chambre faisoit si cler
Qu'ele le puet bien aviser ;
Car II chandeles i ardoient
Qui assez grant clarté getoient.
Lors ne sot ele le quel faire
4610 Ou de haut parler ou de taire.
Un pou fu ses cuers effrésés
Pour ce que s'en estoit alés
'A l'autre fois si faitement
Cil hom, et si diversement ;
Et, se ses puceles l'ooient,
Bien set que tel noise feroient
C'on les orroit de toutes pars,
Et cil seroit pendus ou ars
Se on le povoit ratraper ;
4620 De ce ne porroit eschaper.
Et ce vousist ele à envis ;
Car encor tenoit son cuer pris
Amours, si que pas ne vousist
Que on celui nul mal fesist ;
Et moult très volentiers sauroit
Qui il est ne que il chaçoit.

Ains que la noise fust levée
Sauroit volentiers la pensée
De lui, se savoir le povoit.

¹ *Aymi Ms.* 7539.

- 4630 Et de ce avoit ele droit
S'ele desiroit à savoir
Se cil la vouloit decevoir,
Ne qui il ert, ne de quel terre,
Ne quel chose il venoit là querre.
Et, pour le savoir, s'apensa
Que très bon semblant li fera,
Pour ce que plus seürement
Li die tout son errement.
Lors li dit, ne n'atendi plus,
4640 Que C. mile fois bien venus
Soit il, et qu'il ne s'esmait mie;
Car de sa venue est moult lie.
Quant Cléomadès l'entendi,
— « Bele, fait il, vostre merci
« Que reconnoistre me daigniez.
« Onques mes cuers ne fu si liez
« Que je sui de ce que vous voi.
« Dou tout à vous servir m'otroi. »
— « Biau sire, et je vous en merci.
4650 « Mais l'autre jour, quant fustes ci,
« Ne trouvai pas, en verité,
« Que vous fiex le roi Balcabé
« Fussiez; s'en fu mes cuers irez
« K'en mençonge fustes trouvez.
« Or n'est raisons que mais vous croie,
« S'en vous ne fruis plus droite voie
« Que je ne fis à l'autre fois. »
— « Bele, dit il, certes, c'est drois;
« Et, se je mais de riens vous ment,
4660 « J'à n'aie je amendement. »

— « Dont me dites, biaux amis dous,
« Par fine amour, qui estes vous?
« Je vous pri que nel me celés. »

— « Cléomadès sui apelez,
« Damoisele, n'en doutés pas.
« Fiex le roi sui Marcadigas
« Qui moult est rois de grant valour.
« D'Espaigne tient toute l'onnour
« Et la terre et la seignorie. »

4670 Lors fu Clarmondine si lie
Quant Cléomadès ot nommer,
K'à paine pot ele parler ;
Car par oïr dire l'amoit,
Pour ce que chascun dire ooit
Que de bonté et de valour,
De sens, de largece et d'onnour,
Et de prouece et de biauté
Avoit tout le monde passé.

Et lors a Clarmondine enquis

4680 'A lui, pourquoi Bleopatris
Dist l'autre jour qu'il ert nommés,
Et pourquoi ses nons fu celés,
Que dès adonc ne se nomma.
Tout enquist et tout demanda
-Ce que raisons ert de savoir ;
Car moult ot en li de savoir
Et de très bon entendement.
Et cil si avisément
Li respondi à chascun mot

4690 Que nus hom miex faire ne pot.
De tout li rendi si raison
Qu'ele n'i entent se bien non.
Et que il Cléomadès soit
C'est ce qu'ele vraiment croit.

Fol. 19 r^o. Car il ne li a rien celé ;
De tout li a dit verité.

Lors li dist Clarmondine lues :

— « Se g'ere tele k'à vostre ues¹,
« Sire, moult très lie en seroie
4700 « Se je certainement savoie
« Que vous Cléomadès fussiez.
« Onques mes cuers ne fu si liez
« Que ce que je peüsse faire
« Par quoi je vous peüsse plaire.
« Sauve m'onnour, pour vous feroie
« Trestout ce que faire porroie. »

— « Damoisele, vostre merci. »
— « Et comment venistes vous ci?
« Fait la pucele. Biaux amis,
4710 « Je vous pri que voirs m'en soit dis. »
— « Damoisele, jel vous dirai,
« Ne riens ne vous en celerai,
« Ne je ne quier ne je ne doi;
« Car plus vous aim que ne faz moi. »

Et lors li a dou tout conté
Cléomadès la verité.
Comment ert alez et venus
Sor le chevalet de benus,
Au plus basset qu'il onques pot
4720 Li dist, pour ce que pas ne vot
Que les damoiseles l'oïssent.
Miex li plot que eles dormissent.

Cléomadès tout ensement
Li recorde que li present
Furent son pere presenté.
Tout l'afaire li a conté
Des trois rois, et qui il estoient

¹ Le Ms. porte: *Oes*.

Qui ses trois sereurs demandoient.
Ne vous ferai lonc parlement
4730 De ce. Car, sachiez vraiment,
Tout li recorda là endroit
La chose ainsi comme ele aloit,
Et li dist que tout li laissa
Son cuer quant se parti de là.

Tant dist que ele entendi bien
Que cil l'amoit sor toute rien ;
Et ele ne l'amoit pas mains.
Cléomadès à jointes mains
Li dist que tout se donne à li.
4740 — « Sire, fait ele, et je aussi
« M'otroi à vostre volenté,
« Sauve honneur et virginité ;
« Car miex vorroie estre tuée
« Qu'estre dou cors deshonnerée.
« Bien sai se mes peres savoit
« Que vous fussiez ici endroit,
« Qu'il vous vorroit moult honorer.
« Car souvent a oy parler
« Dou roi d'Espagne vostre pere
4750 « Et de vostre très bonne mere ;
« Parler a oy moult souvent
« De leur noble contenment
« Et de la vostre grant vaillance.
« Mais je sui I pou en doutance
« Que ne nous deüst destorber
« Ce que il me veut marier
« En un lieu divers et sauvage
« 'A l'ainsné fill le roi d'Arcage.
« Et, puisqu'il m'i a otroiie,
4760 « Sachiez qu'il ne fausseroit mie
« Sa couvenance pour nul fuer ;

« Car loiaus est et de frane cuer,
« Et c'est cè qui me fait cremir.
« Avoec vous vueil vivre et morir.
« Or visez, selonc cest afaire,
« Quel chose nous pooumes faire. »

— « Bele, fait il, tous avisez

« Sui de ce, mais que soit vos grez
« Que avoec moi venir veulliez. »

4770 — « De ce est moult bien conseiliez

« Mes cuers, fait ele, se seüsse
« Comment o vous aler peüsse. »

Dist Cléomadès : — « N'en doutés ;

« Car, s'o moi venir en voulés,
« Moult très bien vous enporterai ;
« C'est la chose dont mains m'esmai. »

La raison li a devisée

Comment ele en seroit portée

Avoecques lui, seur son cheval,

4780 Sanz nul perill et sanz nul mal

Qui avenir puist en la voie.

Et Clarmondine ot moult grant joie

De ce que porter l'en porroit ;

Car amours ainsi le vouloit,

Et bien lor avoit fait commant

Amours qu'il fussent vrai amant,

Et cis commans fu si tenus

Que n'i porroit amender nus.

D'unes et d'autres dit li a

4790 Tant que la pucele otria

'A lui que o lui s'en iroit

Et dou tout à lui se donnoit.

— « Biau sire, fait ele, or alez

- « En ce praël, et m'atendez
« Tant que je vous rapelerai.
« Mes puceles esveillerai ;
« Sans vous vueil à eles parler.
« Moul't vous ai oy regreter
« 'A eles, et forment prisier.
4800 « Mais ne savoient que cuidier
« De vous, mais forment vous looient
« De tant que veü vous avoient.
« Mais moul't de leur grace perdistes
« Quant vous entendant nous feïstes
« Chose qui n'ert pas verités.
« S'en fustes moul't d'eles blasmés,
« Et à ce avoit bien raison ;
« Car n'i povoient se mal non
« Ne entendre ne percevoir,
4810 « Et ce povez vous bien savoir.
« Biau sire, pour m'onneur sauver,
« Lor cuit ceste chose moustrer
« Si à point, ce sachiez pour voir,
« Que vous le porrez bien vouloir.
« Bien sai que, quant eles sauront
« Vostre non, grant joie aueront;
« Car de vous, sachiez vraiment,
« Ont oï parler moul't souvent,
« Et souhaidié ont maintes fois,
4820 « N'i a nule de toutes trois,
« Que je fusse à vous mariée.
« Plus ne porroie estre honnerée,
« Ce me disoient tout adès,
« K'estre femme Cléomadès ;
« Car moul't forment est renommée
« Vo prouece en mainte contrée. »

- « Ce est tout par leur courtoisie
« Que eles dient que sui tés
4830 « Que vous ici me recordés.
« Mais, se tous seus valoie autant
« Que tout li bon qui sont vivant,
« Et eüsse quanques il ont
« Et quanqu'il a en tout le mont,
« Et fusse sire de seur tous
« De paradis de çà desous,
« Et de plus, se estre povoit,
« Sachiez que sambler me devoit
« Que je fusse bien emploiez
4840 « En vous, se avoir me daigniez.
« Or, vueille Diex que à plaisir
« Puisse vous et amours servir !
« Car tous jours tant com viverai
« Et amours et vous servirai.
« De ce sui je certains et fis
« K'ainsi sera que je devis ;
« Car amours le m'a commandé
« Ainsi, dont moult li sai bon gré. »
Et Clarmondine l'en mercie
4850 Et li dist qu'ele moult est lie
K'amours li a ce commant fait
Tel qu'ele l'a à ce atrait ;
En son cuer en a moult loé
Amours, quant à ce l'a mené.

- Dist Cléomadès : — « Je irai
« En ce praël et i serai
« Sanz plus tant que il vous plaira ;
« Car point ne m'i anuiera
« Puisque il vous plaist que là soie.
4860 « Par loisir faites, ce vous proie.
« Seur toute autre riens ai desir

« Que faire puisse vo plaisir,
« Ce sachiez vous bien. Entresait
« Faites belement et à trait,
« Sans effroi et sans esmaiance;
« De riens ne soiez en doutance,
« Car ains que il doie ajourner
« Porroit on moult très loing aler. »

Atant rentra enz ou praël,
4870 Oû faisoit moult noble et moult bel,
Liez et joians; car moult li plot
Que Clarmondine trouvée ot
Lie, ainsi comme li sambla,
De ce que revenus ert là.
Moult en fu ses cuers aaisiez.
'A genous en a gracié
Ses Diex, et menu et souvent.
Et Clarmondine apertement
A ses puceles esveillies
4880 Qui moult se sont esmerveillies
Que ele lor veut à tele heure.
Levées sans longue demeure
Se sont, et devant li venues;
Et, quant ele les a veües,
Si leur dist moult très sagement,
Et à point et courtoisement,
Comment Cléomadès estoit
Là venus, et que il queroit.

— « Sachiez, fait ele, c'est cil là
4890 « Qui si doucement s'acointa
« L'autrier à nous en ce praël.
« Plus courtois de lui ne plus bel
« Ne quiere nus; car, c'est passé,
« On ne l'auroit jamais trouvé. »

Lors leur a tout ce recordé
Que dit li avoit et conté
Cléomadès, et l'ochoison
Dou chevalet, et la raison
Pour quoi ainsi s'en ert alez
4900 Et pour quoi là ert retornez.
De point en point tout leur conta
La chose ainsi comme ele va.
Tant leur dist qu'eles le créirent
Et k'à son vouloir s'assentirent,
Et des nouveles sont si lies
Que toutes en sont esbaudies.

— « Ha ! ma dame, dist Liadès,
« Dites vous que Cléomadès,
« Li biaux, li preus, li alosés,
4910 « Qui tous les autres a passés
« De proueece et de hardement
« Et de tous biens entierement,
« Est cil qui l'autre jour fu ci ? »
— « Oïl, par verté, le vous di,
« Car tout certainement le sai,
« Car moult sagement enquis l'ai,
« Ne de ce jà ne vous doutés. »
— « Douce dame, dont vous hastés
« De vous lever. A lui irons.
4920 « 'A no pover joie en ferons,
« C'on ne se porroit trop pener
« De tel home bien honorer.
« Sachiez c'on n'en porroit trop faire
« Tant est preus et de bon afaire.
« Bien estes d'eur comblé et drue
« Quant de vous veut faire sa drue
« Cléomadès. Moult est plaisans
« Cis mariages, et séans.

« Moulz miex à lui nous assentons
4930 « K'à Bleopatris ne faisons,
« Et qui autre chose en diroit
« Certes pas ne vous ameroit. »

Trestoutes trois li ont loé.
Ce vint moult Clarmondine à gré.
De joie un petitet souzrist
De ce que chascune li dist,
Car la parole li agrée.

Moult tost s'est de son lit levée.
Assez tost fu apareillie,
4940 Et lors n'est gaires detriie.
Ses puceles prist maintenant.
Vers le praël vinrent errant
Là où Cléomadès estoit,
Qui adès à amour pensoit.
De chascune fu saluez,
Et il, comme bien avisez,
Respont chascune si à droit
Com cil où toute honnours manoit.

Sage et avisé le trouverent.
4950 Dedenz la chambre l'en menerent.
Plus k'à l'autre fois l'ont trouvé
Courtois et à point enparlé.
Tant leur dist que chascune croit
Pour voir que Cléomadès soit.
Que vous feroie je lonc plait?
Chascune tout son pover fait
De lui servir et aaisier.
Un petit le firent mengier
Fol. 20 r°. Et Clarmondine delez lui.
4960 Ce fu uns mengiers sans anui,

Et les trois puceles servoient
Qui moult liement le faisoient.

Quant par loisir l'ont aaisié
Et il ot beü et mengié,
Lors commencierent à parler
Comment il porront achever
La besoigne k'empris avoient
Et comment en exploiteroient.
Quant ensamble assez parlé orent
4970 Tant com leur plot et com il vorrent,
Leur parlemens à ce tourna
Que Clarmondine s'otria
'A ce que en sa compaignie
S'en iroit, et moult en ert lie.

Ses puceles s'i assentoient.
Car tout certainement savoient
Que, se rois Carmans le savoit,
Que Cléomadès pas n'auroit
Sa fille. Car aillours donnée
4980 L'avoit li rois et créantée,
Non pas pour ce que liez ne fust
S'ailleurs otroie n'eüst
Sa fille; car ce qu'il disoit
Outréement tenir vouloit,
Et, pour ce point, s'i assentirent
Pour le peril qu'en ce point virent.

'A Cléomadès ont requis
Que, quant venra en son pays,
Qu'eles bien tost mandées soient
4990 Toutes trois. Forment l'en prioient
Que il ce n'oublie noient.
Et il leur a en couvenent,

Et dist que ainsi le feroit
Et k'a envis le laisseroit.
Et Clarmondine moult li prie,
S'il li plaist, qu'il ne l'en maint mie
Qu'ele n'ait son pere veü,
Ainçois qu'il soient esmeü,
Et sa mere, se il veïst
5000 Que ainsi faire le pouist.
Car si durement redoutoit
Le duel que chascuns d'aus menroit
S'il cuidoient que fust perdue,
Que toute en estoit esperdue.

 Tout en lermoiant l'en pria.
Car moult près dou cuer li toucha
Ce qu'eles devoit esloignier,
Car moult avoit chascun d'aus chier.
Et esloignier li couvenoit,
5010 Car fine amours li commandoit;
Et encontre commandement
D'amours, n'a nul desfendement.
Ne ele talent n'en avoit.
Ses cuers pas à ce ne pensoit;
Mais bien pensa que, s'il seüssent
Qui cil ert, et veü l'eüssent,
Avoec cui ele s'en aloit,
Que moult grans confors leur seroit.

 Et Cléomadès erranment
5020 Li dist moult debonairement
Que son pere li moustrera
Ainçois qu'il se parte de là,
Et sa mere, ainsi puet il estre
S'ele est enz ou chastel n'en l'estre,
De léens veïr la porra;

Car à tous savoir le fera ;
'A aus bel et bien et à point
Parlera ; or ne s'esmait point
Si que chascuns savoir porroit
5030 Que Cléomadès l'enportoit
Pour li faire à tous jours honnour,
Car n'ert pas pour sa deshonnour,
Et que tantost l'espousera
Que dedens son païs venra.
Quant Clarmondine l'entendi,
Moult durement li abeli
Que si estoit obéissans
Cléomadès à ses commans.

Les puceles n'atargent mie,
5040 Ains ont la besoigne avancie
De ce que il i couvenoit.
Bien et bel et tost et adroit
L'ont pourveüe et arréée.
Jà estoit près de la journée.
Les puceles, tout lermiant,
Vinrent Cléomadès devant
Et li dirent qu'il s'arréast
Et que gaires ne demourast ;
Car leur sires li rois Carmans,
5050 Ot acoustumé de lonc tans
K'à la journée se levoit
Et dedenz I jardin aloit,
Près de là, moult bel et moult gent,
Et o lui de sa plus grant gent.
Chascun jour ainsi le faisoit,
Se pour mal tans ne le laissoit.

— « Et s'avons bien veü aussi
« Que il venoit moult matin ci

- « Pour jouer à ma damoisele,
5060 « Car il n'aime riens tant com ele.
« Et, pour ce, le haster loons
« Que deceües ne soions.
« Couvertement voulons ouvrer
« Pour nous de tous perils geter.
« Pour estre de peril getées
« Sommes jà de ce avisées
« Que, quant vous en verrons aler,
« Trestout errant, sans arrester,
« En nos lis nous recoucherons,
« Trestoutes coies nous tairons,
5070 « Illuec ferommes la dormeille.
« Samblant ferons d'avoir merveille,
« Quant la noise sera levée.
« Chascune fera la dervée
« Et moult durement l'esmarie
« Et la dolente et l'esbahie,
« Aussi que riens n'en seüssiens.
« Autrement, honnies seriens ;
« Car, s'on savoit que par nos grés
5080 « Fust cis afaire arréés,
« N'est riens qui nous sauvast les vies :
« Arses seriens ou enfouies.
« De ce couvenir nous laissez.
« Jà de nous ne vous esmaiez ;
« Car bien nous en deliverrons.
« Mais encor vous resemonnons
« Que, quant en vo pays venrez,
« Que vous pas ne nous oubliez,
« Que tost mandées ne soions ;
5090 « Car dusqu'à tant joie n'aurons
Fol. 20 v°. « Que nous reverronmes celi
« Cui chascune aime plus que li.
« N'est pas merveille se l'amons ;

« Car amer la doit tous li mons
« Pour le sens et pour la biauté
« Dont en li a si grant plenté. »

Cléomadès moult doucement
Leur dist que tout certainement
Sachent que il les mandera
5100 Tantost k'en Espagne venra,
Et fera roi Carmant savoir
Que il ne doit pas duel avoir
Pour sa fille ; car maint ami
Aura en pluseurs lieux pour li,
Qui volentiers le serviroient
Se son plaisir faire cuidoient.
— « Car, sachiez, quant là vous aurai,
« Hautement vous marierai ;
« 'A chascune donrai baron
5110 « Duc ou conte ou très haut baron. »

Chascune l'en a mercié.
'A ce mot n'ont plus detriié.
Viande et vin apareillierent,
Entour le cheval la lierent.

Jà estoit li jours ajornés,
Et li rois Carmans ert levés
Qui jà ert ou jardin venus
'A tout grant plenté de ses drus
Et Clarmonde sa femme o lui.
5120 'A coustume orent andui
Que chascun matin là venoient
Se pour lait tans ne le laissoient.

Lors s'est avisée Florete
Qu'ele iroit seur une tourete
Qui estoit au cor dou praël.

Là s'en vint moult tost et isnel
Pour veoir dedenz le jardin.
Le roi Carmant vit souz I pin,
Et sa femme Clarmonde. I fu
5130 Moult [très] grant plenté jà veü¹
De dames et de chevaliers,
De damoisiaus et d'escuiers.

Quant ce vit, moult fu effrée.
De la tour est jus devalée.
Lors s'en revient arrier corant,
Sa dame le dist en plorant
Pour ce que vraiment savoit
Que plus demeurer ne pavoit,
S'en ot I pou le cuer dolent
5140 Pour le prochain département.
Lors li dist au jardin estoit
Ses peres ; illuec se séoit,
Et sa mere i ert ensemment.
Et, quant Clarmondine l'entent,
Trestout erranmant s'est levée.
Un petit estoit explorée.
Ses trois damoiseles ploroient
Et lor blanches mains detordoient.
Dist Cléomadès : — « Ne plorés ;
5150 « Car temprement nous reverrés,
« Assez plus tost que ne cuidiez :
« Jà de ce ne vous soussiiez. »

Et lors a Clarmondine prise

¹ Le Ms. porte : *Moult grant plenté jà veü*. L'intercalation de la particule *très* nous a paru nécessaire pour compléter ce vers boiteux. D'ailleurs, l'expression *moult très*, destinée à donner plus de force au superlatif absolu, se rencontre fréquemment dans Adenès. *Voy.*, par exemple, v. 5201, 5822, 7218, 7457, etc.

Moult doucement, et l'a assise
Sor le chevalet tout errant.
Cléomadès sist par devant.
Pour faire le cheval aler
Le couvenoit devant ester.
Car, se amender le pouist,
5160 La pucele devant meïst ;
Mais, pour le cheval adrecier,
Le couvint devant chevauchier.
De touaille très deliie
Fu la damoisele liie
Sor le cheval, si très adroit
Que ele verser ne povoit.
Se ele bien vousist cheïr,
N'en eüst ele le povoir.

Quant Cléomadès fu montez
5170 Et de mouvoir soi aprestez,
Jà estoit li jours esclarcis
Et li tans plaisans et jolis.
Quant sa chose ot si apointie
Que adroit fu apareillie,
Lors a la cheville tastée ;
Et, si tost que il l'ot trouvée,
As Diex de sa loi commanda
Les puceles, lors s'en ala.

Moult doucement au commencier
5180 Se commença à adrecier
Tout droit en costé la grant tour.
Lors regarda trestout entour
Tant qu'il choisi le roi Carmant,
Qui par le jardin va jouant
Et o lui de sa gent plenté
Des grans seigneurs de son regné.

La royne i estoit aussi
Et plenté de dames o li.
De legier veïr les povoit;
5190 Car li solaus jà se levoit.
'A Clarmondine l'a moustré.
Tout droit cele part sont torné.
Tout cil dou jardin les povoient
Veïr tout à plain s'il vouloient.

Et lors Cléomadès parla.
Au roi dist : — « Sire, entendés çà,
« Vostre fille point ne querez
« Clarmondine, où tant a biautez,
« Là où vous li aviez laissie;
5200 « Car vous ne l'i trouveriez mie.
« Vez la ci moult très près de moi.
« Fiex sui de royne et de roi
« Qui sont estrait de gentillece.
« N'a riens en aus qui honor blece
« Ne par quoi honnours soit blecie;
« Car gentill sont d'ancisserie.
« Et autressi est Clarmondine
« Fille de roi et de royne
« Et d'aussi gentill lieu venue
5210 « C'on sache point de souz la nue;
« Car de vous en mainte contrée
« Est la grans valours renommée
« De la gentillece et des biens
« De quoi en vous ne defaut riens.
« Pour ce, me sui donnez à li,
« Et ele à moi s'otroie aussi.
« D'Espaigne sui norris et nés;
« Cléomadès sui apelés,
« Fiex le roi Marcadigas sui.
5220 « N'aiez de riens au cuer anui;

« Car vostre fille espouserai
« Tantost k'en Espagne venrai. »

Fol. 21 r°. La royne haut regarda
Tant que le cheval veü a
Et sa fille qui siet desus.
Forment fu ses cuers esperdus.
L'oume vit qui devant li fu.
Lors cuida tout avoir perdu,
Quant sa fille est à ce menée
5230 Qu'ele li ert ainsi emblée.

Lors commença fort à crier :
— « Ha! ma fille, où veus tu aler?
« Lasse! que nous est avenü?
« Malement sommes deceü! »
Si par fut de duel acorée
K'à la terre cheï pasmée.
Cléomadès de là partis
S'est; et li rois si esbahis
Remaint, qu'il ne sot que penser.
5240 Entour lui prist à regarder
Sa gent, qui moult s'esmerveilloient
De ce que il veü avoient.

Dist li rois : — « K'avons nous oy?
« Ainc mais tel merveille ne vi.
« Que est ce que m'a on noncié?
« Est ce à certes, ou j'ai songié
« C'on en ait ma fille portée?
« Ce seroit dure destinée. »

Dient sa gent : — « Sire, sachiez,
5250 « Et trestout asseür soiez,
« Que cil qui ore à vous parla,

- « C'est cil qui l'autrier eschapa,
« Que avec vo fille trovastes,
« Dont à destruire le jujastes.
« Bien reconnoistre le puet on
« Au cheval et à la raison.
« Moul't durement nous desconforte
« Ce qu'il nous dist que il enporte
« Nostre damoisele avec lui.
5260 « De ce avons si grant anui
« Au cuer, et si très grant contraire,
« Que ne savons que puissons faire.
« Cléomadès dist qu'il a non ;
« Ne savons s'il dist voir ou non.
« Moul't desirommes à savoir
« Se il ment, ou s'il nous dist voir.
« Car, se Cléomadès estoit,
« La besoigne miex en vaurroit.
« S'ainsi estoit que ce fust il,
5270 « Mains en douteriens le peril ;
« Car ains par lui ne vint nul jour
« Fors que tout bien et toute honneur. »

Ainsi à roi Carmant parloient
Dou meilleur confort qu'il savoient.
Mais cil confors sambloit petis
Au roi. Lors s'est de là partis ;
Car il n'ert pas asseurez
Que cil confors fust veritez ;
Car, se il vraiment seüst
5280 Que cil là Cléomadès fust,
Il ne fust pas si esbahis
Ne si souples ne si pensis¹.
Ne sot que avenu li fu.

¹ *Ne si dolent ne si pensis.* Ms. 7539.

Ens ou chastel sont revenu.
Clarmonde enportent sa maisnie
En sa chambre, triste et irie ;
Car la riens qu'ele plus amoit
Avoit perdu, si com cuidoit.

Dusk'à la chambre Clarmondine
5290 Li rois Carmans d'aler ne fine.
Droit à l'entrée par devant
Trouverent le vilain gisant
Qui l'uis de la chambre gardoit.
Encore esveilliez ne s'estoit ;
Mais pour la noise s'esveilla,
Si très tost que li rois vint là.

Lors est li vilains sus saillis.
Le roi vit, qui fu abaubis.
Bien vit que il n'estoit pas liez ;
5300 Lors cuida qu'il fust deshaitiez.
— « Qu'est ce, Sire, fait il, k'avez ?
« Vous me samblez tous effréez.
« Ainc mais en tel point ne vous vi ;
« Moult en ai le cuer esmari. »

Dist li rois : — « Mal avez gardée
« Clarmondine. Mar la vi née ;
« Car pour l'amour de li morrai
« Puis ce di que perdue l'ai.
« Cil qui ci fu l'autrier l'enporte,
5310 « Dont mes cuers moult se desconforte,
« Qui le cheval de fust avoit.
« Ma gent l'ont veü orendroit
« En mon jardin, et je aussi,
« Dont forment ai le cuer mari.
« Seur le cheval s'en vont andui.

- « Ainc mais de riens n'oi tel anui.
« Par desus mon jardin s'en vont.
« Moulte de ma gent veü les ont.
« Le cheval et aus veü ai.
5320 « Jamais ma fille ne verrai,
« Ce est ce que je le miex croi.
« Ainc tex meschiez n'avint à moi. »

Quant li vilains l'a entendu,
Ainc de riens si dolans ne fu.
Pou s'en faut que il ne marvie¹.
La chambre a lues desverroillie.
Communaument dedenz entrerent.
Les trois damoiseles trouverent
Qui dormoient, ce leur sambloit;
5330 Et, quant le lit sa fille voit
Li rois, et pas ne l'i trouva,
Seur le lit de duel se pasma.

Quant les damoiseles ce virent,
En plorant moult tost se vestirent.
Quant [on] leur ot dit le pourquoi²,
Chascuns ert en si grant esmoi,
Lors commencerent à crier
Et leur cheveus à detirer.
Chascune sambloit miex dervée
5340 Qu'ele ne feïst avisée.
Mal sambloit que du couvenant
Seüssent ne petit ne grant.
Au lit leur dame vinrent droit
Où li rois Carmans demenoit
Grant duel; mais moult le confortoient

¹ *Qu'il ne se marvie.* Ms. 7539.

² Le Ms. porte : *Quant leur ot dit le porquoi.*

Sa gent qui entour lui estoient.

Lors prennent à crier : — « Harou !

« Moult par nous aiment¹ li Dieu pou

« Quant si fort endormies fumes

5350 « Que nous ne nous aperceümes

« De ce k'ainsi nous est ravie

« Dou monde la miex ensaignie

« Et la meilleur et la plus bele. »

'A ce mot lor duel renouvele ;

Fol. 21 v°. Aussi qu'eles fussent dervées,

Se sont seur le lit adentées.

Li une saisi l'oreillier

Et le prent fort à embracier,

Et l'autre le cuevrechief prent

5360 Et le baise piteusement ;

La tierce aërt² le couvertour.

Là demenoient tel dolour,

C'on les porte fors de léens

Aussi comme pour fors dou sens.

Illuec ot maint cheveil tiré

Et maint piteus souzpir geté.

Si ot mainte paume batue.

Chascuns de duel s'afole et tue.

Li rois Carmans tel duel avoit

5370 C'un seul mot dire ne pavoit.

Lors primes li ont devisé

Sa gent qu'il avoit mal ouvré

De ce k'avisez ne s'estoit

K'aussi bien revenir pavoit

¹ *Moult nous par aiment*. Ms. 7539.

² *Aërt*, quelquefois *aart*, de *aërdre*, saisir, ou *ahiert*, de *ahierdre*, qui a la même signification. Cf. PHILIPPE MOUSKÈS, v. 25782.

Cil au cheval en ce lieu là
K'à l'autre fois quant eschapa ;
Et qu'il deüst avoir ostée
De là sa fille, et¹ recelée,
Et que nus hom ne le seüst
5380 Se il de son conseil ne fust.

Dist li rois : — « Tart le m'avez dit ;
« Cis consaus m'a pou de pourfit.
« Et, ne pourquant, mais ne cuidasse,
« Ne ne creïsse, ne pensasse,
« Qu'il deüst ceste part retraire.
« Las ! or ne sai que puisse faire,
« Tant ai au cuer ire et tristour.
« Or m'en conseilliez le meillour. »

Lors li loerent si baron
5390 Et li moustrerent que raison
Seroit qu'il feïst arréer
Messagiers, et tantost aler
'A Marcadigas, pour savoir
De ceste besoigne le voir.
Et li rois dist bon li sambloit.
Et k'errant i envoieiroit.

Lors y a messagiers tramis
Qui furent sage et bien apris ;
Mais, ains que il arréé fussent,
5400 Ne que il de là se meüssent,
Fu Cléomadès, ce sachiez,
De là endroit moult esloigniez.
Ne pourquant pas moult tost n'aloit ;
Car la pucele deportoit

¹ Le Ms. porte : *En*.

Que ne la vouloit travaillier.
'A la foiz la faisoit mengier
Ou seur riviere ou seur fontaine.
De li servir forment se paine;
Car son cuer avoit atorné
5410 'A faire à son povoir son gré.

Ainsi alèrent que vous di
Tant que il vinrent, I mardi,
Tout droit à Sebile la Grant
Aussi com à soleil levant.
Dist Cléomadès : — « Douce amie,
« Or soiez et joians et lie ;
« Car à la vile estes venue
« Oû liement serez veüe.
« Ici endroit laissai mon pere
5420 « Et done Ynabele, ma mere,
« Et mes sereurs, qui vous feront
« Moul't grant joie quant vous verront,
« Ce sachiez, pour l'amour de moi. »

— « Sire, fait ele, bien le croi.
« Mais volentiers vous prieroie,
« Se je prier vous en osoie,
« Que, se nul biau lieu seüssiez
« Ci-près, que vous m'i menissiez,
« Tant que fusse desvolepée¹
5430 « Et un petitet reposée;
« Car trestous li cors me tressue
« Dou vent qui si m'a debatue. »

Et lors Cléomadès li dist
Qu'el plus biau lieu k'ains nus veïst

¹ Comp. v. 604.

La menra, assez près de là.
Et cele moult l'en mercia.
Lors s'avala en I jardin
Où ot maint lorier et maint pin,
Joignant des murs de la cité.
5440 De tous fruiz i avoit plenté.
Sous I olivier descendi
Cléomadès, et ele aussi.

Seur la verde herbe s'est couchie
Clarmondine, moult traveillie.
Quant un petit ot la geü
Et que reposée se fu,
Lors dist qu'ele vouloit mengier.
Et Cléomadès, sans targier,
L'en donna; car à grant plenté
5450 En avoient là aporté.
Assez leur en avoit chargié
Liadès au prendre congié.
Li chevaus en ert si troussez
Que il en y avoit assez;
Car, pour r'aler là dont venoient,
Viande et vin assez avoient.

Cléomadès lors souhaida
Que ses peres le seüst là
Et sa mere et ses trois serours.
5460 — « 'A nous venroient le grant cours.
« Pleüst à Dieu que ainsi fust
« Que chascuns d'aus ci nous seüst!
« Et, s'anuiet ne vous devoit,
« Léenz iroie à aus tout droit
« Et si les amenroie ci. »
— « Sire, fait ele, et je vous pri
« Que vous les ailliez amener,

- « Et me laissez ci reposer ;
« Car à envis remonteroie
5470 « Sor ce cheval, se je povoie ;
« Car li membre me duellent mout,
« Et pour ce forment le redout,
« Ne ne seroit pas chose bele
« K'ainsi alast une pucele
« Devant bonne gent atornée,
« Loïie aussi comme dervée. »

- Et quant Cléomadès entent
Que il li plaist si faitement,
Si li dist : — « Bele, or vus cluingniez.
5480 « Maintenant serai repairez,
« Ne devrait anuier nului
« En si biau lieu, vous ne autrui.
« Escoutez le chant des oisiaus
« Qui chantent seur ces arbrissiaus
« Entour vous, de chascune part. »

- Atant Cléomadès s'en part.
Fol. 22 r^o. Vers le chastel s'en vait corant.
Moult ot le cuer lie et joiant
De ce k'à souhait li venoit
5490 Sa besoigne, ce li sambloit.
Clarmondine est là demorée.
Mais, combien qu'ele fust lassée,
Une chançonnete trouva
Tele que je vous dirai jà ;
Car amours de chanter li proie,
Et lors dist à cuer plain de joie :

- « Diex ! Trop demeure mes amis.
« Tart m'est que le revoie,
« Li biaux, li courtois, li jolis.

5500 « Diex ! Trop demeure mes amis.
« Puis k'en lui sont tout bien assis,
« Pourquoi ne l'amerioie ?
« Diex ! Trop demeure mes amis.
« Tart m'est que le revoie. »

La bele ainsi s'esjoïssoit.
Ceste chançonnete chantoit
Pour Cléomadès, son ami,
Qu'ele amoit assez plus que li.
Et, quant bien cele chançon sot,
5510 Une autre, au plus tost qu'ele pot,
En retrouva, moult joliete,
De chant et de dit moult gaiete :

« Tant que j'aie amours avoec moi,
« Ne sui je pas seulete.
« De li forment loër me doi,
« Tant que j'aie amours avoec moi.
« Quant il li plaist k'avoèques soi
« M'a mise si joenete,
« Tant que j'aie amours avoec moi,
5520 « Ne sui je pas seulete. »

'A tés chançonnetes pensoit
Clarmondine, et se deduisoit
En Cléomadès attendant.
Trois en fist tout en I tenant.
La tierce n'ai pas oubliée
D'ainsi qu'ele me fut moustrée
Des dames par cui soi le conte,
Cui Diex gart de mal et de honte.
'A maniere de vireli
5530 La fist, car il li plot ainsi.
De li fu tost li chans trouvez,

Et li dis tés que jà l'orrez :

« Revenez, revenez ;
« Dous amis, trop demorez,
« Trop longuement m'oubliez.
« Revenez, revenez.
« Fine amour, car le hastez,
« Priez li ou commandez.
« Revenez, revenez ;
5540 « Douz amis, trop demourez. »

Tout ainsi s'aloit deduisant
La bele, et adès regardant
Cele part où s'en ert alez
Cil à cui ses cuers s'ert donnez.

Crompars avoit acoustumé,
Entrues k'à Sebile ot esté,
Que tous jours se levoit matin
Et s'en aloit en ce jardin
Çà et là, pour herbes cueillir
5550 Pour ses malades agarir ;
Car herbes i avoit plenté
Où il avoit moult grant bonté.

La damoisele oï chanter
Très plaisamment et haut et cler.
Cele part, au plus tost qu'il pot,
S'en vint où chanter oy l'ot.
Tant ala amont et aval
Que il a veü le cheval
Que maintes fois avoit veü ;
5560 Pour ce l'ot tost reconneü.
Durement s'en esmerveilla.
Tout droit cele part s'adreça.

Sous l'olivier la bele voit
Qui lez le chevalet séoit.
Quant Clarmondine l'a veü,
Moult grant paour en a eü.
Grant merveille ot qu'estre povoit,
Ne dont si très lais hom venoit.
Tout maintenant laissa son chant
5570 Quant le roi Compart vit venant.

Lors vousist moult bien estre aillours ;
Car il li prist si grans paours
Que cel home vi si hideus ,
Et qu'ele ert seule et il ert seus,
Que ele moult haut s'escria : -
— « Harou ! Qu'est ce que je voi là ?
« Je crois que ce soit anemis.
« Cléomadès, biaux dous amis,
« Com à dure heure m'assenti
5580 « 'A ce que me laissastes ci
« Pour aler querre plus de gent !
« Je l'amasse miex autrement.
« Encor n'estes vous gaires loing,
« Or auroie de vous besoing.
« Lasse ! que m'est-il avenu ? »

Par ces moz a bien entendu
Li rois Crompars le couvenant.
Le cuer en ot lie et joiant.

Lors pensa que il l'en menroit
5590 Quant Marine avoir ne povoit,
Et feroit de celi s'amie
Kains ne vit si bele en sa vie.
Liez est quant il se puet vengier
Et avoir si biau restorier.

Fol. 22 v^o. La pucele ot qui regreta
Cléomadès. Lors s'avisa
Que il l'avoit là amenée.
— « Ne soiez, fait il, esfréeé;
« Car point de mal ne vous ferai. »
5600 — « Ha, Sire! si grant paour ai
« De vous et de vostre samblant,
« Que tous li cuers me va faillant.
« Alez vous en ¹, je le vous pri.
« Tout maintenant revenra ci
« Cléomadès, à cui je sui.
« Vos demorers me fait anui. »

Dist Cromptars : — « Or, ne vous doutez.
« Encor soie jou desguisez,
« Et de merveilleuse façon,
5610 « Je ne ving ci se pour bien non ;
« Car tout certainement sachiez
« Que je suis à vous envoie
« De par Cléomadès sans doute.
« Maintenant li prist une goute
« Droit ainsi que je l'encontrai
« Quant dedenz ce jardin entrai.
« Séant le laissai sous une ente.
« Mais n'en soiez pas trop dolente ;
« N'aura mal, seüre en soiez.
5620 « Il vous mande k'à lui viengniez.
« Seur le cheval o vous irai,
« 'A Cléomadès vous menrai.
« La maniere me devisa
« Comment à lui nous portera
« Li chevaus. Là porrez savoir
« Se je vous dis mençonge ou voir.

¹ Leçon du Ms. 7539. Le Ms. 175 porte : *Ent*.

« Il me dist k'enz ou front séoit
« Une cheville c'on tornoit.
« Pour faire le cheval aler. »

5630 Clarmondine prist à plorer
Pour la goutte dont cil li dist.
Tous li cors li tramble et fremist.

Bien cuida que l'eüst mandée
Cléomadès, lors s'est levée.
Pour les ensaignes le cuida
Que li rois Crompars devisa.
Par celui point fu deceüe.
Et lors est maintenant venue
Tout droit vers le cheval de fust ;
5640 Car moult desiroit qu'ele fust
Là où Cléomadès estoit,
Com cele qui de cuer l'amoit.

Lors l'a li rois Crompars assise
Sor le cheval et à point mise.
Seürement l'a reloïie ;
Car bien en savoit la maistrie.
Le vin et la viande prent,
En costé le cheval la pent,
Et lors monta tout maintenant.
5650 La cheville torna errant ;
Et, si très tost qu'il la tourna,
Li chevaus moult tost s'en ala.

Jà avoit trompé longuement
Li tromperes d'or hautement,
Si que moult s'en esmerveilloit
Roi Marcadigas qui l'ooit.
Et aussi s'en esmerveilloient
Trestout cil qui tromper l'ooient.

Crompars l'avoit moult bien oï,
5660 Et, pour ce, se hastoit-il si.

Cléomadès vint tout droit là,
Ou point que li hom d'or trompa.
Mais à son tromper n'entendirent
De riens, quant Cléomadès virent ;
Car de toutes pars acoru
Sont contre lui quant l'ont veü.
Quant la nouvele en entendirent
Ses serours, gaires n'attendirent,
Ains vinrent contre lui corant,
5670 Et li firent joie si grant
Que eles faire li povoient,
Car plus que eles lui amoient.

En la chambre le roi l'en mainent.
De toutes pars joie demainent.
Tout sont lié de sa revenue.
Sa mere est contre lui corue
Qui l'a baisié et acolé.
Cléomadès a salué
Le roi Marcadigas son pere
5680 Qui onques n'ot pensée avere,
Et il li fist joie si grant
Com peres doit faire à enfant.
De savoir avoit desirrier
Comment ses fiex revint arrier
Et comment il a exploitié
De Clarmondine, et besoignié.

Cléomadès lors leur conta
La besoigne com ele va,
Comment Clarmondine ot laissie
5690 Ou jardin, sous l'ente flourie,

Forment traveillie et lassée.

- « Car de son pays amenée
« L'ai, fait-il, moult tost ceste part.
« Vers li r'alons ; car moult m'est tart
« Que ele fust venue ci.
« Por quoi l'ai là laissie ainsi
« Vous dirai-je, se vous voulés.
« Par li fu li consaus donnés
« Qu'ele là se reposeroit
5700 « I poi, et si m'atenderoit
« Jusqu'à tant que je revenroie ;
« Car je li dis que j'amenroie
« Contre li plenté de tel gent
« Qui la verroient liement.
« Vous, et ma dame, et mes serours,
« Pour ce vous pri que le grant cours
« Faites envoyer de tous lés ;
« Chevaliers et dames mandés,
« Et damoiseles et puceles.
5710 « Par tout voisent tost ces nouveles,
« Et faites commander aussi
« De toutes pars que contre li
« Voist chascuns au plus noblement
« Qu'il porra, et hastéement.
« Car bien afiert c'on face honnour
« 'A fille à roi de tel valour
« Com est li riches rois Carmans,
« Et à pucele si sachans
« Et si bele qu'il n'i faut riens,
5720 « Ne de biauté, ne de tous biens.
« Tout ce que je di, trouverés
« En voir, quant la connoisterez. »

Dist li rois : — « Et nous le ferons,
« Biaux fiex, et moult grant joie avons »

« Qu'amenée avez ici
« Tel pucele, Dieu en merci. »

Fol. 23 r^o. Lors fist Marcadigas savoir
De cele besoigne le voir
De toutes pars, et commander
5730 Fist li rois que sans arrester
Fussent les rues atornées
Très netement et arréées
Encontre la venue cele
Qui grant joie nous renouele.
Et on le fist tout ensement
Partout de cuer et liement.
Mais durement s'esmerveilloient
Partout de ce que il ooient
Le trompeœur d'or haut tromper
5740 Sanz nesun seul point arrester.

Grant merveille avoient la gent
Pourquoi trompoit si longuement,
Et à ce bien raison avoit.
Done Ynabele se hastoit
Moult forment de li arréer
Pour tost devers le lieu aler
Là où Clarmondine cuidoit,
Si com ses fiex dit li avoit.

En la place estoit amenés
5750 Uns palefrois si arréés
Com à royne apartenoit.
Et uns siens escuiers tenoit
Un autre palefroi delés
Blanc, et si estoit enselés
D'une sele à arçons d'ivoire,
Richement ouvrée à trifoire.

Et i ot sambue vermeille
Dont la royne ot la pareille.
Et li frains ert d'or bien ouvrés.
5760 Et li palefrois estoit tés
Que nus plus biaux ne miex alaus
Ne fust trouvés, ne miex séans.
Arréer l'ot fait la royne
Pour sus amener Clarmondine.

Ses trois filles toutes montées
Vinrent iluec ; car plus hastées
S'estoient qu'eles onques parent,
Pour le desirrier qu'eles orent
De tost venir là où cuidoient
5770 Cele dont forment convoitoient
K'à li peüssent tost venir
Pour li baisier et conjoïr.
Bien sembloient filles de roi;
Car si riche erent li conroi
Et li atours de toutes trois,
De sambues, de palefrois
Et de tout l'autre remanant,
Que c'estoit merveille très grant
De veïr la très grant richour
5780 Qui estoit en leur noble atour.

Plenté de dames assablées
Estoient iluec; car mandées
Les ot la royne Ynabele
Si tost qu'ele sot la nouvele
Que ses fiex li avoit contée.
Lors est la royne montée,
Quant les dames furent venues.
Palefrois et muls et sambues

Et mules vëoir peüssiez ¹
5790 De maintes pars, se là fussiez,
Et plenté de dames parées
Et très noblement acesmées.

Lors se sont de là esmeües
Les dames, et s'en sont venues
Là où Clarmondine cuidoient.
Li rois et ses fiex atendoient
Les chevaliers de la cité
Dont il i avoit grant plenté,
Qui moult estoient esjoï
5800 De la nouvele c'ont oï.

'A Cléomadès fu bailliez
Uns palefrois apareilliez
Si com à lui apartenoit.
Son pere et les autres prioit
Moult très durement de haster.
Et les dames, sans arrester,
Erent vers le jardin alées.

Quant ou jardin furent entrées,
'A ses trois filles a rouvé
5810 Done Ynabele, et commandé,
Que chascune une chançon die,
La meilleur et la plus jolie
Que ele porra aviser ;
Car tans est de joie mener.
Et lors dist chascune erranment
Qu'ele le feroit liement

¹ Le Ms. 7539 porte :

*Palefrois, mules et sambues
Vairs et noirs y veüssiez.*

Ne ne s'en feront pas prier.

— « Dont doit l'ainsnée commencer,
« Dist done Ynabele, premiers. »

5820 — « Madame, moult très volentiers,
« Dist Elyador, le ferai ;
« Car moult très grant desirrier ai
« De liement veoir celi
« Que mes chiers freres aime si,
« Qui tant est biaux et bons et preus.
« Bien est séans l'amour d'aus II.
« Car moult est bonne et bele et sage.
« Ci ara plaisant mariage. »

Après ce mot, prist à chanter

5830 Jollement et haut et cler :

« Diex nous doinst temprement trouver
« Celi cui tant devons amer.
« Bien sot amours à droit ouvrer.
« Diex nous doinst temprement trouver
« Quant tés II gens fist assamblar
« C'on ne les porroit trop loer.
« Diex nous doinst temprement trouver
« Celi cui tant devons amer. »

'A cele chançon respondirent

5840 Les dames, et moult s'esjoïrent
De ce que si à point chantoit
Elyador. Moult leur plaisoit
La chançon qu'ele avoit chantée.
Bien lor sambloit faite et ditée.
— « Feniadisse, or tient à vous »,
Dist la royne. — « Dame, et nous
« Le ferons. » Et lors commença
'A chanter, plus ne s'en targa :

Fol. 23 v^o. 5850 « Joie ait qui joie demenra ;
« K'en joie faire raison a,
« Pour ce que nous verronmes jà.
« Joie ait qui joie demenra,
« La plus bele k'ainc Diex forma
« Ne que il jamais fourmera.
« Joie ait qui joie demenra ;
« K'en joie faire raison a. »

Les dames qui iluec estoient
De respondre à point se penoient ;
Car moult leur samblent envoisies
5860 Les chançons qu'eles ont oiies,
Et à point dites et chantées.
Parmi le jardin sont alées,
D'une part et d'autre esgardant.
Moult s'aloient esmerveillant
Auquel lez estoit Clarmondine.
Et lors prist à chanter Marine
Une chançon k'ot avisée.
Selonc ce avoit compassée
La chançon, que il li estoit
5870 Grief de ce que tant demoroit
Que Clarmondine ne trouvoient
Ne que nouvele n'en oient ;
S'en ert moult de cuer adolée.
Lors chanta selonc sa pensée :

« Ne serai très lie de cuer
« S'aurai cele trouvée
« Qui sera ma dame et ma suer.
« Ne serai très lie de cuer.
« Avoir ne vorroie, à nul fuer,
5880 « M'amour de li ostée.
« Ne serai très lie de cuer

« S'aurai cele trouvée. »

Parmi le jardin, en chantant,
Aloient ainsi, requerant
Clarmondine, que je vous di.
S'avint droit en ce point ainsi
Que li rois Marcadigas vint ;
O lui chevaliers cent et vint
Ot, ou plus, ainsi com j'entent.
5890 Moult sambloient bien noble gent ;
Car d'aus tous li pis acesmez
Estoit richement arréés.

Cléomadès devant venoit
Pour ce que mener les devoit
Là où Clarmondine laissa.
Li rois ses peres li rouva
Que il chantast une chançon ;
Car de chanter avoit raison
Puisque il tel pucele amoit
5900 Qui si bonne et si bele estoit,
Et fille de roi si vaillant
Comme la fille au roi Carmant.
— « Et certes, fait il, se j'estoie
« En vostre point, ne me porroie
« Tenir de chanter. » — « C'est passé,
« Sire, et j'en ferai vostre gré.
« Puisqu'il vous plaist, je chanterai ;
« Vostre commandement ferai. »
Li rois dist qu'il respondera,
5910 Et il et tout cil qui sont là.
Et lors a commencié son chant
Cléomadès, trestout errant,
En alant parmi la praële,
Une chançonnete nouvele :

« On doit bien aler liement
« Encontre tel pucele
« Com est Clarmondine au cors gent.
« On doit bien aler liement,
« Qu'el monde, tant com il s'estent,
5920 « N'a meillour ne plus bele.
« On doit bien aler liement
« Encontre tel pucele. »

'A ceste chançon respondi
Li rois, et tout li autre aussi ;
Car tout erent en desirrier
De Clarmondine festiier
Si tost que trouvée l'aront.
Lors à primes joie feront¹.
De ce orent grant volenté.
5930 Tant ont par le jardin alé,
Que les dames ont rencontrées,
Dont moult i ot de tormentées
De ce que trouvée n'avoient
Cele k'à veïr desiroient.
Mais de li nouvele ne sorent
Nesune, et ne pourquant orent
II fois le jardin traversé,
L'une dou lonc, l'autre dou lé.

Lors vint li rois à la royne.
5940 Demanda li de Clarmondine
Se ele veüe l'avoit.
— « Naie, Sire², se Diex m'avoit,
« Dont courroucie sui forment. »
Et Cléomadès erranment

¹ « *Et dont leur joie doubleront* » Ms. 7539.

² « *Nenil, Sire* » Ms. 7539.

Leur dist que tout droit les menra
Au lieu là où il la laissa.
'A ce mot d'ilueques s'esmurent
Cil et celes qui iluec furent.

Cléomadès aloit devant,
5950 Et tout li autre après sivant ;
Car au lieu mener les cuidoit
Là où il laissie l'avoit.
Cléomadès tant les mena
Que il droit au lieu assena
Où il s'estoit de li partis.
Lors fu malement esbahis
Quant il ne l'i a retrouvée.
L'erbe trouverent defoulée

Fol. 24 r°. Là où Clarmondine ot laissie,

5960 Qui de cuer ert joians et lie
'A l'eure que de li parti.
Et Cléomadès descendi
Tout erranment, si esbahis
Que il sambloit miex mors que vis.
Près que ses cuers ne li partoît ;
Car ce que le cheval ne voit
Li fait meschéance esperer.
De Clarmondine retrouver
Ne pot riens que I tout seul gant.

5970 Et Cléomadès maintenant
L'en leva, car bien le connu.
Lors ot le cuer si esperdu
Que à paines pot il parler.

Dist li rois : — « Povez rassener
« Au lieu là où vous la laissastes
« Quant en ce jardin l'amenastes ?
« Ce me samble diversetez

« Que vous n'i estes rassenez
« Ne ne savez quel part ce fu. »

5980 Et quant ses fiex l'a entendu,
Si dist : — « Sire, ci la laissai ;
« Si certainement riens ne sai
« Que ce que je la laissai ci
« Orendroit que de li parti ;
« Mais or ne sai que ce puet estre. »

Li un la queroient à destre,
Et li autre au senestre lés.
Moult ert li jardins lons et lés ;
Mais n'i ont laissé arbrissel,
5990 Vergié, ne haie, ne praël,
Que il n'aient quise et cerchie
Clarmondine, que n'i ert mie.

Et, quant assez requise l'orent,
Si que toût certainement sorent
Que ele ou jardin pas n'estoit,
Lors furent irié et destroit.
Toute la gent qui iluec erent
Tout droit au lieu se rassamblèrent
Là où Cléomadès trouva
6000 Le gant, quant là les amena.
Cléomadès tel duel faisoit
Que nus confors riens n'i valoit.
Ses serours erent descendues.
Cheveus tirez, paumes batues
I ot pour le duel qu'il menoit ;
Car, pour poi qu'il ne s'ocioit,
Ses serours les mains li tenoient.
En plorant le reconfortoient
Au miex que le povoient faire ;

6010 Joie leur estoit moult contraire.

Li rois et la royne estoient
Descendu. Moult grant duel faisoient.
De ce que il ert ensement
Au cuer orent ire et torment.
Vers Cléomadès sont venu
Qui à si très grant meschief fu
Que on porroit plus deviser.
Qui veïst ses serours plorer
Et lui, tout en plorant, baisier,

6020 La maniere deüst prisier
De leur douz reconfortement,
Tant le faisoient doucement.
Se confors i peüst valoir,
Bien en faisoient leur povoir.
Mais confors n'i valoit noient;
Car entre leur bras si souvent
Se pasmoit, que c'estoit pitiez.
Et, quant il estoit repairiez
Et revenus de pasmoison,
6030 Lors regardoit tout environ.
Clarmondine moult regretoit,
Et souvent après li huchoit :

— « Ha ! Clarmondine, douce amie,
« Flour de lis et rose espanie,
« Esmeraude, rubis, toupace,
« K'atent la mors que ne me passe
« Sous la gorge, et que ne me tue,
« Amie, quant vous ai perdue?
« Ains tel meschéance n'avint. »

6040 Le gant encontre son cuer tint.
Emprès sa char bouté l'avoit ;

Mais nus fors il ne le savoit.
Moult volentiers le gant baisast,
Ce sachiez, se baisier l'osast ;
Mais bien savoit c'on li torroit
Se devant la gent le baisoit.
Souz sa chemise l'ot bouté.
Estroit le tenoit acolé.
Perdre nel vorroit à nul fuer,
6050 Pour ce l'ot mis contre son cuer.

Sa mere li tenoit le chief,
Qui estoit à si grant meschief
De la mesaise qu'il avoit
K'à pou que ele ne moroit.
Et li rois ses peres aussi
Ot le cuer si très esmari
Que il ne savoit que penser.
Cléomadès en fist porter
Enz ou chastel. Moult fu iriez
6060 Pour son fill, et moult esmaiez.

Couchier le firent sor I lit
Où il ot petit de delit ;
Car de duel fu si esperduz
Qu'il ne sot qu'il fu devenus,
Ains fu aussi com marvoies.
N'estoit ce pas trop grant meschiés
Quant hom de tel adrecement
Qu'il ert, estoit à tel torment
K'à paines pouvoit il parler ?
6070 Qui veïst grant duel demener
Pere et mere, serours, amis,
Uns et autres, grans et petis,
N'est nus qui n'en eüst pité,
Tant eüst en son cuer durté.

Par la cité fu esbandue
Cele nouvele, et tost seüe.
Pour Cléomadès grant duel firent.
Clarmondine partout requirent,
Par chans, par bois, par vaus, par plains;
6080 Mais adès en savoient mains
L'un jour que l'autre ne faisoient.
Ne pourquant tous jours la queroient,
L'un jour arriere, l'autre avant,
Tant que la gent le roi Carmant
Firent tant qu'à Sebile vinrent.
Savoir poez que il se tinrent
Com gent dolente et abaubie
Quant la nouvele orent oïe
Que leur damoisele ert perdue.
6090 Ains nule gent si esperdue
Fol. 24 v°. Ne furent mais comme il estoient.
'A pou que de duel ne moroient.

Devant Marcadigas alerent.
Tout en plorant le saluerent
(Car ne s'en porent consurer¹,)
Et lors li prirent à moustrer
Que li rois Carmans les avoit
Envoyez à lui trestout droit.
Toute la raison li moustrent
6100 Pourquoi là endroit venu erent.
Et li rois leur a recordée
Comment la chose estoit alée,
Et dist que bien cuide estre fis
Que mais Cléomadès, ses fis,
De son lit ne se levera,
Si grant duel pour Clarmondine a.

¹ Le Ms. 7539 donne : *Déporter*.

- « Bien croi que rien nel puet garir,
« Nel conviengne de duel morir.
« S'en ai tel duel et tel anui,
6110 « Que, s'il muert, bien sai que mors sui,
« Qu'après lui vivre ne querroie,
« Ainçois meïsmes m'ocirroie,
« Que jamais ne seroie liez
« S'il m'avenoit si grant meschiez
« Que de perdre chevalier tel
« Qu'il est as chans et à l'ostel.
« Se je ne li apartenoie,
« Sor ma loi jurer oseroie
« C'on ne porroit nului trouver
6120 « Oû mains eüst à amender
« Qu'il a en lui, si com je croi,
« Et selonc ce que en lui voi.
« S'en sui si dolans, que bien sai,
« S'il muert, que je pour lui morrai.
« De vostre seigneur moult souvent
« Ai oï parler bonement.
« Par quoi moult forment me plaisoit
« Ce que Cléomadès devoit
« 'A sa fille avoir mariage;
6130 « Car tant ert bele et bonne et sage
« Que chascuns de li tesmoignoït
« Que toutes les autres passoit
« Et de biauté et de tous biens,
« Si que en li ne failloit riens.
« Souvent ai oï tesmoignier
« C'on ne la porroit esprisier
« Tant ert bele et bonne et courtoise.
« De vostre seigneur moult me poise,
« Qui si très grant chose a perdue
6140 « Com fille de si grant value;
« Mais or est ainsi avenu

« Que moi et lui est mescheü.
« Je vous pri que, quand le véez,
« Que de par moi le saluez. »

Et cil dient qu'il le feront.
Congié prenent. Atant s'en vont ;
Car n'ert pas pouns, ce lor sambla,
De plus longuement estre là.

Entre aus communnaument disoient
6150 Que onques [mais] veü n'avoient
Roi ne prince, en tout leur vivant,
Si courtois ne si biau parlant.
Li rois les fist moult honorer
Et chevaus et joiaus donner.
Mais pas prendre ne les vouloient.
Les presens le roi refusoient ;
Mais tant ne se sorent deffendre
Que il ne leur convenist prendre.
Sachiez, ou vousissent ou non,
6160 Ot chascuns dou roi riche don.

'A Sebille ne demorerent
Mais que trois jours. Lors s'en alerent.
En leur pays revindrent droit
Là où li rois Carmans estoit.
De par Marcadigas li font
Salus, et puis conté li ont
La chose si qu'il l'ont trouvée.
Ne l'en ont nule riens celée.
Dou roi Marcadigas disoient
6170 Moult de bien, et moult s'en looient.

Quant Carmans a ce entendu,
Nesun seul mot n'a respondu ;

Ains commença à lermoier
Et durement à souploier.
Vers terre prist à regarder
Et moult souvent à souzpirer.
Tant par fut plain de duel et d'ire
K'en grant piece ne pot mot dire ;
Et, si tost com il pot parler,
6180 Lors commença à regreter
Clarmondine piteusemant.

La nouvele tantost s'espant
Que d'Espaigne venu estoient
Li message, et si raportoient
Que Clarmondine estoit perdue.
Sachiez mainte paume batue
Y ot, et maint cuer très dolent.
Partout faisoient duel trop grant.

Liadès, Gaiete et Florete,
6190 Se chascune d'une sajete
Fust férue enz ou cuer dedenz,
Ne cuit pas que plus grans tormens
Fust en eles que eles orent
Quant eles ces nouveles sorent.
Pitiez seroit à recorder
Li duels c'on leur veïst mener.
Tant par orent grant desconfort
K'adès souhaidoient la mort.

Iluec ot maint cheveil tiré.
6200 Si furent par tout tormenté
Que en aus nesun confort n'ot.
Et, quant done Clarmonde sot
Comment sa fille estoit perdue,
'A ses mains s'esgratine et tue.

- Je croi que ele se tuast
Se on couvenir la laissast.
Mais ses puceles acorues
I sont. Les mains li ont tenues.
De leur dame pitié avoient.
- 6210 'A leur pover la confortoient.
Mais petit i valoit confors.
Car li cuers qui ert en son cors,
Ne pot le meschief soustenir,
Ains le couvint à ce venir
Que de duel morir se laissa,
K'ains puis ne but ne ne menga
Clarmonde; car mengier ne pot
Puis que la nouvele oïe ot
Que sa fille perdue estoit.
- 6220 Lors ot Carmans le cuer destroit
Quant perdu ot et fille et mere;
Moult li fu cele chose amere,
- Fol. 25. r°. Car onques puis ne fu veüe
Fille et mere de tel value
Que eles erent, c'est passé,
D'onneur, de bien et de biauté.

Tant estoient triste [et] dolant
Partout la gent le roi Carmant
K'à paines le vous diroit nus.

6230 De ce ne vous parlerai plus
'A ceste foiz, ains vous dirai
La verité si com la sai,
Quel part li rois Crompars torna
Le jour que Clarmondine embla,
Et quel voie et quel chemin tinrent,
Ne où alerent, ne où vinrent.

Bien avez entendu comment

- Crompars malicieusement
Clarmondine o lui enporta,
6240 Qui maint grant cri le jour geta
Quant ele fu aperceüe
Qu'ele ert traye et deceüe.
Lors commença à regreter
Cléomadès, et à plorer.
Derriers li regardoit souvent
Et huchoit moult piteusement :
— « Cléomadès ! Cléomadès !
« Amis douz et courtois et nès,
« Sages et preus et entendans,
6250 « Et plus k'autres biaux et plaisans !
« Amis, pourquoi fui onques née,
« Quant si tost fui de vous sevrée ?
« Sevrée en sui je voirement,
« Car morir me couvient briement.
« Si fine amour, qui si pou dure,
« Naist de destinée trop dure.
« Onques amour si afinée
« Ne fu qui si tost fust finée.
« Hé ! las ! com ci a dure fin,
6260 « Quant je l'aim tant de très cuer fin.
« Lasse ! dolente que m'avint,
« Quant cis dyables sor moi vint
« Qui mon seigneur et mon ami
« A ainsi faitement tray
« Et moi morte, sans eschaper ! »

- 'A ce mot la couvint pasmer.
De duel plus ne s'en pot tenir.
S'ele eüst pover de cheïr,
Sachiez k'à terre fust versée ;
6270 Mais si ert loïie et bendée
Qu'ele n'ot pover de verser.

Crompars la prist à regarder.
Se li sambla que morte fust.
Lors lasche le cheval de fust ;
Tout belement l'a avalé
Sous I arbre, en I très biau pré.

Crompars a la pucele ostée
Jus dou cheval, et esventée
L'a dou coron de son mantel.
6280 De l'aigue prist en I ruissel
Qui là ert corans seur gravele.
Lors en geta à la pucele
Parmi son très plaisant viaire.
Clarmondine la debonaire
Revint à li. Lors souzpira.
Tantost Cléomadès hucha
Qu'ele revint de pasmoison.
De travail ot si grant foison
Que à paines se soustenoit ;
6290 Mais de ce ne li souvenoit.

Elle n'acontoit pas I ail
Ne à paine ne à travail
Que ele eüst ce jour soufert
Pour Cléomadès qu'ele pert,
De quoi ele est si esloignie.
Moult het et despote sa vie
Que mais veoir ne le cuidoit ;
C'estoit ce qui plus li touchoit.
Car à Cléomadès tous jours
6300 Estoit ses cuers et ses retours.
Ne li touchoit point d'autre anui.
Adès li souvenoit de lui.

Crompars la confortoit forment

- Et li prametoit¹ que briement
La menroit en I tel pays
Où' moult auroit de son devis,
Et la feroit d'or coronner ;
Mais qu'ele se vueille acorder
'A ce que ele soit s'amie,
6310 Royne sera de Bougie
Et la prendra à moillier.
— « Bele, ne vous doit anuier
« Se je sui petis et boçus ;
« Car ne doit estre de refus
« Li dons que je vous offre ci. »
— « Ha ! Sire, fait ele, merci.
« Sui je dont en la compaignie
« Crompart, qui est roi de Bougie ? »
— « Oïl, fait il, foi que vous doi. »
6320 — « Certes, Sire, ce poise moi ;
« Et, se amender le povoie,
« Pas longuement n'i remanroie.
« Cléomadès m'a tant conté
« Comment vers lui avez ouvré,
« Et le forfait par quoi perdistes
« Sa suer, quant vers lui mesfeïstes,
« Et comment pour lui fustes pris,
« Et eüssiez esté honnis
« Se il ne fust tost repairiez.
6330 « De tous estiez à mort jugiez.
« Il vous fist geter de prison ;
« Mal l'en rendez le guerredon.
« Quant emblée m'avez à lui,
« Je croi fait li avez anui.
« Mais, se vous que courtois faisiez,
« Droit au lieu me reporteriez

¹ Sic.

« Où vous me trovastes séant ;
« Si auriez fait aumosne grant. »

Dist Cromptars : — « De ce ne parlez.
6340 « Sachiez que ma femme serez. »
« — Sire, fait ele, non serai ;
« Car tant ne vail ne tant ne sai
« Par quoi il aferist à moi
« Que je fusse femme de roi.
« Je sui une povre meschine,
« De pere et de mere orpheline,
« Et sui, n'en mentirai noient
« Venue de moult povre gent. »

Dist Cromptars ; — « Et de quel païs
6350 « Estes vous ? Or m'en soit voir dis,
« Je vous en pri, ma douce amie. »
— « Certes, Sire, de Lombardie ;
« 'A envis vous en mentiroie.
« Fille d'une ouvriere de soie
Fol. 25 v°. « Sui, et si fui née à Melan.
« Pere et mere perdi ouan ¹.
« Despuis ce di norrie m'a
« Une dame, qui me donna
« Ceste robe que j'ai vestue ;
6360 « Car moult estoie povre et nue.
« Grant bien li croisse et grant honnour !
« Moult me fist de bien et d'amour ;
« Car, se ele n'eüst esté,
« Morte fusse de povreté.
« Cléomadès passa par là.
« De ses trois serours me parla,
« Pour ce que ouvrer je savoie,

¹ *Oan.* Cette année.

- « Me dist k'avoec eles seroie
« Et que jamais ne me faurroit.
6370 « Et, pour ce que pas ne vouloit
« Que nus i peüst mal penser,
« Me fist ou jardin demorer
« Le jour que là m'ot aportée
« Sor ce cheval. 'A recelée
« M'en ving o lui, k'ains ne le di
« Ne à parent ne [à] ami.
« Ainsi sui à lui otroïie.
« Pechié faites et vilonnie
« Que ainsi de lui m'esloigniez
6380 « Et telement me traveilliez. »

- Dist Crompars : — « Jà ce ne pensez ;
« Car jamais vers lui ne r'irez.
« Cui fille soiez, ne cui non,
« Sachiez moi auez à baron.
« Tout certainement le vous di ;
« Car vostre biauté m'a saisi.
« De vous amer sui si espris
« Que tant vous aim et tant vous pris,
« Que il couvient, comment qu'il aille,
6390 « Que ma femme soiez sans faille.
« Vostre lignage franchirai
« Et de vous royne ferai ;
« Pour vous les vorrai porveoir
« Si que bien le porront vouloir.
« Vous dites que povre gent sont,
« Mais sachiez que riche seront. »

- Quant Clarmondine l'entendi,
D'angoisse et de paour fremi
De ce k'en tel point se véoit ;
6400 Li et sa vie despisoit.

Souvent retornoit sa veüe
Au lez dont ele estoit venue;
Pour l'amour de Cléomadès
Regardoit cele part adès.

Lors s'est Cromptars devers li trais.
— « Bele, fait il, soiez en pais
« Ne ne vòus esmaiez de riens.
« Mes cuers est vos, li vos iert miens.
« Tout serai à vostre vouloir
6410 « De cuer et de cors et d'avoir,
« Mais que vous faites mon plaisir. »
Et lors commença à fremir
Clarmondine moult durement
Et à penser com faitement
Ele li porroit eschaper.
Lors se commence à aviser
Que se ele venir peüst
Là où plenté de gent eüst,
Qu'ele querroit bien tour comment
6420 Eschaper porroit soutilment.

— « Sire, fait ele, je vous pri,
« Puiscedi que il est ainsi
« Que il vous plaist que vostre soie,
« Bien me plaist et bien m'i otroie.
« Grans honnours m'avient, Dieu merci.
« Je m'i assent bien par I si
« Que vous me faciez tant d'onnour
« Que ne me querez deshonnour,
« Ne ne me faites felonnie
6430 « Ne riens qui tourt à vilonnie,
« Et, pour l'onneur de mariage,
« Me garderez mon pucelage
« Tant que espousée m'aiez ;

« Je vous pri que le m'otriiez. »

Dist Crompars : — « Je l'otrieraï

« Par I si que je vous dirai,

« Qu'el premier lieu que nous venrons

« Que là endroit espouserons,

« Ne jà ne le contredirez. »

6440 — « Sire, fait ele, c'est mes grez ;

« Ainsi en couvent le vous ai.

« Mais, quant en vo pays venrai,

« Je vous pri, se vous tant m'amés,

« Que vous nostre afaire celez

« D'ainsi que vous m'avez trouvée,

« Ne comment m'avez aportée;

« Ne de ma povre estracion

« Ne ferez vous jà mencion,

« Car j'en seroie mains prisie

6450 « S'on savoit la povre lignie

« Dont je sui estraitte et venue;

« Pis en seroie receüe. »

Et li rois Crompars dit li a

Que jà mencion n'en fera.

Il pensoit bien k'en son pays

Se retraïroit à envis ;

Car bien sot que forfait avoit

'A l'usage qui i estoit,

Que moult auroit ainçois à faire

6460 K'en son pays osast retraire.

Mais moult à envis le droit

'A cele que il enportoit.

En son cuer ot en proposé

Que, quant il auroit espousé,

K'en I pays divers iroit

Là où nus ne le connoïstroit,

Et manderoit privéement
En son pays or et argent.
Ainsi lairoit le tans passer.

6470 Tout si que m'oez deviser
Ot cele chose en proposée.
Clarmondine a moult regardée ;
Son non li demande et enquier.
Cele dist celer ne li quiert.
— « Sare, fait ele, sui nommée. »
— « Ce soit à bonne destinée ! »
Fait il. « Ma douce baisselete,
« C'est moult plaisans nons que Sarete. »

Li rois Crompars lors s'avisa
6480 C'un petit mengier la fera.
Lors a de la viande prise,
Devant Clarmondine l'a mise
Qui moult ert traveillie et vaine.
Une soupelete en fontaine
Menja, que plus ne pot mengier.
Et li rois Crompars, sanz targier,
Fol. 26 r°. La fist tout errant remonter ;
Car là ne volt plus arrester.

Ambedui remontent ensamble.
6490 Clarmondine de paour tramble ;
Car moult estoit espoëntée
Et triste et dolente et irée.
En son cuer prist à regreter
Son pere, et moult à souspirer,
Et sa mere ; car bien cuidoit
Que jamais nul d'aus ne verroit,
Et Cléomadès autressi :
Ce ne pavoit metre en oubli.

Que vous iroie je contant ?
6500 Seur le cheval allèrent tant,
Ainsi que j'ai oï conter,
C'une vile qui siet sus mer
Virent, en une grant valée,
Qui ore est Salerne apelée.
Maint val virent et maint grant mont.
C'estoit uns roiaumes adont
Qui de grant seignorie estoit;
Car moult grant terre i apendoit.
Moult par fu sages et courtois
6510 Cil qui de la terre estoit rois,
Et avoit non Meniadus.
Biaus et gens fu et par creüs.
Soie ert la terre de Labour
Et autres grans terres entour.

Moult avoit en lui roi poissant.
'A lui estoient apendant
Maint pays que ne sai nommer.
Mais souvent ai oy parler
D'une coustume qu'il avoit.
6520 La coustume quele ele estoit
Vous 'vueil maintenant deviser;
C'est que nus ne povoit passer
Par son pays, ne couvenist
Que ainçois devant lui venist.
Jà si grans sires n'i passast
Qui, sans ce, passer i osast
K'ainçois ne venist devant lui,
Ou avoir en peüst anui.
Mais, qu'il fussent gent trespasant,
6530 Chevalier, clerc, ne marcheant,
N'i paioient lors nul paiage
Fors que maintenir cest usage.

La raison pour quoi le faisoit,
C'est pour ce que savoir vouloit
Nouveles des estranges terres,
Des tournoiemens et des guerres.
Car, pieça que tornoient
Furent trouvé premierement,
'A premiers fu-uns esbanois
6540 Pour porter armes et conrois.
Le trouverent li chevalier
Pour plus estre en armes manié¹;
Et que miex aidier s'en seüst
Chascuns, se mestier en eüst.
Pour ce furent li tornoi fait.
Mais il sont ore contrefait,
Car au jour d'ui est moult crueus
Si fais geus, et moult perilleus.

Nouveles d'estranges manieres
6550 Avoit cis rois durement chieres.
Ainsi l'avoit acoustumé
Rois Meniadus et usé.
Nouveles volentiers oït,
Et dou sien à tous ceuls donnoit
Qui nouveles li apportoient,
Selonc ce qu'eles li plaisoient
Et qu'eles li estoient beles.
Moult amoit diverses nouveles.

Meïsmes à la soie gent
6560 Donnoit une somme d'argent
Le premerain qui li disoit
Nouveles k'oïes n'avoit.
Toute sa vie le maintint.

¹ « Pour plus estre d'armes manier. » Ms 7539.

Quant Crompars vers la cité vint,
Quant en si divers lieu la voit,
Lors pensa que là se traitroit,
Et k'assez i a divers lieu
Pour manoir gent qui sont eskieu ;
Lors li sambla bien que trouvé
6570 Ot lieu tout à sa volenté.

En coste I bois, lez I pendant,
Se va doucement avalant.
Iluec avoit riviere et prés.
Là s'est rois Crompars avalés
Assez près d'une fontenele
Qui clere et sourdans seur gravele
Estoit. Iluec sont arrestu ;
Jus dou cheval sont descendu.

Li rois Crompars ot enpensé
6580 Qu'il ne traitroit vers la cité
Jusqu'à tant qu'il seroit tous nuis ;
Car moult redoutoit les anuis
De plenté de gent encontre.
Pour ce li plot à demorer.
Et moult bien enpensé avoit
Que seur son cheval pas n'iroit,
Mais à pié le passet soué ;
Car trop seroient regardé
Se seur le cheval i entroit.
6590 En tel maniere fais estoit
Li chevaus que m'orrez conter ;
Car on ne doit riens trespasser
En nule estoire veritable,
Si c'on¹ puet faire en une fable

¹ Le Ms porte : *com.*

Ou en antroignes, ou en songes,
Ou en trufes, ou en mençonges.
Mais d'estoires d'autorité
Doit on dire la verité.

Sachiez que li chevaus ert tés
6600 Que de cui que il fust portés
Ne sambloit nule riens pesans,
Mais I petit ert encombrans
Pour la grandeur qui ert en lui;
K'à porter ne grevoit nului,
Mais que les chevilletes fussent
Tornées si qu'eles deüssent,
Uns petis enfes le portast
S'adroit les chevilles tornast.

Crompars lez la fontaine sist,
6610 Qui moult très volentiers veïst
Que aprochie fust la nuis;
Car ne li estoit pas deduis
D'iluec longuement demorer
Pour sa volenté achever.
Moult très durement souspiroit
Clarmondine, et moult s'esmaioit
Pour ce k'ert seule avoec celui
Qu'ele doutoit plus que nului;
Fol. 26 v°. Car ne savoit que cil pensoit
6620 Ne où il mener la vouloit.
Mais de tant moult bien li cheï
Que droit à ce point escheï
Que Crompars fu si deshaitiez
K'à paines pot ester sor piez;
Car, quant on mains garde s'en prent,
Vient maladie à plusour gent.

'A Clarmondine le dist lors.

— « Bele, fait il, trestous li cors
« M'est esmeüs si durement
6630 « Que malades sui vraiment.
« Un petit me reposerai,
« Seur vo giron me coucherai ;
« Espoir tost rassouageroie
« S'un petitet dormi avoie. »
Clarmondine li otria,
K'escondire ne li osa.
Droit en son giron s'est couchiez
Crompars. Moul't li douloit li chiés ;
Car maladie de chalour
6640 Li estoit prise celui jour

Entrues que Crompars là gisoit,
Clarmondine tous jours ploroit,
Et si regretoit tout adès
Pere et mere et Cléomadès.
Ses Diex moul't souvent reclamoit
Selonc la loi qui lors estoit.
De lermes estoit si moillie
La robe qu'ele avoit vestie,
Que pitiez ert à regarder.
6650 Au lés, par de devers la mer,
Vit gens venir qui reclamoient
Oisiaus, et lor loirres getoient
D'une part et d'autre souvent.
S'avint adont si faitement
C'uns de lor faucons abati
Une corneille près d'iki
Où Clarmondine ert et Crompars.
Parmi mares, parmi essars,
Venoient cele part corant
6660 Fauconnier durement huiant¹.

¹ « *Huant* » Ms. 7539.

Cil fauconnier qui là venoient
Au roi Meniadus estoient,
Qui en riviere esbanier
Estoit venus après mengier.
Lor faucons maintenant reprirent;
Droit si que au retour se mirent.
II des fauconniers se sevrerent
Des autres, s'avint qu'il trouverent
Devant aus, souz une aube espine
6670 Séant, la bele Clarmondine.

Chascuns d'aus moult se merveilla
Dont si bele riens venoit là.
Courtoisement l'ont saluée,
Et ele, com bien avisée,
Les respont moult très doucement;
Et li rois Crompars erramment
S'esveilla. Et lors s'est levez.
Dou mal qu'il ot fu enbrasez.

Li fauconnier moult s'esbahirent
6680 De cel home que si lait virent
Delez si très bele pucele
K'ainc mais n'orent veü si bele.
Au roi Crompart assez parlerent,
De son estre li demanderent,
Et Crompars, qui assez savoit,
Vers aus sagement se couvroit.

Li uns d'aus à l'autre conseille,
Et dient : — « Vez ci grant merveille
« C'une femme avons ci trouvée,
6690 « La plus bele qui ainc fu née
« Ne qui naistre puisse jamais;
« Et cis hom lez li est si lais !

« Dont puet venir tele assablée?
« Je croi miex que il l'ait emblée,
« Que ce qu'ele sa femme soit. »
Ainsi l'uns à l'autre disoit.

Lors di li uns : — « Je m'en irai
« 'A mon seigneur, et li dirai
« Bien hastéement ces nouveles,
6700 « Qu'eles sont diverses et beles. »
Li autre dist que part ara
En ce que li rois li donra,
Et pour aus garder remanroit
Dusqu'à tant que il renvenroit.
Et cis son gaaing li otroie.
Lors se mist tantost à la voie.

Montez fu sus I chaceœur.
Assez tost fu à son seignour.
— « Sire, fait il, nouveles sai
6710 « Par quoi de vous biau don aurai. »
— « Or, dites donc, » ce dist li rois.
— « Sire, fait il, delez ce bois
« Avons trouvé une pucele
« Assez plus que nule autre bele,
« Et le plus lait home avoec li
« C'onques en mon eäge vi.
« Une chose trop desguisée
« Ont là avoec aus aportée.
« Ne sai pas quel chose c'estoit;
6720 « Mais, ainsi com il me sambloit,
« Faite est à guise de cheval.
« Iluec ai laissié Robual¹,
« Vostre fauconnier, pour garder,

¹ « Robyal. » Msc. 7539.

« Et je vous sui venus conter
« Ceste aventure, par I si
« Que de mon gaaing part a mi.
« Dou trouver fumes compaignon,
« Et li gaains iert à parçon ;
« Car ainsi li ai en couvent. »

6730 Et li rois li dist erramment
Qu'il li donra, n'en soit doutiex,
Tel don dont chascun sera miex.
Et cil l'en a moult mercié.
Après ce n'a point detrié.

Le roi Meniadus mena
Là où son compaignon laissa.
Mais, entrues qu'il ont demoré,
Avoit Robual tout conté
'A Crompart l'estre dou pays,
6740 Qu'il ot demandé et enquis
Comment a non cele cité,
Et qui ert sires dou regné
De la terre où il ert venus.
Et cil li dist : — » Meniadus
« En ert rois et sires clamez.
« Ez¹ vous le roi parmi les prez. »

[R]obual vit le roi venant ;
Contre lui vint esperonnant.
— « Sire, fait il, par verité,
6750 « Bien ont nostre faucon volé
Fol. 27 r°. « C'une pucele avons trouvée
« Plus bele riens ne fu ains née.
« Sage et courtoise et bien parlant
« La trouverez, ce vous créant.

¹ « Hés. » Msc. 7539.

« De tant com de li ai apris,
« La lo moult en mon cuer et pris,
« Mais I home a à compaignon,
« Ne croi que plus lait veïst on. »

Quant Meniadus oï l'ot,
6760 Cele part, au plus tost qu'il pot,
S'en vint, et lors est descendus.
Droit vers Clarmondine est venus.
Courtoisement la salua,
Et Clarmondine se leva
Contre lui, son salu li rent.
'A Meniadus erranment
Sambla que de bon lieu venoit.
Mais durement se merveilloit
Où cil lais hom l'avoit trouvée,
6770 Ne pourquoi l'ot là amenée.
Lors fist de sa gent en sus traire
K'enquerre veut de lor afaire.

Quant sa gent furent en sus trait,
'A Crompart moult bel et atrait
Enquist trestout premierement
Dont vient, ne où va, ne comment
Là est venus, n'en quel contrée
Fu si bele femme trouvée.
Crompars dou tout li respondi
6780 Selonc ce qu'il i aferi.
De son afaire à point couvrir
Sot moult très bien à chief venir.

Meniadus li demanda
De la pucele qui ert là
S'il l'avoit tolue ou robée,
Ne s'ele ert sa femme espousée.

Et cil dist que sa femme estoit
Et que espousée l'avoit ;
Et dist qu'il ert fisiciens
6790 Et si estoit bons surgïens,
Et k'à Salerne aloit manoir,
Et que là vorroit remanoir ;
Car moult ert Salerne loée
Et prisie en mainte contrée ¹.
— « Pour ce i vorrai demorer. »

Lors prist Clarmondine à plorer,
Qu'ele ne sot le meilleur faire
Ou de li nommer, ou de taire.

Meniadus l'a regardée.
6800 Moult la vit souple et explorée.
— « Bele, fait il, entendez ça ;
« Dites moi de cel home là
« Se vous le tenez à baron. »
— « Par mon chief, biau Sire, je non ;
« Jà nel sera n'ainc ne le fu. »
Quant Crompars a ce entendu,
Si durement fu esbahis
Et desconfortés et marris,
K'à paines vous porroit nus dire
6810 Le grant corrous qu'il ot, ne l'ire.

Bien voit k'en mençonge iert trouvez
De ce dont il fu oposez ;

¹ Cette ville possédait une école de médecine, qui fut fondée au ix^e siècle dans un monastère de Bénédictins, et dont l'enseignement acquit une grande importance vers l'an 1086, grâce au médecin africain Constantin de Carthage. C'est de cette école que sortit le fameux *Regimen sanitatis Salernitanum*, dont les préceptes rimés constituèrent le principal corps de doctrine médicale et hygiénique du moyen âge.

Bien voit que il est deceüs.
Malades fu et esmeüs;
Car forment li touche et anoie
Que la bele pucele noie¹
Que ele sa femme n'est point.
C'est la chose qui plus li point.

Bien voit que n'a cure de lui.
6820 Moult li tournoit à grant anui
De ce qu'ele l'ot detriié
Par paroles et pourloignié;
De tout à deceü se tient.
Rois Meniadus avant vient;
'A Crompart dist qu'il enveuroit²
En son chastel, là connoistroit
Qui il ert ne de quel contrée,
Ne dont la pucele estoit née.
Car iluec plus n'en enquerroit
6830 Dusqu'à tant c'u chastel seroit.

Meniadus ainsi parla
Que en son chastel l'enmenra.
Là sara tout à tans adont
Que il quierent ne quel gent sont
Ne quel merveille ce puet estre.
Iluec ot palefrois en destre
C'on ot fait pour lui amener.
La damoisele fist monter
Li rois, tout errant, à sa gent
6840 Qui le firent moult liement;
Car pour la grant biauté de li
Estoient trestout esjoï.

¹ *Nie.* Le Ms. porte : « *n'oie.* » Voir plus loin vers 6866.

² « *Envorroit.* » Ms. 7539.

Que vous iroie je contant ?
Crompart firent monter errant
Sor I des chaceours le roi.
Son chevalet prist delez soi,
Car en lui grant fiance avoit
D'eschaper quant il li plairoit.
Mais de ce n'avoit nul talent;
6850 Ains pensoit en son cuer comment
Clarmondine mise r'eüst
Arrier sus son cheval de fust,
Car moult tost eschapez seroit
Se de li resaisis estoit,
Et pense que, quant la r'aura,
Que mais ne la deportera
Qu'il n'en face tout son plaisir,
Quoi k'après en puist avenir,
Ne comment qu'il li viengne en gré,
6860 Il en fera sa volenté;
Et pense que mais à nul jour
N'aura vers lui pais ne amour
Pour ce que ele avoit dedite
La parole k'au roi ot dite
Quant pour sa femme la clama
Et ele dou tout le noia.
Tart en venra à repentir
Se seul à seul la puet tenir.
Mar l'a deceü n'engingnié :
6870 Ele en aura mauvais marchié.

Tout ainsi com je vous le di,
Sont ensamble de là parti.
'A Salerne s'en retournerent.
Clarmondine moult regarderent
Ainsi com il s'en repairoient ;
L'uns à l'autre moult en parloient ;

Chascuns forment s'esmerveilloit
De la grant biauté qu'ele avoit.

Li rois vint dedens son chastel.

6880 Mais, cui que il soit, lait ne bel,
Clarmondine ne desplot point,
Que sa chose fu en tel point

Fol. 27 v^o. Selonc ce qu'il ert avenu.

Fu lie que ainsi li fu.

Fors des mains Crompart se véoit,
C'ert tous li confors qu'ele avoit.

Quant ou chastel furent entré,
Clarmondine, moult très soué,
Jus dou palefroi descendirent.

6890 'A chascun plot ce k'en li virent.

Liez ert qui servir la povoit,
Pour ce que si très bele estoit.

Quant la nouvele a entendue
La mere au roi, que là venue
Ert une pucele si gente,
Entre li et sa fille Argente
Issirent fors, pour li veõir.

Moult desiroient à savoir
S'ele ert si bele qu'il disoient,

6900 Car nului croire n'en vouloient.

'A Clarmondine vinrent droit;
Et, quant Clarmondine les voit,
Li cuers moult li rassouaga
Que avoec femmes se trouva.
Comme sage et bien avisée,
A la mere au roi saluée,
Et sa suer, qui tantost la prist
Par la main, delez li la mist.

Moult près de li l'a acostée ;
6910 Car moult ert sage et avisée.
Plus que on dit ne lor avoit
Estoit bele, ce lor sambloit.
En lor chambre l'en ont menée ;
Sage et courtoise l'ont trouvée
Et de bonne maniere plaine.
De li servir chascuns se paine ;
Pour sa douce gentill maniere
L'ot chascuns d'aus erranment chiere.

Crompars et li chevaus estoient
6920 En la sale. Là s'assamblaient
Cil dou chastel communament.
Moult se merveilloient forment
Et dou cheval et de celui
Qui avoit au cuer grant anui ;
Car bien véoit qu'il ert honnis.
Miex vousist estre mors que vis ;
Car bien vit que perdue avoit
Clarmondine ; mais ne l'auroit.
Cela li touche au cuer et cuist,
6930 Et sa maladie li nuist.

Savez qui l'assailloit forment ?
Ce qu'il ne véoit tour comment
Sa chose en mauvais point ne soit.
Car, se Meniadus savoit
Comment sa besoigne est alée
Et comment il avoit trouvée
La pucele qui estoit là,
Et com faitement il l'embla
Par son malice et par sa guile
6940 Dedenz le jardin de Sebile,
Il i porroit tel chose entendre

Qu'il le feroit ardoir ou pendre ;
Et, se il est en prison mis,
Si rest il aussi bien honnis.
Car, se Cléomadès savoit
Qu'il fust là, tantost i venroit ;
Et, se de lui estoit trouvez,
C'est passé, il seroit alez ;
Car par lui seroit tost prouvé
6950 Ses mesfais et sa fausseté.

De Clarmondine repensoit
Que ele tout à plain diroit
Kan c'on li vorroit demander,
Ne feroit force dou celer.
Ne set qu'il puist dire ne faire.
En mauvais point voit son affaire
Entre tourment et maladie ;
Ont sus sa santé grant envie
K'entre aus II l'assaillirent si
6960 Que en frenesie cheï.
Car anuis le fist trebuchier
Si k'ains puis ne pot redrecier.
Le cuer maté, le cors vaincu
Ot, si qu'il ne sot où il fu.

Lors est li rois Meniadus
Là endroit à Crompart venus ;
Car il li vorra demander
Dont il vient ne où doit aler,
Et qui la damoisele estoit
6970 Que avoec lui ainsi menoit.
Li rois moult près de lui s'est trais.
Moult très à point et moult en pais
Li a demandé et enquis
Dont il ert ne de quel pays,

Et comment il avoit à non.
Mais cil ne dit ne o ne non.

Moult longuement à lui parla
K'ains Crompars I mot ne sonna
Qui ressamblast ne tant ne quant
6980 Ce dont il l'aloit araisnant ;
Car d'anui et de maladie
Estoit cheüs en frenesie.
Et Meniadus entendoit
Que cil là le contralioit
Et que respondre ne li daigne ;
S'en ot grant ire et grant engaigue.

Lors jura sa loi erranment
Que, se tost et apertement
Ne dit ce que il li demande,
6990 Que souffrir angoisse très grande
Li fera, et enprisonner,
Et telement enchaienner,
Que à tart s'en repentiroit
Se il de lui plus se mokoit.
Et cil assez plus que devant
Aloit erluises respondant,
Com cil qui n'ot point d'escient
Ne avis ne apensement.
Ne plus ne mains parloit com cis
7000 Cui entendemens est faillis.

Et lors le commanda à prendre
Meniadus, sans plus atendre.
Et, quant sa gent l'ont entendu,
Après ce n'ont point atendu,
Ains l'ont en la prison mené
Et fortement enprisonné.
Iluec [il] demora tous seus.

Tant fu destrois et'angoisseus
D'anui, de mal et de prison,
7010 Que pas ne peüst par raison
En tel point longuement durer.
Morir le convint et finer.

Ainsi diversement fina ;
Fol. 28 r°. Car ses malices l'engingna.
On dist pieça en reprouvier
Que tex cuide autrui engingnier
Et faire damage et anui
Qui le fait meïsmes à lui.
Aussi dou roi Crompart avint.
7020 Par malice à male fin vint.
Qui malice veut maintenir
Bien doit à male fin venir.

Ses gardes vinrent léens lors
Droit après ce que il fu mors.
Quant voient que li cors se gist,
Bien cuidierent qu'il se dormist.
Entre aus forment le mançoient
Pour ce k'esmaier le vouloient.

Li un dient c'on l'arderoit,
7030 Li autre c'on l'ecorcherait.
De chascun estoit dejugiez.
— « Dormez vous, font il, ou veilliez ?
« Sires vilains, nel celez mie,
« Dont vous vint si très bele amie
« Que ici avez amenée ?
« Bien savons que l'avez emblée ;
« Malement estes arrivez,
« Se longuement le nous celez. »

Lors sont tout entour lui venu.

7040 Dist l'uns : — « Trop i avez geü,
« Ne faites pas ci le truant. »
Lors le drecent en son séant.
Et cil tint la teste baissie
Qui n'avoit en lui point de vie.
Li uns le chief li relevoit,
Et li autres le soustenoit;
Li tiers disoit que mal ert fait
Que on li faisoit tant de lait.

Tantost virent que mors estoit
7050 Quant soustenir ne se povoit.
Chascuns tous esbahis en fu.
'A Meniadus sont venu.
Avoec sa mere la royne
Ert pour parler à Clarmondine.
'A merveille la regardoient
Tout cil qui là endroit estoient
Pour la très grant biauté de li.
En la chambre, trestout enmi,
S'en vinrent cil qui ont conté
7060 Que le lait home ont mort trouvé.
Si haut l'ont dit k'oyr le porent
Tout cil qui là oyr le vorrent.
De ceaus qui en la chambre furent
Plusour cele part s'en corurent.
Mort le truevent, merveille en ont.
Tout errant enterrer le font.

Clarmondine, quant l'entendi,
Durement en fist l'esmari.
En faisant samblant de plorer,
7070 Prist en son cuer à aviser
Que se vers aus se descouvroit
Jamais eschaper ne porroit.

Pour ce de li nommer n'ot cure,
Qu'ele en redoutoit l'aventure,
N'ele ne revéoit comment
Peüst revenir nulement
Au lieu dont ele estoit venue.
Esbahie ert et esperdue.
Volentiers aucun tour trovast
7080 Comment sauvement eschapast.

Se dolente ert, ne m'en merveil;
Car seule ert et sans nul conseil
En país divers et lointain.
Argente la prist par la main,
Qui de li avoit grant pitié;
Lors li a doucement priié
Par amour, qu'ele ne s'esmait,
Car bien sache ele entresait
Que en sa chambre o li gerra
7090 Ne que nul mal sans li n'ara.

Clarmondine moult en fu lie.
'A mains jointes moult l'en mercie,
'A genous l'en a enclinée;
Mais tost l'en a sus relevée
Argente, qui moult fu courtoise.
De Clarmondine moult li poise
Que si voit de cuer à meschief;
Moult li touchoit, moult li ert grief.
Se bien la seüst conseilier,
7100 Ne s'en fesist gaires priier.

Meniadus lors s'avisa
Que de son estre n'enquerra
Dusqu'à tant que miex reposée
Sera; car moult sambloit lassée.
Et, pour ce que cil mors estoit

Qui là amenée l'avoit,
Ne la vouloit pas trop coitier ¹,
Ne si tost son estre encerchier.
Mais sachiez bien certainement
7110 Que tout son cuer entierement
Li ot Meniadus donné;
Et bien avoit jà enpensé
Que il à femme la prendroit,
Ne pour nului ne le lairoit,
Quel qu'ele fust, ou povre ou riche.
Ses cuers à ce faire s'afiche;
Car son cuer avoit jà tout pris
Amours, et en sa prison mis.
Cele prison moult li plaisoit,
7120 Car ses cuers ainsi le vouloit.

Car adont tel coustume avoient
Li grant seignor, qu'il ne chaçoient
Terre ne tresor ne avoir,
Mais que il peüssent avoir
Bele pucele et bien taillie,
Estraitte de bonne lignie;
Mais, que pour bonne fust tenue,
Ainçois fust prise toute nue,
Que ne fust une empereris
7130 Laide et lourde en fais et en dis.
Mais or n'en veut on nule avoir
Bele ne bonne à pou d'avoir.
'A grant honnour atournoit on
Roi ou conte, duc ou baron,
Quant en tel point se marioit;
Tous li mondes l'en gracioit.
Mais au jour d'ui passe richece

« Ne la vouloit pas courroucier. » Ms. 7539.

Bonté, biauté et gentillece,
Si que en maint lieu est parant :
7140 Mais de ce me tairai atant.

Meniadus, qui espris fu
Dedenz le cuer d'amoreus fu,
Clarmondine a sa suer baillie
Qui moult de cuer l'a aaisie.
Congié prist. Lors s'en est tornés.
D'amours estoit si atornés
Fol. 28 v^o. Qu'ele le tenoit en ses las ;
Ce li ert deduis et soulas.
Mais onques mais seü n'avoit
7150 Comment amours les siens menoit.
Ses cuers ne pensoit k'à amours ;
N'avoit nule pensée aillours.

La mere au roi moult honnora
Clarmondine, et moult enpensa.
Dame estoit de moult bon afaire,
Et avoit à non Bien-doit-plaire :
C'est des nons de çà en arrier.
Moult fist cele dame à prisier.
Entr'ele et Argente honnorerent
7160 Clarmondine, et moult enpenserent¹ ;
Assez plus que je ne vous di
Furent très soigneuses de li.
N'est nus cui ele n'agréast
Qui par loisir la regardast.

Dusqu'à lendemain demora
Meniadus. Lors revint là.
N'ot pas toute la nuit dormie ;

¹ « *Empensserent.* » Ms. 7539.

Tenu li orent compaignie
Penser amoreus, qui souvent
7170 Ont fait veillier à mainte gent.
Amours vers li saisi le tint.
Vers la chambre sa mère vint;
Car moult très volentiers sauroit
Qui cele damoisele estoit
Cui il avoit si enamée.
Il et sa mère l'ont mandée.

Argente, sa suer, l'amena.
Li rois contre ele se leva.
Tout IIII en la chambre s'assirent.
7180 'A Clarmondine moult enquirent
De son estre et de son afaire.
Mais ains ne la porent atraire
'A ce que ele leur deïst
Cui ele ert : envis le feïst.
Meniadus li demanda
Dont ele ert, et dont venoit là,
Et qui estoit cil laïs vilains
Qui l'avoit eüe entre mains;
Et dou cheval, qu'il senefie,
7190 Li pria moult qu'ele li die,

Clarmondine la debonaire
Li dist : — « Sire, n'avez que faire
« De savoir si faite besoigne.
« Avoir devroie grant vergoigne
« Se je le voir vous en disoie,
« Et à envis vous mentiroie.
« Puisque vous plaist que je le die,
« Je le dirai, mais c'iert folie;
« Car moult petit me priserez
7200 « Quant la verité en sarez. »

Li rois dist que savoir le veut.

— « Sire, puisque faire l'estuet, »
Fait ele, « et je le vous dirai,
« Jà pour honte ne le lairai. »

Lors li a dit moult doucement :
— « Biau Sire, sachiez vraiment,
« Vers les mous de Mongieu¹ fui née:
« Ou pays m'apele on Trouvée.
« Trouvée fui je voirement,
7210 « Et, pour ce, ai non ensement.
« Ains ne connui pere ne mere
« Ne parent ne serour ne frere.
« Ne sai cui je sui, ce sachiez.
« Si m'est avenu grans meschiez
« Quant mes sires qui m'a nourrie
« Est mors, s'en sui moult esmarie.
« Povre meschine me trouva.
« Trois ans a que il m'espousa.
« 'A grant honnour m'a puis tenue,
7220 « Et bien chaucié et bien vestue.
« Encor pert à mon vestement
« K'assez me tenoit netement
« Mes sires, selonc son pover.
« Si m'en doit moult li cuers doloir
« Quant j'ai perdu mon bon seignor
« Qui me portoit foi et honnor.
« Dou cheval de fust qu'il menoit
« Vous dirai, que il en faisoit.
« Sachiez k'ains mieudres menestrés
7230 « De lui ne fu ainc nul jour nés.
« Tant fu soutiex et de bon sens

¹ Monza, près de Milan? Comp. v. 6355.

- « Qu'il savoit de tous instrumens
« Quan que nus en povoit savoir.
« Assez nous gaaignoit d'avoir
« Dou cheval de fust qu'il avoit ;
« Car si bien jouer en savoit
« Que c'ert merveille à esgarder.
« Le cheval faites bien garder,
« K'encore porroit tex venir
7240 « Qui en saroit à chief venir.
« Je croi bien que moult vous plairoit
« Li jeux de lui qui en saroit.
« 'A Rome ert mes sire arrestans.
« Là estoit riches et manans.
« Assez avoit et un et el
« Si comme afiert à menestrel.
« Là sont trestout si estrument
« Qui valent I granment d'argent:
« Harpes, rotes, gigues, violes,
7250 « Leuüs, quitaires et citoles,
« Et tinpanes et micanons,
« Rubebes et salterions.
« Tabours et muses et flaios
« Y a assez, grellles et gros ;
« Flahutes d'argent traversaines,
« Estives, cornes et douçaines,
« Et d'autres instrumens assés
« Que ne vous ai pas tous nommés.
« Se j'ere là, j'es venderoie
7260 « Et de l'argent me cheviroie
« Car de nul instrument ne sai.
« Si sui en moult très grant esmai
« Comment en mon pays resoie.
« Un petit sai ouvrer de soie,
« Par quoi bien ma chevance eüsse
« Se je en mon pays refuse.

« Or vous ai dit la verité
« De ce que m'avez demandé.
« Seule sui et desconseillie,
7270 « S'en sui dolente et esmaie,
« Car je me doi bien esmaier. »

Lors commença à lermoier.
Li rois l'a moult bien regardée
Entrues que la chose a contée,
Et que plus li rois la véoit,
Plus l'amoit et plus la prisoit.

Dist li rois : — « Bele douce amie,
« Ceste parole ne siut mie¹
Fol. 29 r°. « Cele que me deïstes ier ;
7280 « Car je vous oy bien noier
« Que cil pas vos barons n'estoit,
« Ne jà nul jour ne le seroit.
« Or en dites vous le contraire
« De ce k'ier vous oy retraire ;
« Car vous dites certainement
« Que sa fenme estes vraiment.
« Or ne sai pas bien de ce croire
« Laquele parole est plus voire,
« Ou cele d'ui, ou cele d'ier. »

7290 — « Mais qu'il ne vous d[oj]ie anuier, »
Fait Clarmondine, « je dirai
« Pour quel raison ier le noiai.
« Sachiez qu'il m'avoit laidengie
« Et detirée et desachie,
« Et m'avoit durement ferue ;
« Et, pour ce que il m'ot batue,

¹ « *N'ensuit mie* ». Ms. 7539.

- « Li dis que jel courrouceroie
« Si tost que faire le porroie.
« Ma revenjance à point me vint,
7300 « Quant à cele heure m'en souvint
« De lui en tel point renoier :
« Plus nel peüsse courroucier.
« Sachiez que mauvais gré me sai
« K'ains mon bon seignor renoiai
« Qui si souef m'avoit norrie;
« Moul't en sui dolente et irie.
« Plus m'amoit que lui ne autrui,
« Mal l'ai guerredonné à lui;
« Ce me fist sotie et enfance.
7310 « Moul't en sui en grant repentance.
« Ier toute jour fu deshaitiez;
« Chau's ert, si li douloit li chiés.
« Bien m'en deüsse estre gardée,
« Se je fusse bien avisée,
« Puis que malade le seüsse,
« Que je courroucié ne l'eüsse ;
« Car je croi bien que li corrous
« Qu'il en ot, le mist au desous,
« Par quoi mors est soudainement. »

7320 Et quant Meniadus entent
Ce que Clarmondine ot conté,
Tout le retint en verité.
Ne fist force à la mort celui.
Plus en avoit joie k'anui;
Car à Clarmondine la gente
Avoit mise toute s'entente.

Lors pensa k'à li parleroit
Et que son pensé li diroit.
Meniadus plus ne detrie.

7330 Par la main blanche l'a saisie;
En sus des autres un petit
Le mena seoir sus I lit;
Vousist ou non, la fist seoir
Li roi lez lui par estouvoir ¹.

Quant longuement orent parlé
Et assez li ot demandé
De son afaire et de son estre
Pour savoir que ce porroit estre,
Pensa que il li requerroit
7340 S'amour, savoir qu'ele diroit.
'A li parla moult longuement,
Et ele debonairement
Et sagement li respondoit,
Selonc ce qu'il li demandoit.

Sage et courtoise la trouva.
S'avint que la chose torna
'A ce qu'il liquist s'amour.
Lors ot Clarmondine paour,
Et durement fu esfrée.
7350 De delez le roi s'est levée,
Et li rois la r'assist lez lui.

— « Bele, fait il, n'aiez anui,
« Ne ne soiez point esperdue
« Pour ce se je à vous me jue;
« Ne vous devez si esfréer,

¹ Ici se trouvent dans le Ms. 7539 les deux vers suivants qui manquent dans celui de l'Arsenal :

« *Moult de choses li demanda*
« *Que Clarmondine li céla.* »

- « Car je ne me faz fors jouer.
« 'A envis vous courrouceroie;
« Car plus aim vo pais que la moie.
« Si m'a seurpris vostre biauté
7360 « Et vostre debonairété,
« Et la maniere k'en vous voi,
« Que mon cuer et mon cors otroi
« Et mon roiaume entierement
« Tout à vostre commandement.
« Ne sai se distes voir ou non
« Que vous Trouvée aiez à non;
« Mais, de quel lieu que vous soiez,
« Trestout certainement sachiez
« Que ma fenme espouse serés
7370 « Et coronne d'or porterés.
« Cui que il soit, ne biau ne lait,
« Estre le couvient entresait.
« Sachiez pour nului nel lairoie
« Ne soie vostre et vous moie.
« Ce ne vous quier je plus celer,
« Et, pour vous mièx asseürer
« De ce que en couvent vous ai,
« Maintenant vous espouserai.
« Car mes cuers 'e m'a commandé,
7380 « Et j'en ferai tout à son gré;
« N'ainc mais riens ne me commanda
« Si à certes com ce fait a.
« Moult me tient court que vostre soie
« Et je dou tout à vous m'otroie.
« J'ai bien fait son commandement;
« Car si ai ge amendement
« Que, se g'ere sires dou monde
« Tant com il dure à la roonde,
« Se m'a mes cuers fait tel commant,
7390 « Que j'en feroie tout autant.

« 'A ma dame ma mere irai ;
« Ici endroit vous laisserai. »

Quant Clarmondine l'entendi,
Moult durement s'en asoupli.
Or ne set qu'ele faire puist.
Cele parole au cuer li cuist
Que Meniadus li ot dite ;
De cuer fu forment desconfite.
Meniadus sa mere apele

7400 Et sa suer Argente la bele,
Lors les atrait à une part.

— « Moult me samble de bone part

« Ceste damoiselle, » fait il.

« Je sui mors et mis à essill

« Se je ne l'ai. Tant vous en di

« K'ains si bele de li ne vi.

« Il n'est nus qui ne l'eüst chiere,

« Tant a gracieuse maniere.

« Onques si aie je santé

7410 « Ne vi fenme si à mon gré.

Fol. 29 v^o. « Or vueilliez dont qu'ele soit moie,

« S'il vous plaist que mariés soie ;

« Dont vous i vueilliez acorder,

« Ou mais ne me quier marier.

« Puis que Diex la m'a envoie,

« Par moi iert amée et chierie.

« Or, alez, s'en parlez à li,

« Vous et ma suer, je vous en pri.

« Ma fenme sera, c'est passé,

7420 « Vueilliez que ce soit par vo gré.

« Car qui tout le mont me donroit

« Mes cuers de li ne s'osterait ;

« Ne place Dieu que soie tés

« Que mes cuers soit de li ostés,

« Et cil qui le me loëroit
« Ma vie et ma santé harroit. »

Dist la mere : — « Estes vous dervez,
« Qui tel fenme prendre voulez
« Que nus ne set dont ele vient? »

7430 — « Ma dame, à estre le couvient :
« Amours le veut, et je aussi.
« Or vueillez dont qu'il soit ainsi;
« Car ainsi à estre l'estuet,
« Puis ce di que amours le veut.
« Jà ne croirai jour de ma vie
« Que ne soit de gentill lignie
« Fenme en cui a tant de bonté
« Et de sens plain d'umilité.
« Quoi qu'ele nous face entendant,
7440 « De bon lieu vient, mon esciant. »

Meniadus dit tant leur a
Que chascune s'i acorda.
Devers Clarmondine erranment
Revinrent tout troi liement.

La mere au roi lès li assist
Clarmondine, et puis si li dist
Que ele sa fille seroit;
Car li rois ses flex le vouloit,
Et ele aussi bien s'i assent.
7450 Et, quant Clarmondine l'entent,
Moult li anuie et moult li cuist,
Que ne set comment ele puist
Trouver voie pour eschaper.
Ains se lairoit le chief couper
Que ce mariage preïst.

Tous li cors li tramble et fremist ;
Volentiers querist aucun tour
Par quoi ele sauvast s'onnour.

Clarmondine lors s'avisa

7460 Qu'ele le hors dou sens fera.
C'est dou miex qu'ele faire puet.
Puis que cis rois avoir la vuet.
Car bien pense, s'il la véoit
Dervée, pas ne la prendroit.
En ce a mis tout son assens
Qu'ele fera le hors dou sens ;
Mais ce ne sera jusqu'à tant
Qu'ele ne porra en avant.
Ainsi pensa qu'ele feroit,

7470 Car nul si bon tour ne véoit,
Et bien se prist à aviser
Que trop se porroit bien haster ;
Car, se en sorsaut le faisoit,
Espoir c'on s'en apercevrait.

'A la mere au roi respondi.

— « Dame, fait ele, Dieu merci
« Que je fui à tele heure née
« Que j'ai si bonne destinée,
« Que je vieng celui à plaisir
7480 « Dont tant de bien me puet venir.
« Se je tele honnour refusoie,
« Bien sai que folie feroie.
« Quant Diex m'a donné tel chéance
« Si tost après ma meschéance,
« Je ne le quier pas refuser,
« Et je vous vorrai honorer. »

Fait la royne : — « Bele fille,

« Car dont tenroie je pour vill,
« Mon fill, se sa femme n'amoie.
7490 « Je vous amerai com la moie. »

Et Clarmondine l'en mercie,
Comme sage et bien ensaignie.

Moult près de Clarmondine estoit
Argente, et moult la conpaignoit,
Et li disoit tout autre tel.
Mais Clarmondine pense à el.
Pour aus decevoir soutilment
Parloit dou tout à leur talent.
Moult très sagement s'otria
7500 'A faire kan c'on li rouva ;
Mais tout adès estudioit
Conment miex eschaper porroit.

Au roi Meniadus parla.
— « Sire, fait ele, entendez çà ;
« Puis k'ainsi est que me voulez,
« Li grans Diex en soit aorez.
« Ce doi je bien prier de cuer.
« Mais je ne vorroie, à nul fuer,
« Que vous feïssiez pour m'amour
7510 « Riens qui tornast à deshonnour,
« Sire, ne à vous ne à moi.
« Or, vous dirai raison pourquoi
« Je ai ceste parole emprise.
« Sachiez [que], se vous m'aviez prise '
« Si tost après la mort celui
« Qui m'amena ci avoec lui,
« Et cui g'ere fenme espousée,

' Le Ms. porte : « *Sachiez se vous m'aviez prise.* »

- « Tantost courroit la renommée
« Que vous fait ocirre l'aurez
7520 « Pour ce que avoir me vouliez.
« S'en parleroit on sor nous II,
« Et mauvaise haste n'est preus.
« Laissez ceste nouvele aprendre
« Et par tout vo pays estendre,
« Si que tout sachent la venue
« Conment sui en vos mains venue,
« Et conment mes barons moru
« Si tost k'en la prison mis fu.
« Et ci en dedenz mousterrez
7530 « 'A vo conseil, se vous voulez,
« Que vous tel chose voulez faire.
« Espoir n'en seront pas contraire;
« Car d'aus ne font pas mariage
« Volentiers sans conseil li sage.
« Maintes fois en a on repris
« Ceaus qui sans conseil s'i sont mis. »

- Savez pourquoi ele disoit
Ces poms que ele ainsi moustroit?
Pour ce que volentiers quéist
7540 Aucun tour, se ele pouist,
Tant que la chose detriast,
Par quoi cele nouvele alast
Tant que Cléomadès seüst
En quel pays venue fust.
Car bien pensoit k'autel anui
Avoit pour li, qu'ele pour lui,
En tant comme cuers puet doloir
Pour grieté ne pour duel avoir,
Et que il cele part venroit
7550 « Je ne vous tenrai pas pour ville
« Puisque serez fenme mon fill;

Se de li nouveles savoit.
Tant les tint là à parlement,
Que la mere au roi s'i assent.
Et aussi fist sa fille Argente.
N'i a nule ne s'i assente.
Et li rois bien s'i acorda
Et dist que bien raison y a.

Li rois pria à la pucele
7560 Que plus Trouvée ne s'apele ;
Car si fais nons n'est pas plaisans,
Ne gracieus ne avenans ;
Ne ne vourroit pas que seüst
Tous li mons que trouvée fust,
Ne jà de ce ne parleroit
'A son conseil quant il venroit.

— « Sire, fait ele, autre non n'ai ;
« Ne pourquant vo plaisir ferai.
« Trouvée ainsi m'apele on.
7570 « Or vueil avoir Perdue à non ;
« Car moult diversement se mue
« Li nons de Trouvée et Perdue.
« Ce non vueil avoir dusqu'adont
« Que vostre baron vous auront
« Conseillié de ceste besoigne ;
« Car moult auroie grant vergoigne
« S'il ne vous vouloient loër
« Ce que je doi tant desirrer.
« Mais, quant ce aura pris termine,
7580 « Dont aurai je à non Royne.
« Cis nons bien plaie me devoit
« Se ainsi avenir povoit
« Que Royne fusse nommée :
« Ce seroit bonne destinée. »

Meniadus dist ce sera
Au plus tost qu'il onques porra.
Mais à ce non sornon couvient;
Car biaux sornons moult bien avient.

— « Bele Perdue non aurez,

7590 « Puis qu'il vous plaist. » — « C'est bien mes grez, »
Fait Clarmondine, et lors li prie
Que sans plus trois mois le detrie.
Tant li dist et tant li pria,
Que Meniadus l'otria.

Ainsi le firent que vous di.
De là endroit se departi
Meniadus. Lors a mandé
Les grands barons de son regné.
Et la mere au roi enmena
7600 Clarmondine. Moult l'onнора.
Entre li et Argente estoient
Adès ensamble. Moult s'amoient.
De jour en jour monteplioit
La grace que de tous avoit.
'A tous se fist la bele amer.

Sa gent ot fait li rois mander.
Quant à Salerne venu furent
Li baron, ainsi com il durent,
Devant le roi Meniadus
7610 Est chascuns des barons venus.
Lors lor a li rois devisé
Ce pour quoi chascun ot mandé
De point en point, bel et adroit
La chose ainsi qu'il la vouloit;
Et fist à tous moustrer celi
Pour cui amours le destraint; si
Que, plus la pucele véoient,

Plus lor plaisoit, plus la prisoient,
Et disoient que droit avoit
7620 Li rois qui prendre la vouloit,

Que vous feroie je lonc plait?
'A chascun a tant dit et fait,
Que tout li ont dit et graé
Que il face sa volenté.
Chascuns dist que, se il avoit¹
X roiaumes, qu'il prenderoit
La fenme que il veut avoir,
Où tant a biauté et savoir
C'on n'en porroit plus souhaidier ;
7630 Ne souhais n'i auroit mestier ,
Car souhais, à tout regarder,
N'i porroit de riens amender.
Ainsi chascuns li loe et dist ;
Et li rois de joie en sozrist.
Cis consaus li fu bien séans
Et en son cuer douz et plaisans.

Ainsi la chose demora
Tant que li termes aprocha
K'acompli furent li troi mois.
7640 Lors vint Meniadus li rois
Tantost parler à Clarmondine,
Et li dist que ele iert royne
De Salerne ains tiers jour passé.
Lors a la bele souzpiré ;
Car n'ot nouvele qui li plaise.
Moult fut dolente et à mesaise.

Bien set, se ele se nonmoit,

¹ Le Ms. porte : « *Chascuns dist que se il l'avoit.* »

Que cis à force la prendroit ;
Et, se à son pere la rent,
7650 Ele set bien certainement
K'à Bleopatris la donra,
Et Cléomadès perdu a.
Car ses peres n'en mentiroit
Pour riens, se vers lui la r'avoit :
En couvent l'a à Balcabé.
Moult avoit le cuer trespensé
Qu'ele ne voit en son afaire
Riens nule qui li puisse plaire.

Pour ce en son cuer s'assentoit
7660 Qu'ele le hors dou sens feroit ;
Car or n'i voit ele autre tour
Que celui à sauver s'onnour,
En espoir d'estre retrouvée
De celui à cui s'est donnée.
Se maintendra dervéement ;
C'est ce à quoi ele s'assent,
Qu'ele ne vorroit autre avoir,
Pour nul or ne pour nul avoir,
Que Cléomadès, c'est passé :
7670 'A celui a son cuer donné.

Lors commença à regarder
Diversement, et à parler
Paroles ce devant derriere.
Tost ot muée sa maniere.
Fol. 30 v°. Aussi k'en sorsaut s'est levée,
Par deseure I lit s'est getée.
Lors a saisi I oreillier ;
As dens le prist à depecier.
Moult diversement se maintient.
7680 Tout descire quan qu'ele tient.

Cil qui là furent sus saillirent
Tantost k'en si fait point la virent.
Bien cuidierent certainement
K'ele eüst perdu l'escient.
'A Clarmondine sont venu ;
Et, quant ele a le roi veü,
Par la chevece le saisi,
Si que ele li derrompi.
Et li rois, qui moult fu courtois,
7690 Li osta ses mains et ses dois
Au plus doucement que il pot,
Car nul mal faire ne li vot.

Lors acoururent sans targier
Chambellenc, vallet et huissier
Pour la noise que il oyrent.
Dedenz la chambre s'enbatirent.
Quant Clarmondine en tel point voient
Que entre leur bras la tenoient
Li rois et sa suer et sa mere,
7700 Moult lor fu la nouvele amere.
Quant il sorent le couvenant
Pour quoi il l'aloient tenant,
Mainte lerne ot iluec plorée ;
Car tout l'orent jà enamée.
Moult très doucement l'ont loie
Pour li garder d'estre blecie.

Quant Clarmondine loie ont,
Li plusour pour li grant duel font ;
Car chascuns cuidoit qu'ele fust
7710 En tel point que ele n'eüst
En li sens ne discrecion
Ne entendement ne raison.
Car, entrues que loie estoit,

De mordre grant samblant faisoit
Après ceaus qui lez li estoient
Et qui pour son bien la tenoient.

Moult fu li rois Meniadus
Pour li dolenz et irascus.
De duel mainte lerne plora
7720 Et pour li maint souzpir geta.
Pour li fu ses cuers si iriez,
Si dolens et si corrouciez,
Qu'il ne set qu'il puist devenir.
Plus het sa vie que morir.

Se li oïssiez regreter
Son non, et par raison prouver
Qu'ele avoit ore non adroit,
Car Bele ert et Perdue estoit.
— « Hé! las! pourquoi l'ai je perdue?
7730 « Las! pourquoi est dou sens issue?
« Las! dolans, pourquoi la vi je onques?
« Comme il me mescheï adonques
« Que je la vi premierement,
« Quant je la pert si faitement!
« Vrais Diex! se c'est par mon pechié,
« Je vous pri que aiez pitié
« De li, et si la secorés
« Et son meschief sur moi metés.
« Si m'aït Diex, je le vorroie :
7740 « Son mal miex de li porteroie. »

Ainsi Meniadus disoit.
La pucele moult regretoit.
Sachiez que moult avoit cil rois
Fin cuer et gentill et courtois.
Quant vit qu'il estoit ensement,

Et qu'il ne seroit autrement,
Et k'amender ne le porroit
Jusqu'à tant que à Dieu plairoit,
D'un moult courtois point s'avisa.
7750 X damoiseles arréa
Qui entour Clarmondine iron
Et nuit et jour la garderont.
Car ses cuers point ne se desvoie
De li amer, pour riens qu'il voie;
Ains pense bien que il l'auroit
'A fenme, s'ele garissoit.

Moult fu de cuer triste et irie
Argente, la bien ensaignie,
Pour Clarmondine, et moult forment
7760 Li anuie de ce tourment
Que il li samble que ele a.
Sa mere et li moult en pesa,
Et encore plus à son frere
Que ne fi li ne à sa mere.
Chascun jour souvent la véoient,
Mais près de li aler n'osoient;
Car tout adès li enforçoit
Sa maladie, ce sambloit,
Ne ne reconnoissoit nului
7770 Par samblant, eles ne autrui.

Les X femmes qui la gardoient
Grant paine en li garder metoient.
Car bien lor ot fait commander
De li soigneusement garder
Li rois ; ne pas ne l'oubliassent,
Et que chascune nuit veillassent
Devant li III ou IIII au mains.
Ainsi le firent. C'est dou mains,

Puisque li rois l'ot commandé;
7780 Car il sera guerredonné
Chascune d'eles largement :
Ce leur a il bien en couvent.

Une maison faire li firent
Forte et faitice, et enz la mirent,
Droit en costé la chambre Argente,
Qui forment fu triste et dolente
De ce que aidier ne li pot.
Droit devant lor II chambres ot
Un petit faitis jardinet
7790 Et un trop noble praëlet
Enclos de mur fait à crestiaus :
Li lieus estoit riches et biaux.

Iluec fu mise Clarmondine,
Qui onques nuit ne jour ne fine
De li couvrir, à son povoir,
Que on ne peüst percevoir
Qu'ele eüst point d'entendement.
Moult l'aloient veoir souvent
Li rois et sa mere et sa suer,
7800 Qui moult erent dolent de cuer
Dou grant meschief que il véoient
Que ele avoit, si qu'il cuidoient.

Moult fu soigneusement gardée.
Mais moult ert de tous redoutée ;
Car, quan qu'ele povoit baillier,
Vouloit tout rompre et depecier.
Fol. 31 r°. Argente i estoit soir et main ;
Car volentiers meist la main
'A li aidier, s'ele pouist.
7810 Pour ce c'on miex garde preïst

De li, i estoit tous les jours.
'A paine pensoit ele aillours
Que à li garder et servir ;
Car gentiex cuers ne puet mentir.

Les X femmes moult se penoient
De li servir ; car bien véoient
Que on à certes le vouloit.
Pour ce chascune s'en penoit,
Et tant de bien orent veü
7820 En celi qui en tel point fu,
Que trestout, sans commandement,
La servoient moult doucement.

En tel point que je vous devise
Fu Clarmondine, et en tel guise
Lonc tans. Mais de li or lairai.
De Cléomadès parlerai,
Qui à Sebile en tel point fu
K'avoir le cuidoient perdu
Cil et celes qui lui amoient.
7830 Ainsi à grant meschief estoient
Li dui amant que je devis.
Cléomadès ert mørs et vis,
Et Clarmondine morte et vive.
Ainsi fortune à aus estrive
Que il lor vies despitoient
Et andui la mort souhaidoient.
Dont n'ai je pas jugié à tort
Si je di qu'il erent vif mort,
Quant chascuns sa vie haoit
7840 Si que la mort en convoitoit.

Un pou après ce que ravie
Fu Clarmondine, et esloignie

De Cléomadès son ami,
Avint droit en ce point ainsi,
Que, quant Clarmondine assez orent
Requise au miex qu'il onques porent
Parmi la terre de Sebile,
Par maint chastel, par mainte vile,
L'orent cil dou pays requise,
7850 Mais n'en orent nouvele aprise,
Ne porent rien savoir de li,
Dont moult furent triste et mari.
Lors se prirent à aviser
Cil de Sebile, et à penser
Que estre povoit devenus
Crompars, k'ainc puis ne fu veüs
Que Clarmondine fu perdue,
N'en place n'en maison n'en rue.
S'en parloient entre aus souvent
7860 Et disoient communaument
K'enz ou jardin l'avoit trouvée
Crompars, et l'en avoit portée.
Car tous jours à coustume avoit
K'en cel jardin souvent aloit
Au matin, pour herbes trouver
Pour ses malades acurer;
Car plus i ot de bonnes herbes
Qu'il n'a entre là et Viterbes.

Lors firent requerre Crompart
7870 Et demander de mainte part
As lieux où repairier souloit.
Mais nus nouveles n'en savoit
Fors tant que puis ne fu veüs
Que cil meschiez fu avenus.

Tost fu la nouvele espandue

Que par Crompart estoit perdue
Clarmondine, et tant qu'il avint
Que à Cléomadès en vint
Nouveles, là où se gisoit.

7880 Car ainc puis levez ne s'estoit
Que il ot perdue s'amie.
Mais, quand la nouvele ot oye,
Ses cuers tantost li tesmoigna
Que c'estoit voirs. Lors se leva,
Et pense que en mainte terre
Ira Clarmondine requerre,
Et par yver et par esté,
Ains qu'il n'en sache verité.

Lors s'est Cléomadès levez,
7890 Moul't maigres et moul't descharnez.
Mais espoirs k'encore revoie
Clarmondine, l'ot mis en voie
De garison et de santé.
Cis espoirs l'a moul't conforté.
Par cel espoir que je devis
Fu Cléomadès tost garis.
Pour lui furent lie et joiant
En Espagne petit et grant
De ce que il garis estoit;

7900 Car chascuns moul't le desiroit.
De sa garison firent joie
Trop plus que dire ne saröie.

Quant vit que il pot chevauchier,
Lors n'ot cure de plus targier
Que l'arréance ne pourvoie
Comment tost soit mis à la voie
De retrouver, s'il puet, celi
Pour cui amours le destraint si

Qu'il n'a pover d'aillours penser.

7910 Devant son pere vint ester,
Qui tant ert liez de son respas,
Que dire nel saroie pas.
'A lui parla moult longuement,
Et li dist que tout plainement
Disoit chascuns par la contrée
Que rois Crompars avoit emblée
S'amie dedenz le jardin
Où la lascia par mal destin.

— « Sire, fait-il, savez pourquoi

7920 « Ceste chose vraiment croi ?
« Pour ce que nus, se il ne fust,
« Le cheval mener ne seüst,
« Et pour ce le croi vraiment.
« Tous jours acoutumément
« Aloit là querre ses herbées
« Crompars, toutes les matinées.
« Ainsi le tesmoigne chascuns
« Que ne s'en descorde nesuns.
« Par Crompart sui trays et mors.

7930 « Ne sai où soit pris mes confors,
« Quant par lui ai perdu celi
« Qui mon cuer enporte avoec li.
« Moult très volentiers requerroie
« Li et mon cuer, se je savoie
« Où les peüsse retrouver.
« N'a lieu deçà ne delà mer,
« Tant soit ne divers ne lointains,
« Que n'i alasse ; c'est dou mains,

Fol. 31 v°. « Se je retrouver les cuidoie ;

7940 « Et, quoi que avenir m'en doie,
« Clarmondine requerre irai.
« Tout le mont avant cercherai

« Que n'en sache aucune nouvele. »

Ceste raison ne fu pas bele
Au roi Marcadigas son pere,
Ne à ses suers ne à sa mere.
Quant tel nouvele ont entendue,
Chascune i est errant venue ;
Car la voie li destorroient
7950 Moult volentiers, s'eles povoient.

En la chambre le roi entrerent.
Cléomadès iluec trouverent
Qui au roi son pere parloit.
Quand done Ynabele le voit,
Ne se pot tenir de plorer ;
Baisier l'ala et acoler,
Et li dist bien que, s'il s'en va,
Qu'ele de duel pour lui morra.
Devant lui sont agenoillies
7960 Ses serours, tristes et iries.

— « Biau frere, » font eles, « merci !
« Ne nous ociez pas ainsi.
« Mortes sonmes se en alez »

Dist Cléomadès : — « N'en parlez ;
« Se vous tant amez mon respas
« Ne ma santé, n'en parlez pas.
« N'i metez debat ne estrif
« Se ne m'amez miex mort que vif ;
« Car tous mes deduis et ma joie
7970 « Gist en l'esper k'encor revoie
« Celi où maint toute bonté,
« Qui la toupace est de biauté.
« Et, pour ce, pri à mon chier pere

« Et à ma douce chiere mere,
« Que ma joie ne lor anuit
« K'en la voie sont mi deduit
« Et mi soulas et mi delit.
« Encor geüsse sus mon lit
« Malades, se ne fust la voie
7980 « De quoi li detris me guerroie. »

'A ce mot furent tout si mu
Que nus n'i a mot respondu,
Fors que sans plus Marcadigas.
— « Biaux fiex, » fait il, « ne doutez pas,
« Car la pucele r'auerez
« S'on set que ce soit veritez
« Que Crompars l'ait ainsi emblée.
« Ains ne vit si male journée
« Comme le jour que il l'embla ;
7990 « Car, se je vis, il en morra,
« Et en sera toute essillie
« Sa terre, et toute sa lignie.
« De ce bien couvent vous tenrai.
« Tout maintenant envoierai
« En Bougie, pour miex savoir
« De ceste besoigne le voir ;
« Et, se c'est voirs k'emblée l'ait,
« Nous la r'auerons entresait,
« Et comparra sa trayson
8000 « Rois Crompars plus k'ains ne fist hom. »

Cléomadès li respondi
En souzpirant. — « N'est pas ainsi,
« Sire, » fait-il. « Com vous savés,
« La coustume dou regne est tés
« De la terre le roi Crompart,
« Que il ne r'iroit cele part

- « Pour tout plain d'or ceste maison,
« Pour ce qu'il a fait trayson.
« De sa gent seroit lapidés,
8010 « Se de trayson ert prouvés.
« Et est li jeux ainsi partis
« De li à ceaus de son pays,
« Que qui vers lui fait trayson,
« Il a perdu sans raënçon
« Entirement cors et avoir,
« Et la terre perdent li hoir.
« Et, pour ce qu'il a vers nous fait
« Trayson et vilain mesfait,
« Croi je que pour ce n'i soit point.
8020 « Et si a il encore I point
« De quoi il auroit trop à faire
« Ains k'à bon chief le peüst traire,
« C'est que pais li couvient avoir
« Vers nous, ou par fin estouvoir ;
« Mais de sa terre sires n'iert
« Se dedenz VII ans pais n'aquierit
« Vers ceaus cui il mesfait aura.
« Car je fusse alez tout droit là
« Si tost comme de ci meüsse,
8030 « Se ceste chose ne seüsse. »

Marcadigas moult bien savoit
La coustume ; mais il cuidoit
Son fill cele voie esloignier
Par paroles, et detriier.
Bien voit qu'il n'en venroit à chief.
Ne moustra pas tout le meschief
Que il a ou ¹ cuer ensenti ;
Ains vous dirai qu'il respondi.

¹ Le Ms. porte : « *On.* »

Bien aperçoit et bien entent
8040 Que ses fiex à la voie tent,
Si qu'il ne lairoit pour riens née
Que sa voie ne fust hastée.

Lors se commence à aviser
Que, puisque il s'en veut aler
Ne ne le porroit retenir,
S'en la voie devoit morir,
Que miex vaut, à son escient,
Qu'il li doinst esclatierement
Le congié, que en retraiant.

8050 — « Biaux fiex, » fait il, « venez avant.
« Très bien me samble, à mon avis,
« Que vous lairiiez à envis
« Le voiage k'empris avez ;
« Et, puisque faire le voulez,
« Je vueil qu'il soit à vo talent,
« Par si que m'aiez en couvent
« Que dedenz cest an revenrez,
« Se loial essoigne n'avez
« De maladie ou de prison ;
8060 « Et je vous met à abandon
« Tout mon or et tout mon argent,
« Et de toute la meilleur gent
« K'en mon pays prendre vorrez.
« C. chevaliers i eslirez
« Trestous les plus sages de guerre
« K'eslire porrez en ma terre.
« Cil iront en vo compaignie
« Pour faire vostre commandie ;
« Et vous pri, se vous tant m'amez,
8070 « Que, se vous chevaliers trouvez
Fol. 32 r°. « Qui soient preu et de bon non,

- « Que de vous ne partent sans don,
« Tel qu'il aïert à fill de roi.
« Sagement et sans nul desroi,
« Alez par estrange pays,
« Et largement donnez tous dis.
« Que plus est on preus et vaillans,
« Plus doit on estre desirans
« De donner as bons. Car largece
8080 « Siet bien avoec haute prouece ;
« Car grans princes qui preu se sent
« Se mesfait moult très durement
« S'il entrelaist à faire honnour
« Sor fiance de la valour
« Qu'il cuide en lui ; car li cuidier
« En ont maint rebouté arrier
« Qui à grant bien fussent venu ;
« Mais par cuidier sont deceü.
« Grant seigneur large, sage et preu,
8090 « Ne pueent miex faire lor preu
« Que metre en bonne gent le leur :
« C'est li sauvement del honneur.
« Nel di pas pour ce ne soiez
« Tex que bien en doi estre liez ;
« Pour ce le di que souvenans
« Soiez que ne soiez perdans
« Par fol cuidier ce que cil perdent
« Qui à l'outrecuidier s'aërdent.
« Bon fait humilité chierir
8100 « Et outrecuidance hayr ;
« Car humilitez fait haucier,
« Et outrecuidance abaissier.
« Que plus vaus, et plus t'umelies,
« Biaus filz, cestui point pas n'oublies. »

Quant Cléomadès entendî

- Son pere qui parole ' ainsi,
Sachiez moult li plot durement
Que si très debonairement
Li donne del aler congié.
8110 'A genous l'en a mercié,
Et li a bien en couvenant
Que il fera tout son commant ;
'A son povoir s'en penera
Par tous les lieux où il venra ;
'A honnour faire iert ententiex,
De ce ne soit de riens doutiex ;
Et li promet qu'il revenra
Dedenz l'an, se essoigne n'a
De prison ou de maladie.
8120 Et Marcadigas li otrie,
Et dist, oiant tous : — « Je vous gré
« La voie à mouvoir à vo gré. »
Et Cléomadès, sans targier,
Fist son afaire apareillier.

Ainsi fu la chose arréée
Que li rois l'avoit devisée.
C. chevaliers fist li rois prendre
Qui n'estoient pas à aprendre,
Ains furent chevaliers de pris,
8130 Sage et courtois et bien apris.
Arréé furent telement
K'en l'arroi ne failli noient.
Tout kan qu'il i apartenoit
Fu pourveü bien et adroit.
Que vaurroit que plus vous diroie ?
Si tost se mirent à la voie
Que leur chose fu aprestée.

¹ « Parloit. » Ms. 7539.

Là ot mainte lerne plorée,
Le jour qu'il se durent mouvoir;
8140 Ce povez vraiment savoir.

Cléomadès, sans plus atendre,
Vint à son pere congié prendre.
Et puis prist congié à sa mere
Cui la voie fu moult amere;
Congié prist à ses trois serours,
Qui, en grans cris et en grans plours
Remesent¹. Et lors s'en torna
Cléomadès; plus n'arresta.
Il et sa gent errant monterent.
8150 Parmi Sebile trespassemblerent.
'A grant merveille vous venroit
Qui le duel vous deviseroit
Que cil de Sebile menoient
De ce que aler l'en véoient.

— « Hé! las! » font il, « que nous avient
« K'après tel joie tex duels vient?
« Chascuns de nous estoit si liez
« De ce que reveiens sus piez
« Celui qui, par sa grant valour,
8160 « Nous a tous montez en honneur!
« Kan k'avons eüssons perdu,
« Se ne fust par lui retenu.
« Ne nous fust demoré riens née.
« Toute fust Espagne gastée,
« Ou toute fust en mains d'autrui,
« Se ne fust la valour de lui.
« Sa grant valour nous a sauvé
« Terre et honneur et herité²,

¹ « Remestrent. » Ms. 7539.

² « Muebles, honnours et heritez. » Ms. 7593.

« Après Dieu, qui le nous donna.
8170 « Hé! las! jamais ne revenra,
« Si aura cele retrouvée
« Qui mar fu ains à nostre oes née ;
« Car, s'il ne la puet retrouver,
« C'est noiens de son retourner.
« Selonc le cuer que en lui a,
« Jamais sans li ne retorra.
« Hé! las! que nous est avenu ! »

Maint cheveil tiré et rompu
Y ot, le jour qu'il s'en parti,
8180 Et geté maint dolereus cri.
Là veïssiez paumes batues
Et poins tordre, par maintes rues.
Son demorer chier achetassent
Se il seüssent ne cuidassent
Que ce lor peüst riens aidier.
Mais ce ne lor auroit mestier.
De lor grant meschief me tairai,
Et de lor voie parlerai.
De pays en pays aloient.
8190 De la chose que il queroient
Demandoient à plusour gent.
Ainsi alerent longuement.
En mains lieus assez en enquirent;
Mais ains nouveles n'en aprirent
Qu'il prisassent une chastaigne,
Tant que il vinrent en Bretagne.

'A Nantes II jours demorerent,
Et droit au tiers jour s'en alerent.
Anjou passerent et le Maine ;
8200 Et si costoierent Touraine,
Tant qu'il vinrent en Normendie,

Une terre moult aaisie.
Fol. 32 v^o. Je ne sai pas comment nommées
Estoient adont les contrées
Dont je vous faz ci mencion ;
Mais ore a chascun tel non
Que j'ai dit et que je dirai
Des autres que je nommerai.

Quant de Normandie sevrerent,
8210 Outre en Engleterre passerent,
Et de là droit en Gales vinrent.
Et lors le plus droit chemin tinrent
D'Escoce, qu'il porent trouver.
Tant i furent, que retourner
Lor plot ; si le firent ainsi.
Droit à Douvre sont reverti ;
Car n'orent pas conseil d'aler
Plus avant en pays de mer.
N'arresterent ne tant ne quant.
8220 Lendemain vinrent à Wissant.

Vers France ont leur voie tornée
Qui adont ert Gaule nommée.
Grant guerre avoit en ce pays.
Cele part se traioit tous dis
Cléomadès où guerre avoit,
Pour ce que vraiment savoit
Que là où les guerres estoient
Gens de plusours pays venoient.
Pour ce cele part se traioit,
8230 Que moult très volentiers sauroit
Chose dont fust resleeciez¹ ;
Car moult estoit despaisiez.

¹ « *Resliesciez... desapeşiez*. Ms. 7539.

En France fu moult bien venuz.
De plusours fu reconneüz ;
Car enz ou pays ¹ avoit mez.
De toutes les gens fu amez
Entour cui repairie ot onques.
Mais c'estoit merveilles adonques
Comment chascuns le regardoit
8240 Pour le non qui de lui couroit ;
Car chascuns disoit que à lui
Ne devoit on metre nului
De haute prouece à son tans,
K'en lui n'en eüst bien trois tans
Qu'il n'eüst en tout le meillour
Que on trovast à celui jour.

'A merveilles ert regardés
De tous, pour ce qu'il estoit tés.
Et encor feroit on demain
8250 S'on savoit Tristan, ou Gavain,
Ou Lancelot, ou Percheval,
Qui en l'enqueste dou Graäl ²
Firent plusours proueces grans.
Car chascuns d'aus fu moult vaillans.
Se ne furent il pas dou conte
Cléomadès, dont je vous conte ;
Car Cléomadès fu li tiers
De tous les meilleurs chevaliers
Qui ains furent de mere né ;
8260 Ce set on bien par verité.

Or vous dirai que il faisoit

¹ « *En ce pays.* » Ms. 7539.

² Allusion à quelques-uns des héros épiques de la Table Ronde, dont les noms étaient déjà fort populaires à l'époque d'Adenès, et dont les aventures avaient commencé à défrayer la littérature française depuis la conquête de l'Angleterre par les Normands.

Par les pays où il aloit.
S'il avoit enz ou pays guerre,
Tantost se penoit de l'enquerre
Liquels avoit ou tort ou droit.
Et, quant le voir de ce savoit,
Lors se penoit de la pais faire ;
Et, se il ne pavoit atraire
Les parties que pais en fust,
8270 Koi que avenir l'en deüst,
Adès vers celui se traioit
Là où le plus grant droit cuidoit.
Ainsi se maintenoit partout.
Sachiez si le doutoient mout
Cil contre cui il se metoit ;
Et cil vers cui il se metoit
Cuidoit tous estre aseürez
Que ses contens estoit alez.

Mainte guerre en fist apaisier,
8280 Et maint outrage detriier,
Et relaissier mainte folie
Qui ert emprise par envie ;
Car par envie a on empris
Mainte emprise, pour tolir pris
'A aucun bon quant ert prisiez.
Encor dure, dont c'est pitiez,
Cis poins, et lonc tans a duré :
Ce pert il bien à maint regné.

Ainsi ala par mainte terre
8290 Cléomadès celi requerre
Que il vousist miex retrouver
K'en paradis sans li aler,
Se il i cuidast, après Dieu,
Avoir devant trestous son lieu.

En celui voiage portoit
Cléomadès, quant il s'armoit,
Armes aussi noires com meure,
'A I blanc gant les dois deseure.

Or vous dirai pourquoi avoit
8300 Tés armes. Ce senefloit
Que il n'avoit de remanant
De s'amie que le seul gant
Que il enz ou jardin trouva
Là où li rois Crompars l'embla.
Or vous dirai là où metoit
Ce gant, et que il en faisoit.
Contre son cuer l'avoit lié
D'un drap linge blans dellié.
Adès nuit et jour i estoit,
8310 Mais nus, fors il, ne le savoit;
Ne ne vouloit que le seüst
Nus hom, jà tant ses privez fust.
Pluseurs fois, quant il ert couchiés,
Fu li gans de lui desliiés;
Et, quant il desliié l'avoit,
Maintes fois la nuit le baisoit
Et le tenoit entre ses bras.
C'estoit sa vie et ses soulas.

Se tout vous vouloie retraire
8320 L'anui de cuer et le contraire
Qu'il avoit nuit et jour tous dis,
Cis livres, qui est moult petis,
Séroit plus que la Bible grans.
Se de tout estoit recordans
Les plaintes et les dolousers,
Les souzpirs et les regreter,
Qu'il faisoit les jours et les nuis,

Ce seroit riote et anuis ;
Car jà del ne vous parleroie,
8330 Se tous ses meschiez vous disoie.
 Ses cuers nule fois ne dormoit,
 Se à Clarmondine pensoit,
 Qu'il n'avoit loisir de dormir,
 Tant le destraignoient souzpir.
Fol. 33 rº. Moult estoit ses cors traveilliez
 De ce que si ert esveilliez
 Li cuers de lui, qui nuit et jour
 I pensoit adès sans sejour.
 Et de ses meschiez se couvroit
8340 Devant la gent, ce qu'il pouvoit.

 En si fait point le tans passa.
 Maint divers pays trespassa,
 France cercha et Alemaigne,
 Duringes¹, Baiviere, Bahaigne²;
 Mais en Westfale ot esté
 Partout, et dou lonc et dou lé,
 Et parmi Sassoigne³ et en Frise.
 Ains que sa voie fust emprise
 Au lez par de devers Baiviere,
8350 Tant ala avant et arriere
 Que par Osteriche revint.
 En cele terre tant se tint,
 Que li sambla que raisons fu.
 Lors se sont de là esmeü
 Et s'en vinrent droit en Hongrie⁴,
 Et de là vindrent en Prussie⁵,

¹ Thuringe.

² Bohême.

³ Saxe.

⁴ » *En Bougie.* » Ms. 7539.

⁵ » *En Persie.* » Ms. 7539.

- Quant Poulane¹ orent trespassee,
Une terre riche et pueplée.
Partout estoit moult honnorez ;
8360 Car sages estoit et senez.
Moult savoit mener sagement
Et en pais et lui et sa gent ;
Car bien lor avoit commandé
Que il n'i eüst si osé
Qui mesfeïst rien à autrui,
Se sa gent amoient tant lui,
Courtoisement se maintenissent
Ne à nului riens ne tolissent.
Et cil ne l'oublierent mie ;
8370 Car bons sires bonne maisnie
Fait par son bon ensaïnement,
Et s'en servent plus liement.

Tant alèrent, qu'il trespasèrent
Le Bras Saint-Jorge². Lors visèrent
Quel part il vorroient torner.
Ne vous sai pas bien deviser
Comment cil bras de mer ot non
Adont ; mais ainsi le clame on
Or endroit que je dit vous ai.
8380 Ne je la centime part n'ai
Devisé, si me doinst Diex joie,
De ce qu'il avint en la voie
Cléomadès, lui et sa gent :
Trop i metroie longuement.
Car moult souvent se combatirent,
N'ainc à bataille ne faillirent,
Qu'il seüssent, ne loing ne près,
K'adès ne fust Cléomadès

¹ Pologne.

² Nom de la branche la plus méridionale du Danube.

Contre celui cui ert li tors,
8390 Ou gent à gent, ou cors à cors.

Se d'orphelins oïst nouvele,
Ou de dame, ou de damoisele
'A cui on vousist nul tort faire,
Tantost vouloit cele part traire,
Et s'aloit tantost pour offrir,
Pour la droiture soustenir.
Savez quel gent se combatoient
'A lui? Cil qui nel connoissoient;
Car contre lui mis ne se fust
8400 Nus hom qui bien le conneüst.
Souventes fois se combatoit.
Ainsi par le pays aloit.
De ce pour quoi ert esmeüs
Ne sot encor ne mains ne plus
Que il en savoit au mouvoir :
Ce li faisoit le cuer doloir.

Quant le Braz Saint-Jorge ot passé,
Iluec ont trois jors sejorné,
Et ont demandé et enquis
8410 La maniere et l'us dou pays
Là où il béent à aler.
Ainsi com m'oëz deviser,
Alerent tant k'en Grece vinrent.
Sachiez que li Griiois se tinrent
Bien apaié, quant veü ont
Cléomadès. Grant joie en font ;
Car de sa valour bien avoient
Oy parler, et bien savoient
Que c'estoit li plus preus de tous.
8420 Chascuns ert dou veïr jalous.
Miex en amoient lor pays

Pour ce que il i fu norris.

Grant guerre avoient lors li Grieu
'A I trop poissant roi caldieu ¹
Qui avoit à non Primonus ².
Moult avoit Griiois court tenus
Et guerroié très aigrement.
Maint grant anui et maint torment
Lor fist, et maint très grant damage,
8430 Pour ce que il vouloit treuage
Avoir sor aus, k'ains à nul jour
N'orent eü si ancissour.

Metre les vouloit desouz soi ;
Car Grieu estoient lors sans roi,
Et ert chascuns sires de lui,
Et ne tenoient riens d'autrui.
Faire leur vouloit desraison ;
Tour quéroit, par fausse ochoison,
Par quoi il fussent si sougi.
8440 S'en erent irié et marri
Li Grieu, et moult s'en esmaioient ;
Car vers cel roi pover n'avoient.
Tant estoit riches et poissans,
Malicieus et sorquerans
'A ceaus qui à lui marchissoient,
Que tout si voisin le doutoient.

Li Griiois forment honnorerent
Cléomadès. Moult se penerent

¹ Chaldéen. Les écrivains du moyen âge désignaient les Perses sous le nom de Chaldéens.

² Nom imaginaire. Peut-être aussi n'est-il qu'une altération du nom de Priam, le poète pouvant très-bien avoir confondu le souvenir du siège de Troie avec celui des guerres médiques.

D'onorer et lui et sa gent.

8450 'A lui vinrent moult humblement
Li plus grant seignour de la terre,
Pour aide et conseil requerre
Encontre le roi de Caldée
Qui lor terre a [toute] gastée¹
Et a envers aus guerre emprise
Par sa mauvaise convoitise,
Que il pas faire ne deüst
Se il preudons et loiaus fust.

— « Jà nous a malement grevé ;

8460 « Mais bien avons en proposé
« K'ains i laira chascuns la vie
« K'à no tans soit Grece asservie. »

Quant Cléomadès l'entendi,
Pitié l'en prist. Lors respondi.

— « Seignour, » fait il, « ci sui venus,
« Mais ne sui pas si pourveüs

Fol. 33 v°. « Que je fusse, se je seüsse
« K'en tel point trouver vous deüsse.
« Mais, tant com valoir vous porrai,

8470 « 'A ce tant pou de gent que j'ai,
« Vous aiderai à mon pover
« De cuer et de cors et d'avoir ;
« Car la terre où je fui norris
« Devroie je moult à envis
« Veöir honnir ne abaissier,
« Se de riens li poverie aidier.
« Ne sai que je plus vous en die ;
« Car en moi ne remanra mie
« Que Grece, où fui norri soué,

¹ Notre Ms. porte : « *Qui lor terre a tort gastée.* » Le Ms. 7539 dit :
« *Qui leur terre a moult esnuée.* »

- 8480 « Perde la grant honnesteté
« Qu'ele a, et la haute noblece.
« Mais or couvient que sans perece
« Soit emprise ceste besoigne,
« Et que chascuns nuit et jour soigne
« Par quoi très bien soit pourveüs,
« Si que tost soit seure corus
« Cis rois qui vous cuide honnir
« Et vostre pays asservir;
« Car li hom qui pert sa franchise
8490 « A moult s'onour arriere mise. »

Et quant Griiois ont entendu
Comment il leur a respondu,
Bien virent qu'il ert chevaliers
Fins, faitis, parfaits et entiers
Et de très haute enprision.
Moult l'en mercient li baron
De ce que si entierement
Et si très esclatierement
Met lui et sa gent abandon
8500 Pour aus aidier de lor raison.
Durement l'en ont mercié
Et encliné et gracié.

Lors li ont dit c'un parlement
A Primonus pris à lor gent,
'A ce premier mardi prochain,
Es prez, desouz Mont Arestain ¹.
Et Cléomadès respondi
K'au parlement ira aussi,
Et loe que pas refusée
8510 Ne soit raison, mais demandée.

¹ Marathon. (Note de M. Paulin Paris.)

Car souvent mescheoir voit on
'A ceus qui refusent raison ;
Car li hom qui veut refuser
Raison, doit par droit meserrer :
Car qui raison refuse et droit,
Sachiez que il pas bien ne croit
Enz el souverain Créatour
Qui nous pourvoit et nuit et jour.
Qui son Créatour douteroit
8520 'A nului nul tort ne feroit.
Diex de plusours est pou doutez
Et creüs, dont c'est grans pitez.
Pour ce raison lor loe aprendre
Se Primonus i veut entendre.

Quant li jours dou parlement vint,
Chascuns, si k'à lui apartint,
I vint d'ambes II les parties.
Moult avoit beles praeries
Et boschelés vers fuëillis
8530 Là où cil parlemens fu pris.
Assemblé sont. Premiers parla
Primonus, et as Griex moustra
Se il ' ce que il demandoit
Li connoistroient là endroit
Ou il le vorroient deffendre.
Et li Griiois, sans plus atendre,
Dirent qu'il s'en conseilleroient
Et tantost l'en responderoient.

Lors se sont à une part trait.
8540 Cléomadès dist que lonc plait
N'afiert pas à cele requeste.

¹ « *Se euls.* » Ms. 7539.

La responce doit estre preste :

— « Ou vous deffendez vo pays,
« Ou faites ce, qu'il a requis.
« Mais, se vos honnours ne gardés,
« Jamais les cors de vous n'amés.
« Car cors sans honnour rien ne vaut,
« Jà tant n'iert venus de lieu haut ;
« Car garder se doit assez plus
8550 « Cil qui de haut lieu est venus
« Que cil de petite lignie ;
« Et Griiois sont d'ancisserie,
« Ainsi que partout tesmoigne on,
« De moult très noble extracion.
« 'A mon avis n'i a c'un tour :
« Ou morir ou sauver honnour.
« Vie sans honnour soit honnie,
« K'assez vaut miex honnour sans vie. »

Quant Cléomadès entendu

8560 Ont Griiois, à lui sont venu
Et li prient communament
Qu'il face et die à son talent
Et commande sa volenté,
Et il feront tout à son gré ;
Et jurent que jà ne donront
Treuage, ainçois i morront.
Cléomadès dist qu'il dira
La parole et la mousterra,
De par Griiois, roi Primonus.

8570 Tout l'otroient. Levé sont sus.

Devant roi Primonus revinrent
Les parties. Coies se tinrent
Et en pais; car moult desiroient
'A savoir à quel chief torroient

Les besoignes de cele emprise
De quoi Primonus s'aime et prise
De ce que il onques l'enprist.
Chascuns se taist, nus mot ne dist ;
Et Cléomadès encommence
8580 'A parler com de grant science.

— « Sire rois, » fait il, « Primonus,
« Dont vous est cis consaus venus
« Qui Griiois voulez asservir ?
« De honteus entremés servir
« Les voulez, quant par vo haussage
« Voulez avoir d'aus treüage
« K'ains vos ancestres ne requist.
« Qui ce vous loa il mesfist.
« Maint damage lor avez fait
8590 « 'A tort, dont vous avez mesfait.
« Mais, s'à ce vouliiez entendre
« Que vous as Griex vousissiez rendre
« Leur damages entierement,
« Et puis feïssiez serement
« Que mais ne lor demanderiez
« Nule riens, ains lor aideriez
« De tout vo pouvoir contre autrui
« Qui faire leur vorroit anui,
Fol. 34 r°. « Je croi que il conseil aroient
8600 « Que ce mesfait vous pardonroient;
« Ou la bataille à aus aurés.
« Prenez lequel que vous voulés
« De ces II poins, et choisissiez,
« De par Griiois, et bien sachiez
« K'autre chose n'enporterez. »

Griiois dient c'est veritez.
Quant li rois Primonus entent

Que Cléomadès telement
Li a, pour Griiois, respondu,
8610 Moult en ot le cuer irascu.
Si fu tormentez et iriez
K'à paines pot ester sor piez.
Cléomadès moult regardoit;
Mais ne sot pas qui il estoit.

— « Vassal, » fait il, « or m'escoutez,
« Vous qui pour les Griiois parlez.
« Ne sai se estes chevaliers,
« Ou avocas ou amparliers;
« Mais de par Griiois m'avez dit
8620 « Et grant outrage et grant despit.
« Je cuidoie, kant je ving ci,
« K'envers moi deüssent merci
« Requerre, mais moult en sont loing.
« De ce ne sont pas en grant soing,
« Quant de bataille m'ont semons.
« Mais, par les Diex que nous créons,
« Jamais jour n'auront pais à moi,
« Si m'auront tenu pour lor roi
« Et seront tout à moi sougi.
8630 « Ice lor créant et afi,
« Ou j'en remaindrai mors ou pris.
« D'aus sui de bataille aatis,
« Mais à moi la bataille auront
« En quel marche que il vorront. »

Ne sai que plus vous en diroie,
Ne que la chose aloigneroie.
La bataille fu devisée
En I plain, moult près de la préee
Où cil parlement ot esté.
8640 'A quinzaine l'ont créanté

Qu'il i seront d'ambes II pars.
Lors est li parlemens espars.

Quant de là furent departi
En si fait point com je vous di,
Chascuns en son lieu s'en ala
Et se pourvit et arréa
Si qu'à tel chose apartenoit.
Li Grieu Cléomadès à droit
Honnorerent, si com il durent.

8650 Au jour de la bataille, furent
Venu sor la piece de terre,
Arréé comme gent de guerre,
Et li Caldieu et li Griiois.
Sachiez que Primonus li rois
Avoit tant de gens amenées,
Que plaines erent les valées
Et tout li plain et les montaignes,
Que de sa gent, que des estraignes;
Car partout avoit gent mandées
8660 Par prieres, et ensodées.

Près estoient II tans de gent
Que n'erent Grieu, si com j'entent.
Quels armes ot rois Primonus
Vous deviserai. Ses escus
Ert d'or à I noir olifant,
'A I ourle moult bien séant
De gueules, qui ert endentée;
Et li ourle estoit besentée
De petis besentiaus d'argent
8670 Qui moult i erent bel et gent.

Li Grieu IIII batailles orent,

Si estofées que miex porent¹ ;
Et Primonus en avoit VI
De gent qui erent de grant pris.
Savez que Cléomadès fist?
En chascune bataille mist
XX de ceus k'o lui amena ;
Et lors as Griiois commanda
Qu'il facent ce que cil diront,
8680 Et cil dient qu'il le feront.
Rien ne lor vorront commander
Que il jà lor doivent véer
Tant com piece d'aus durera.

Cléomadès moult agréa
Li samblans que chascuns faisoit ;
En bon couvenant les trouvoit.
Les batailles a devisées
Cléomadès, et arréées
Comment l'une après l'autre ira.
8690 La premiere bataille ara
Il meïsmes, k'aler vouloit,
Ainsi com devisé l'avoit,
Au roi Primonus assambler,
Pour le miex que il set viser.

Moult chevauchoient noblement
Les batailles et sagement,
K'à paines la longueur d'un doit
Li uns d'aus l'autre ne passoit.
Li uns l'autre trop n'embroient,
8700 Mais si très à point chevauchoient,
C'on peüst prendre hardement
En leur noble contement.

¹ « *Si parfetes que miex ne porent.* » Ms. 7539.

Maint chevalier très bien monté
Et très gentement acesmé
Y ot, que d'une part, que d'autre,
Escuz as cols, lance sor fautre,
Et les hiaumes plantez es chiés ;
Et sor les estriers afichiés
Chevauchierent en conroi tant,
8710 Que si s'alerent aprochant
Que les batailles s'entrevirent :
Sachiez que d'ambes pars fremirent.

Quant d'ambes pars veü se sont,
Au roi Primonus vint adont
Uns chevaliers qui li conta
Que Cléomadès estoit là ;
Et s'ert cil, trestout vraiment,
Qui l'autre jour, au parlement,
La parole des Griex moustra.
8720 — « Qui la nouvele en aporta
« En vostre ost, ne vous amoit mie ;
« Car toute vostre ost esbahie
« Est de ce que ci est venus.
« Moult en est chascuns esmeüs.
« C'est li aigles des chevaliers.
« Puis ne volera volentiers
« Faucons, le jour k'aigle ait veüe.
« Ainsi est il de sa venue
« Com del aigle que veü ont
8730 « Oisel, car puis ne voleront
Fol. 34 vº. « Hardiement cele journée.
« Pour ce est l'aigle comparée
« 'A lui, car sa très grant value
« Est par tout le monde setüe.
« Sachiez par lui sont esbaudi
« Li Grieu, et Caldieu abaubi.

« Et ce n'est mie grant merveille,
« Car sa prouece n'est pareille
« 'A nule autre; ce croi, et cuit
8740 « Ce sauront li vostre ains la nuit.
« Sachiez, se pas ne l'i seüssent
« Vostre gent, plus asseür fussent.
« Mal est fait quant le sevent ci. »

Quant li rois l'ot, tous en rougi.
Ne li furent plaisans ne beles
'A oyr si faites nouveles;
Car de Cléomadès avoit
Oy parler, et bien savoit
Que c'estoit de tous li plus preus,
8750 Et ce n'estoit mie sès preus ¹.
N'est merveille s'en fu dolans.
Les Griiois voit parmi les chans
Venir, qui moult les aprochoient.
En IIII batailles venoient.
Une en voit qui vers lui se trait,
Et lors pensa il entresait
Que Cléomadès i estoit
Et k'à lui vient assambler droit.

Bien vit, ce est chose passée ²
8760 K'avoir lor couvient la mellée.
Lors veïssiez espiex brandir
Et sor hiaumes des mains ferir,
Pour plus fortement enformer
Le hiaume, ou pour veoir plus cler.
Bien sambloient d'armes manier.
Quant Grieu prennent à aprochier

¹ Son prix, son avantage.

² « *Bien voit que c'est chose aprestée.* » Ms. 7539.

Lors ferirent des esperons.
Devant tous, plus joins c'uns faucons,
S'en vint Cléomadès brochant
8770 En son point I espiel trenchant
Dont le premerain qu'il ferit
'A la terre mort abati[t].

Ce que il premiers assambla,
Ce fu pour ce que il pensa
Que li Grieu plus hardiement
Iroient envers leur content.
Sachiez que maint à terre en mist
Ains que ses espiex fin preïst;
Car adonc chascuns tant gardoit
8780 Son espiel com durer po voit,
Ou fust son glaive, ou fust ses dars,
K'adonc ert tenus pour couars
Ou pour nices, qui ne s'aidoit
De l'un des trois tant com duroit.

Les batailles sont assamblées
De toutes pars, et ajoustées.
Or sachiez bien que celui jour
N'ot pas Cléomadès sejour;
Car moult fu la bataille fiere
8790 Et de despiteuse maniere.
Caldieu en grant despit tenoient
Que li Griiois enpris avoient
Vers aus bataille à jour nommé.
Moult sont aigre et entalenté
D'ambes II pars de bien ferir
Et de deffendre et d'assaillir.

Cléomadès au bran d'acier
Fist cel jour maint arçon widier.

Jà cele part ne se tornast
8800 Puis que il « Castele ! » escriast,
Que tous ne feïst remuer
Les rens, et fremir et branler.
Nus hom n'osoit ses coups atendre
Ne encontre lui estal rendre.
Caldieu moult forment le doutoient.
Ses coups malement ressoignoient.

Cele bataille longuement
Dura, et moult i ot de gent
Gisant par les chans estraiés,
8810 Que mors, que navrez, que bleciés.
Primonus Griiois assailloit
Forment, et « Caldée ! » escrioit ;
Car dou cors fust preus et vassaus.
Se dou cuer fust vrais et loiaus !
Plus k'autres couvoiteus estoit,
N'à nului couvent ne tenoit.

Moult estoient Caldieu doutant,
Et moult s'aloient enpressant,
Ne mais les cors n'abandonnoient
8820 Si durement comme il soloient ;
Car moult les avoit mal menez
Cléomadès, et desviez¹
De toutes lor batailles VI.
N'en y ot nule, au mien avis,
Où il ne fust II fois ou trois.
Ne tenoit pas en I lieu kois.
De bataille en bataille aloit.
Chascune bataille cuidoit
Que en la lour fust tout adès.

¹ « Desroutés. » Ms. 7539.

8830 Tant les mena Cléomadès,
Qu'il et Grieu apertement voient
Que Caldieu se desconfisoient.

Cléomadès lors se pensa
Que vers Primonus se traira ;
Car bien pense, se pris l'avoit,
Que mais deffense n'i auroit.
Miex le vorroit prendre k'ocire.
La teste de son cheval vire.
Lors regarda parmi l'estour,
8840 'A guise de fier poigneür ;
Cele part prist droit à aler
Où plus tost le cuide trouver.

En la bataille Primonus
S'est Cléomadès embatus.
Toute la bataille branla
Au lez là où il i entra.
Ses coups savoit si departir,
Que cil qui se povoit partir
De lui, quant près de lui estoit,
8850 Ses Diex durement en looit.

Griiois le sivoient de près,
Qui moult erent aigre et engrès
Que Caldieu fussent desconfit.
Cléomadès fist tant qu'il vit
Primonus, qui moult enpressez
Ert des siens et avironnez.

Quant Cléomadès veü l'a,
Trestout droit vers lui s'adreça ;
Car li chevaus sus koi séoit
8860 Grans et fors et rades estoit.

Maugré tous est à lui venus.
Là fu mains ruistes coups ferus,
Fol. 35 r°. Et mainte broigne derrompue,
Et mainte cervele esbandue,
Et mains fors hiaumes descerclés,
Et mains fors escus decoupés,
Et mains chevaliers abatus
'A la terre tous estendus.
Et maint cheval a vuide sele,
8870 Et trayner mainte bouele
Peüst on en maint lieu veïr.
Caldieu virent que nul povoir
As Griiois celui jour n'auront.
Les dos tornent : desconfit sont.

Cléomadès tint enbracié
Primonus, et l'ot enbronchié
Devant lui¹; et il li tendi
S'espée, et li pria merci.
— « Frans hom, » fait il, « ne m'ociez.
8880 « Pour Dieu, la vie me sauvez.
« Tant en aurez argent et or
« Com vous vorrez, et plus encor. »
Et Cléomadès erranment
Mist Primonus devers sa gent
Et lor commande moult et prie
Que ne li facent vilonnie;
Et cil dient qu'il le feront.
Pris et loiié mené l'en ont.
Lors veïssiez gens enchaucier,
8890 Uns fuïr et autres chacier.

Moult fu grans li enchaucëis,

¹ « *Devant soi.* » Ms. 7539.

Moult i avoit de gens maumis
Et de navrez et de bleciez.
Sor Caldieus¹ torna li meschiés ;
Car de mors tant en y avoit
Et de pris, que merveille estoit.
Liez fu qui eschaper en pot ;
Car n'en eschapa pas qui vot.
Li desconfit le champ voidierent
8900 Et li vainqueür enchaucierent
Tant qu'il lor sambla que bon fu ;
Lors sont arriere revenu.

Au lieu où l'estour ot esté
Sont li vainqueür retorné.
De cuer erent lie et joiant ;
De Cléomadès vont parlant,
Et dient c'onques mais ne fu
Chevaliers de plus grant vertu,
Ne qui tant peüst endurer
8910 De coups, ne tant de coups donner.
— « Diex le nous envoia, » font il,
« Pour nous geter dou grant peril
« De servage, où mis nous eüst
« Rois Primonus, se il ne fust.
« Par son fait va nostre honor droit,
« Qui jà dou destre lez clochoit ;
« D'ambes II lez fust afolée,
« Se ne fust ses cors et s'espée.
« Que Diex, qui si poissant le fist,
8920 « Soit loez, quant le nous tramist
« 'A si bon point pour nous monter
« En honnour, et de blasme oster. »

¹ « *Caldains.* » Ms. 7539.

Ainsi li plusour d'aus disoient.
Cléomadès partout prisoient.
Lui et sa gent moult honnorerent.
Cele nuit iluec demorerent,
Et lendemain s'en departirent.
Si très tost que il le jour virent,
S'en commencierent à aler.
8930 Lor prisons en firent mener.
Roi Primonus en ont mené ;
En I chastel enprisonné
L'ont Griiois bien et fortement.

Mais or vous dirai je briement
Comment cele guerre prist chief.
Au roi Primonus ert moult grief
K'ainsi li ert pris de la guerre.
Vers les Griiois fist pais requerre.
Sor ce, ce dist, se meteroit.
8940 Que Cléomadès en diroit ;
Car tant de lui entendu a
Que tout son plain dit en tenra.
Et Grieu l'otroient ensement.
Et Cléomadès entreprenent
Cele besogne, et dit leur a
Que courtement son dit dira.
Jusk'à lendemain atendi ;
Onques n'i mist plus lonc detri.
Lors a tous les barons mandez,
8950 Et fu prise la seürtez
De Primonus, que il tenroit
Ce que Cléomadès plairoit.

Cléomadès en son dit dist,
Pour ce que Primonus mesprist
Vers les Griiois premierement,

K'à tous jours iretablement
Sera vers Griiois redevables
Et lor jurez et lor féables ;
Que, se nus vers aus mesfaisoit,
8960 'A son pover lor aideroit,
Et rendroit trestout le damage
Que fait leur avoit par outrage,
Et à touz jours mais lor donroit
Tel treü qu'il deviseroit.
Et lors devisa le treü ;
Mais ne sai pas com grans il fu,
Ne je n'en vorroie mentir.
Ainsi lor plot à assentir.
Partant, de la prison issi,
8970 Et li autre prison aussi.

Par convoitise fu cil rois
Sougis à ce tans as Griiois.
Sachiez nus ne doit convoitier,
Pour autrui grever, lui haucier ;
Et tex se cuide haucier haut
Cui à la fi[n]e li piez faut ¹,
Si que, quant il cuide estre el mont,
Si se trueve il el val parfont.
Et, pour ce, se doit bien garder
8980 Chascuns del autrui goulouser ;
Car qui l'autrui convoite à tort,
De s'ame convoite la mort.
Et cil qui pert l'ame, tout pert,
Ce doit on savoir en apert ;
Et qui autrement i entent
Il n'a pas vrai entendement.

¹ « *Qu'à la foie pié li faut.* » Ms. 7539.

Ainsi fu la pais estorée
Que je la vous ai devisée.
En Caldée Caldieu s'en vont.
8990 De la pais lie et joiant sont ;
Selonc ce que leur ert cheü
Furent lie que ainsi lor fu.

Cléomadès lors s'avisa
K'en Grece plus ne remaindra;
Fol. 35 v°. Car de la chose qu'il queroit
Nule nouvele n'entendoit
N'à estranges ne à privés,
Dont moult de cuer ert tormentés.
As Griex dist k'aler s'en vouloit
9000 Et que à Dieu les commandoit.
Moult en furent Griiois dolant.
Lor firent venir tout errant
Chevaus, joiaus, or et argent,
Pour donner et lui et sa gent;
Mais onques ne volt recevoir
Joiel ne tresor ne avoir.

Or vous dirai que Griiois firent.
Tout communement s'assentirent
K'à Cléomadès offerroient
9010 K'à ses besoins le serviroient
Pour garder son cors et s'onour.
Devant lui et grant et menour
Sont venu, et offert li ont
K'à son vouloir le serviront,
Et quant li plaist que il les mant,
Car il sont tout à son commant.
Cors et avoir entirement
Offrent à son commandement,
Et dient bien que commander

9020 Lor puet, et que tout sans mander
Iront vers lui s'il a besoigne :
Ce ne lairoit pour nule essoigne.

De lui obéir se penoient
De cuer, car faire le devoient.
Et Cléomadès sagement
Les respont, et moult doucement¹ ;
Et dist que il n'escondit mie
Leur service, ains les en mercie,
Comme cil qui tout bien savoit
9030 Et en cui toute honnours manoit.

Ainsi la chose demora,
Et Cléomadès s'en ala.
Le tiers de la gent n'avoit pas
Que li charcha Marcadigas
Ses peres, au partir d'Espagne.
N'avoit pas o lui grant compaignie.
Moult en ot de mors demorez
En l'estour dont oy avez,
Et sor le chemin au venir
9040 En couvint il assez morir
Ou de leur mort ou en estour ;
Car faire leur couvint maint tour
Et passer maint divers pays,
Ains k'en Grece se fussent mis.


¹ Leçon du Ms. 7539. Le Ms. 175 porte : « *Sagement.* »

TABLE DES MATIÈRES.



	Pages.
INTRODUCTION.	v
Cléomadès	1

FIN DE LA TABLE DES MATIÈRES.





Cléomadès.

28178

Adenet le Roi. - Li roumans de
Cléomadès.

v. 1

PONTIFICAL INSTITUTE
OF MEDIAEVAL STUDIES
59 QUEEN'S PARK
TORONTO 5, CANADA

28178

